

ПЕТӖ 1926 ВОСЯНЬ

ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ
РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

4

КОС МУ (АПРЕЛЬ)

2008



ТАЙӖ НОМЕРЫН:

Николай ЧУГАЕВ. КӖнкӖ матын, талапӖлас...	
Повесът	3
Любовь АНУФРИЕВА. ОлӖмӖй кык пельӖ ори...	
Кывбуръяс	26
Екатерина МАКАРОВА. Кык бана олӖм. Висът	29
ЗАРНИ ЛЮСЯ. Выль кывбуръяс	43

МИЯН КАЛЕНДАРЬ

Алексей ОДИНЦОВ. ГижӖдъясые ёртӖдісны	45
Борис ШАХОВ. ГӖрд дзоридзъяса сьӖд шаль.	
Романысь юкӖн	49
Геннадий БЕЛЯЕВ. «Кывзы, другӖ»,— шуас	63
Степан РАЕВСКИЙ. Кузь туйӖ петігӖн. Висът	68
Надежда ПАВЛОВА. А вӖрыс быттьӖ бӖрдӖ.	
Ӗти юкӖна пьеса	74
Выль небӖг	80

Обложка вылын снимокыс Евгения УдаловалӖн.

© «Войвыв кодзув» («Северная звезда»), 2008 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

Михаил
ЕЛЬКИН

Геннадий
БЕЛЯЕВ

Зам. гл. редактора

Евгений
КОЗЛОВ

Ответственный
секретарь

Алексей
ПОЛУГРУДОВ

Владимир
ТИМИН

Александр
УЛЬЯНОВ



Көнкө матын, талапöлас...

П О В Е С Ь Т

*Сиа война кагся нывбаба-
трактористкаясы.*

Водзкыв

Мудер морт шулöма: коді пö важсö казгытлас, нэм помöдзыс сылы син пöлөн овны, а коді пö оз казгытыв... Кодлы нö кажитчас овны синтöм кычипинад? Та вöсна, тыдалö, и кутчыси тайö гижöд бердас.

Тöда, абу кокни гижны сы йылысь, мый ачyd эн аддзыв, эн нуöд ас пырыд, но нöшта на сьöкыдджык, кор гөгöрвоан, мый ставыс тайö, бөрö кольöмаыс, вочасөн вушйö, вунö мортлөн паметъсьыс, вошö öнiя олöмыслөн вабергачас.

Ог кöсйы тайö гижöднас кодöскö дойдны, сы могысь водзвыв кора прöща налысь, кодлы тöдсаöсь да мусаöсь гарыштöм нимъ-ясыс. Öти сайысь кöсъя аттьöавны Карманова Мария Фёдоровнаöс да Попов Егор Владимировичöс налөн казгытöмъясысь.

Жалейтö тэнö Семёныг, Фегöсья, жалейтö...

— Чöл, эн кö сюрлы сы плеть улö (конюкыг да мег плеть-тöм!), эн и байт...

— Да ме эг ог лотшкöдöм кузяыг. Мöся, сизим челядьöс сöмын и вайлiн баба нэмнад, эн тай, майбыр, ме моз гасөнöс...*

Аннуш

Арся луныд вильыш кычи кодъ: босьтас да лымйöн тыртас-кундас, либö мöдарö,— еджыд пасьсö öти здукөн пөрччас-сывдас. Быттьö купеч ныв рöмпöштан водзын ышнясьö, оз и тöд, мый павгыны вылас.

Со и талун поводдяыс петкöдлiс öбичасö. Колö жö: школаö мунiгöныс ыркыд сынöдсьыс Аннушлысь весиг ныр-вомсö чеп-лялiс, и со тэныд,— пажын кад кежлö ульдiс. Йöв кодъ еджыд ру сьöкыд эшкынөн шебралiс сиктсö да азыма кутчысис сыв-дыны-сёйны пушыд лымсö. Збыль тай шулöмаöсь важ пöльяс: кык Ыджыд субöт костын усьöм лымйыд пö абу дыр олысь.

Урокъяс костын зонпосни пöттöдзныс удитiсны лымйöн ма-

* *Курсивөн тöдчöдöма вевдор Сысола диалект (авт.).*

часьны, дурмытөдзныс туплясисны мурчкакылысь лым пиын. Весиг удитөмны, сё мокасьтьяс, Гришаньлы, классын медся дзоля тушаа зонкалы, лым ёкмыльнад веськавны ныр-вомас. Пукалө тай со, начнас герой, беринось нырсө пыкөма камралөм лымйөн. Велөдысь өдва и вермис лөньөдны дзикөдз ышмөм челядьос. Оз-оз, да бара на кодкө, өшйивтөм лов, прысьнитас-серөктас, класс пасьта кыпөдас гаж...

Сөмын Аннушлы талун абу долыд, мырдөнсор кутө доршасьысь синвасө. Кольө, Аннушлөн медматысса ёртыс, гашкө коймөдысь нин кузь лунбыднад матыстчыліс нывка дорө: чөла пукалыштас орччөн, сэсся ышловзяс да бөр вештьяс. Оз гөгөрво том вежөрад, мый сэтшөма майшөдлө нывкаос, а юавны — кывъясыс оз сюрны. Да оз лысьт юасьнысө, төдө, мый воча кывйыс оз ло. Абу сэтшөм Аннушыд... Оз куж сійө элясьныд, да оз и мөд юксыныны могнас...

Татшөм жө лым рокөса лунө, кольөм воө, кувсис муса мамукыс, муыввса медся шань да радейтана мортыс. Ёкмыс во и вичмис Аннушлы овны мамыслөн борд улын, дженьыдик өкмыс во нежитчыны асья чөскыд, пось нянь көра сынөднас. Унзілсор кывзыны медся матыс мортлысь төдса сьылөм-тетькөдөм...

— *Марья тьөт, а мөйөн нө тійө ичөт пөранаг ворслінныд? Көнкө, ас вурөм рузум чачаясөн?*

— *Кутшөм нін эськө чачаяс сійө кагнас да... А-а, час энлы, спомни! Чукөртан кө сё лёльө-нигзул да згайтан лавкаө, на вылө сепліныс ичилик кука.*

— *?!*

— *А мөйсяма лешак вылө нигзултө чукөртліныс, өні на ог гөгөрво.*

— *Эсійө, чипанъястө, тыдалө, видзліныс да?*

— *Енмыс төдө, гашкө, и видзліныс...*

Пажын

Ак, кутшөм чөскыд сынөдыс. Ма көра. Апыштан макуттяөс моз, да лолыд тырөмөн тырө. Весиг батыслөн сатөк самосад тшын дукуыс тані, вөля вылад, оз дөзмөдчы. «Эк, лоны эськө тай өнгаг местаас,— мөвпалө Аннуш чуньыс кузя визъялысь чутік вылө видзөдігмоз,— со өд, сөтанаыд, кутшөм бодера шаръялө-ветлөдлө, оз тай пов нинөмысь. Быдсяматортө, көнкө, лэбалігад аддзыліс вольнөй свет вывсьыд и. Сөмын тай висътасьныс оз куж...».

Ышловзис нывка да жаладдза вылө кыпөдіс чуньсө гагнас. Енгаг, быттьө тайөс и виччысьөма, паськөдіс гөрд чутөсь бордъяссө, здук-мөд тадз ногыс лөньліс, быттьө прөщайтчис нывкакөд, и качөдчис сынөдө. «Бур туй, донаөй!»— виччысьтөг горөдсис Аннушлөн.

— *Кодлы нө бур туйсө кевман?— батыслөн каляныс муртса эз усь вомкөтшсьыс.— Бур туйөдзыд, ныланөй, со на мый ыджда зорөд колө чөвтны. Лунтыр нин пөжө,— сэсся чышкис ньылөмсө плеш вывсьыс да содтіс:— Грек лоө, көтөдам кө этатшөм турун... Но, артмис, буракө,— Семён тракйыштіс вожки пөлөдыс выльөн*

вӱчӱм вӱлӱкуша, гажаа ыкнитӱс да вьль пӱв пестӱс кусӱм кал-
лянсӱ.— Ӧти уджӱн этшаджык. Важ доддӱыс лестукӱдз воӱма,
а вьльсӱ лӱсьӱдысь абу на, тыдалӱ, удитлӱма чужны, кань-ерӱ-
макань. А тэ нӱ, Аннаыс, мый видз пӱперегыс бовъялан, он-ӱ
тӱнъя лунсӱ корсь? Ог видзӱдды, мый тэ менам ныв, регыд рӱш-
тшӱтала лювъялӱмсьыд.

— Менӱ ӱд, батьӱ, нывъяс ыстӱсны юавны, позьӱ оз купайт-
чыштны. Кӱть неуна. Бабаяс абу прӱтивӱсь ни. Кольӱм лӱдз-
мӱдтӱ пӱ ми асьным нин юалам...

— Тӱлы, визяордаяслы, сӱмын сет вӱля, васьыс он и петавлӱй.
Со, ӱти мутиӱс ыстӱ нин вӱвъясӱс юктавны,— муртса эз матьӱг-
сьы батыслӱн.— Вошис, быттьӱ ваӱ вӱйис, час джын нин вич-
чыся. Мед сӱмын волас, полӱкалӱ, мышвыв кучиксӱ и лӱдза!
Кольӱыд, Кольӱыд!— казялӱс нылыслысь юалана видзӱдлассӱ
Семӱн.— Код нӱ сӱсся, гындей кынзди, вермас воштӱдчыны лун
шӱра лунӱ.

— Да ӱд сӱйӱ сӱмын на вӱв вылын куртӱс, мудзис, кӱнкӱ!—
дорйыштӱс воксӱ Аннуш.— Со мый пасьта виддзыс да...

— М-ы-ый керис?!— виньдӱс быдӱн Семӱн.— Зонмавнысӱ,
писти чут, оз мудз, а танӱ, видзӱдтӱ, мудзӱма! Эн вай лӱгӱд, Ан-
на. Аддзысис зырым кӱрӱбӱс дорйысь. Мися, рытивбыдъясӱн
горт дор потшӱс пыкӱ. Жӱник!

— Батьӱ...

— Эн бара дзерӱд менӱ, Аннуш, берегись! Бурджык лоӱ,
ыстан кӱ вакульсӱ талань. Но мун, мун,— небзыштӱс Семӱн,—
да висьтав сылы, гомозейлы, мед Кубрак вӱвсӱ лӱдзалас вӱля
вылӱ. Юръястӱ и Серкоыд кыскалас, абу на барин. Он сорсьы?

— Ог. А нывъяслы мый висьтавны?— оз на мунсьы Анна-
лы.— Эсӱйӱ... Купайтчыштӱм кузяыс?

— А-а, катшыс гӱнаыд пӱ оз нин рудӱд?— ас ногыс сетӱ
сӱглас батыс да нывкалысь шудаа чилӱстӱмсӱ венӱгмоз содтӱ:—
Сӱмын эн ылаӱй Кольӱ мозыд, кики чукӱр...

...Пажын кад. Нуръясьӱм бӱрад ок и лӱсьыд туплясьыштны
шоньд му-паччӱр вылад, веськӱдыштны мудзӱм лысьӱмтӱ. Жар-
ысла вералысь сынӱдын перво вӱляника, сӱсся пыр гораджыка
и гораджыка кыптӱ гажа сӱрни-басни. Кыдзи нӱ сытӱгъя востер
кыв-вора бабаясыдлӱн! Лыддӱы, кыв кеслытӱг луныс весьӱн
коляс, кыз шуласны, здранас згинитас. Мужичӱйясыдлы тайӱ
тӱдса, сы вӱсна унджыкыс корсьӱны помка, медым вошлыны
час джын кежлӱ чепыля синъяс улысь. Кодлы нӱ окота веськав-
ны кӱрт изки костад. Он и тӱдлы, изасны пилипызьӱдз. Со тай,
кодӱ кызд кужӱ, ӱддортчӱны баба син увсьыд. Ӧтияс видз пом-
ланьыс — ты дорлань, гымга-кулӱм видлалӱм могысь быттьӱ,
мӱдъяс берег улӱ вугыр шатӱн зунясьыштны.

Со и талун ставӱнлы вичмис усйысьны. Кодлы чассьӱ, а ба-
баясыдлы гажтӱм, кӱть горӱн лӱвт. Ас костаныс да, ставсӱ нин
лои пожъялӱма. Лыблас жӱ эськӱ сӱрни, да регыдӱн и пӱдӱ-
кусӱ. Кодсюрӱ баба письыд нинӱм вӱчитгмозыс (пыр жӱ нин да
кутшӱмкӱ ылӱс) кутчысьӱмаӱс зуасьны-тоясьны (ӱблезянаясыд
пӱ тай сӱдзи жӱ вӱчӱны, кор нинӱм керны!), кодӱкӱ нин и ас-
лыс ныр улас ропӱдчӱ-сьылӱ...

Колӱс тай Семӱнлы нем думайттӱг бӱр локны! Табак кӱшель-

ыд, ёкмареёкыдлөн, питшөгсьыс тювалёма сёянінас, а тшынась-төгьд обедсьыд төлкыс ичөт, чуньлыскөн панясьом кодъ дзик.

Баба пөрөднили эськө зэв бура төдса дядьолөн сьокыд характерыс, вермас на и лотшкыны, пось ки улас кө веськалан... Но, кыз шуласны, черитөминад пö и...

Абу. Некөн оз тыдав көшельыс, быттьö му пырыс мунёма! Быдугöv нин куснясис-корсис Семён, пестерсö гоз-мöдысь гугöдліс и. Весиг пукалан местасö лапöдöмөн видлаліс.

— Кыланныд, бабаяс, гашкө кодкө адзылід ма көшельöс?— шыасис сэсся Семён да вьль пöv кутіс луасьны пестерас.— Эз öд сюраыс ну.

Клавдея, лэчыд кывъя том нывбаба, чöскыда, кань моз нюжöд-чыліс да читкыртчыліс син пöвнас төваркаясланыс: энлöй пö!..

— Тэ, Семён Алексеич, мед эськө ме гөгөр корсьыштін. Со öд кутшöм чöскыда турунсö шыльöдан-малалан, весиг вежöй тюрöбөн петö. А мый, гашкө менам төдлытөг и суйсис, йöйыд-лөн, питшөгö. Сідз öд, бабөньяс?

А налы тайö и колö, радпырысь чошкөдісны пельяснысö да кыпыда: «Этатшöм питшөгад непöштö көшель, вöла-доддя вошас... Кланыдлөн оз сім, майбыр, вермис и ки-кокöдны... Вид-лыштін бы, Алексеич...»

— Тыпу, лавут чукөр,— матьöктіс Семён да лöсьöдчöмөн пуксис бипур дорын куйлысь колода вьлö.— Тэ налы öтитор музтöдз долян, а налөн öти разум: килькъявны пöттöдзныс.

— Да сюрас табакыд, абу öд жель. Сöптыс потас да ачыс на сюртöдчас. А майшöдлö ми кодьнымöс со мый,— матыстчис пукалысь мужичöй дорö Клавдея да серпасөн пыкис бокъяссö.— Тэ, Семён, аслад нэмөн удитін мöдысь нин гөтрасьны. Ме тай со лун и вой та йылысь мөвпала, а чассьöыс некыз оз лемась, бокöд уйкнитö. Велöдыштін көть эськө менö, төлктöм бабаös, кызди проклятöйöс пököритны. Кылан, Семён Алексеич?

— Но и быдыгысь вома жö тэ, Кланы. Оз тэд, видзöда да, овсьы йöз мозыс,— Семён малыштис висьысь коксö да лабутнöя, полöмсор, быттьö сыркмунöм кагаös, лöсьöдіс-пуктіс матысса турун вутш вьлö, а беддыс вьлö индöмөн содіс:— Мышкуыд кө лудзис, верма на и велöдны дон босьттөг.

— Ой, лудö, Семенушко, лудö, терпеннö абу,— водзö на тешитчис Клавдеяыд,— да сöмын тай молодайка Сандраыд, ме думысь, лöö прöтив...

Кывзысьяс ызöбтöмөн серöктісны. Ышмöм Клавдеялы тайö содтöд лов ру сетö, водзö нуöдö тешсö.

— Ме сöмын öтитор некыз ог гөгөрво... Кытысь тэ, коньö-рöй, радейтчöм вьлад вынйöртö гумалан? Мукöд мужичöйсьыс дзик нинöмөн он торъяв, сэтшöм жö кутш, сера-борда, öти руж, а мöдарсянь кө видзöдлан — орол да и сöмын...

— А тэныд нö, Кланы, кодар боксянь төдсаджык,— суйсис теш-гаж костас Лукерья, ён тэчас нывбаба, Клавдеялөн суседкаыс.— Он-ö сорлась кывъяснад?

— Тэ, Лукö, синъястö вöсьты паськыджыка да сюсьöд пель-тö, удж туй кузяыс и гөгөрвоан мортыслысь этшсö. Со босьт Федöсьяös. Не местаö эськө лои гарыштöма поконичаös да, сарство небеснöй,— пернапасасис тьötö да нюгыльтіс чуньяссö.— Сизимös кодакостікө лöсьöдісны. Мöдлөн кө, важөн нин

усырыс кропкысьӱмӱн орис, а Семёныдлы кӱтъ бы кны. Сандра-ыдкӱд оз жӱ нач куруысь ворсны, ас вежмӱн кык пи дорисны. И кыдзи тані шемӱсад он усь.

— Энлы, энлы,— муртса эз кач сынӱдас Кланы.— А кытчӱ воштан германскӱй пленад* мытаритӱмсӱ?

— Но и мый, вӱлі кӱ пленад? Некодӱс тай ас пайысь эг удзӱд,— быдсӱн дӱзмискодъ Семён.— Эг ӱд ас вӱляысь сӱні, Германияд, лутшвидз, а со этайӱ ускӱттӱ вӱснаыс,— тотшнитіс сера бедьнас дойдлӱм кок кузяыс.— Вои садӱ да... Кысь нин бӱрастӱ.

— Ме ӱд, Семён, эг чепыльтӱм ради,— чинтіс гӱлӱссӱ Кланы, тыдалӱ, гӱгӱрвоис вьвтӱасӱмсӱ.— Ме юавны кӱсий со мый, позӱ кӱ...

— Юав. Он жӱ тӱысь мын-а, вишкунысь.

— Ачыд тай висьтасӱлӱмьд... Ылі муас пӱ конюкӱн жӱ вӱлӱмьд, вӱвьясӱс дӱзӱритӱмьд. Озыр фра... фру...

— Фрау...

— Да, барыня ордын пӱ быттӱкӱ олӱмьд. Сідз?

— Но, вӱлі.

— Со ме и юавны кӱсъя тӱнсьыд, Семенушко. Кутшӱмӱс нӱ найӱ?

— Кодъяс, вӱвьясыс али мый?

— Вӱвьяс?! Ха-ха-ха,— семдіс Клавдея да гатшӱн пӱрис места вылас.— Немкаясыд, Семён! Немкаясыд!!!

— Ак тӱ, розгайлӱ!— лӱсьӱдчис бедьнас косӱӱбтыны Семён, да эз судзсы, висысь кокыс эз сет...

Тӱдісны-ӱ найӱ, долыд синваӱн сыркъялысь войтыр, кун кодъ ваын уялысь томулов — ставӱн талапӱлас — мый ӱти воськов ылнаын насянь, гашкӱ, ю кӱлысас нин, Семёнлӱн кодъ сера бедъ вӱлӱ мыджсьӱмӱн зумыша сулалӱ муывьса Лӱкыс?

Этша сылы, ок этша лымъя эрдъяс вылын, кӱдзыд Финляндияын усьӱм йӱзӱн вештӱм медыд. Дзескыд сылы, кӱин лолалы, суйӱр саяд пакӱститчынытӱ. Со и бузгыля сулалӱ сӱд кымӱрӱн мӱдлапӱлас, виччысьӱ урчитӱм кад, медым биӱн да кӱртӱн пӱдтыны и сытӱгъя гежӱда вичмылан гажлун. Муссӱ зыртӱ, горшас сатшӱ кыпыд серамыд. Кыдз нӱ! Быдса во колӱ виньгырӱн овны, быдса кузь во...

Гаж

— Егор дядь, а кыдзи нӱ важ пӱранад гажӱдчылінныг? Шуам, сійӱ жӱ войнаӱдзыс. Гашкӱ, энӱ и шегӱдлӱ гажтӱ да?

— Кыдз нӱ эгӱ! Но тӱ, Коля, шуин жӱ! А избачитальняыс нӱ мӱй вӱлӱ сулаліс? Поп керкаӱн тай шуліныс. Правда, кинотӱ, ог соссы, редкӱя вигзӱдлім. Кор кинопередвижкаыг пыралас Койгортӱ кайигӱн, сӱк и вигзӱдан. Лӱччигас бара, оз кӱ механикыслы ло дыш либӱ избачыд места вылас лоас. Концерт модаяс вӱліныс и...

— Когі нӱ концерттӱ вӱчлыліс?

* Империалистическӱй война (авт.).

— Учительствоыг челядыгкөд спектакъяс пуктылыныс. А-а, спецпереселенечьясыг, но Воквадсыйг тай, частö воліныс и песнястö кутшöма гайкйöдліныс! О-ок! Вайöдöм йöзыс сэн разнöйиныс вöліныс и кажнöй ас ногыс сыйлö. Да эг кутшöм мичаа. Кöть и басныс тöдтöм, а сёравно — сьöлöмаг кутчысьö! Сорокöвöй годнаг даже полякъястö вайліныс. Но, ерöмакань, найö бара йöктынытö мастерöсь! А гривачи зонъясыг... Когі таллянканаг, когі балалайкаөн ворслис-мизöдчыліс. Мöй эсся абы тэг гаж. Гаж и эм. Йöзыг тай сэкi мöг пöлөсгжык вöліс. Öнiа том мортыгкөд он сровнит. Öнi вина вылаг öшöдгöмась ёнджыка, а сэки попробуй пыр изба-читальняг юöм юрөн, регыг шелкöданыс шошаöдыг, будь-бугь...

...Колі тай, йöюкыдлы, кывзыны Лизатö! Тöдіс öд Анна ичöt чойыслысь китрöван пöвадкисö, да со тай, бара на эскис ручöйдлы. Бур ног öд корис Лизаöс отсыштны вöвъясöс идöртны. А кыз нö пö ог отсав, тэ пö мун, а ме вöта на тэнö сёись. Эз кö сет Лизаыс надеясö, ачыс на ставсö удитіс керны, оз тай элясь Анна сюсылун тырмытöм вылö. Мöд лунö кö, чойыслөн отсöгыс и дарöм эз ков, а öнi колö лов быртöдзыс уджавны-тэрмасыны.

Дуня, Анналөн нывъёртыс, этша вылö куимысь пыраліс кузь лунбыднад. Тэ пö, Анюш, тöдан он, мый рыгнас локтö кинопередвижка. Кодкö Палауэладорсянь воысь юöртöма пö... Ачыс пö сэнi воддза рыгнас видзöдöма, да ёна и глянитчöма киноыс. Весиг нимсö висьталöма: «Волга-Волга». Киномеханикыс сы пыр юөр ыстöма, мед читальнясö воигкежлас шонтыштасны неуна. Кöдзыдсыс пö и аппаратыд ыръянитны вермас, а выль лента оръясьöмсыг юртö на, колöкö, бертасны...

Тэрмасьö Анна, весиг эз кут талун сынавны радейтана вöвсö, Кубраксö. А öд со кутшöма, сötанаыд, виччысьö, оз-оз да и гоньгöдлас вылö чатöра юрсö.

Быттьö грекыс вылö, батыс талун вайöдöма вöля выв йирсысь став вöвсö. Колхоз кантораö пö воöма индöд лöсьöдны дас вöла-доддя, медем первой лым кузя кайны Мырпонаыбö, лесозаготовкаяс вылö.

— Батьö, менам ставыс,— сийöс-кöлуй видзаніно мыччысь-лöмөн горöдіс тэрмасысь ныв.— Сöмын Лысакыд колис идöртöм... Мед нöшта кöть öтчыдысь матыстчылас сы дорö!

— Бара тай, кырнышыд, вазгис? Кымынысь нин тэнö öлöдлі, Анна, мед эн сюисьы лешак дорö! Курччас дöбелькиöдз, сэк эн норась...

— Гожöмбыднад вунöма нин менам... Но, ме муна, батьö. Кино вайöмны клубö, гашкö, удита на,— Анна кутчысис нин öдзöс вугйö, но содтіс:— Ветлін бы тшöтш...

— Со тай киноыс, ныр улын!— серöктіс Семён да индіс джодж шöрын куйлысь упреж вылö.— И сьöм оз ков вештыны, сöмын удит дзоньтавыны. Но, мун, нылук, тэрмасын кö, а ме дöм-сышта неуна, кытчöдз карасиныс тырмас. Тэ эськö Микулайыды накажитін, мед мöдысь волігөн МТС-сыг карасин вайыштіс...

Ныв довкнитіс юрнас, висьтала пö, да петіс нин.

— Энлы, Анюта,— сувтöдіс нывсö Семён.— Лизаыд нö отсасыныс воліс жö, көнкö? Мыйкö тай эз пырав талань...

— А кыдзи нӱ... Отсасис, дерт,— бытъ лои пӱрйӱддыны батысӱ. Тӱдӱс Анна, кутшӱм кыдз пу рокӱн чӱсмасяс чойыс, тӱдлас кӱ батыс.— Сӱмын сӱйӱ водзджык удитӱс мунны, Сандра тьӱт корис Васильтӱ гычӱдыштны да, лавкаӱ ветлӱгкостӱ пӱ.

Семӱн пыдӱа ышловзис:

— Ок, Аннуш тӱ, Аннуш. Эн тай и велав квайт во чӱжнад Сандра дорӱ. Сӱдз эн и шу мамнад. Мода вылас кӱтъ мед, чоя-вока костад, дӱжнавлӱн...

— Батьӱ!

— Но, ставыс, ставыс. Эн вай пыттӱӱдды синватӱ... Ме ӱд абу сӱтшӱм мижуй, гӱгӱрвоа тӱнӱ, нылукӱй. Нинӱм нин бӱрыннад он вӱч. И код рӱдӱ сӱмын рӱдӱылӱмьд этатшӱм несрукыс?— вашкысис Семӱн.— Юр кудӱӱ оз во...

Ныв чышкыштӱс вазьӱм син дорьяссӱ да паныд нӱмьӱвтӱс:

— Митит Семӱн рӱдӱ. Кодарӱ нӱ сӱсся?..

...Блӱсянь нин Анна казялӱс: Дуня абу весь больгӱма. Быттӱӱ выльӱн пӱжсьӱм курӱг дорӱ сильӱпиян,— кодӱ тӱрмасьӱмӱн, а кодӱ асьсӱ кутӱмӱн, лабутнӱя,— воалӱсны кино видзӱдысьяс. Чӱскыд серам, томуловӱн гажаа чильялӱм, гудӱклӱн няжакылан шы... Вочасӱн ставыс топалӱс-сорласис клублӱн шоньд гыркын.

— Удитӱ, эг сӱрмы!..— радлыштӱс Анна да чинтӱс ӱдсӱ. Со тай кодкӱ паныд восьлалӱ, оз тӱрмась сы моз клубад. Мыгӱрыс тӱдсакодъ и... Да ӱд тайӱ... Коля?!— дӱлкмунӱ том нывлӱн сьӱлӱмыс да лӱчкӱ шедӱм пышкайлӱн моз кутӱс тӱрыба тӱпкыны.

Паныда воысь сувтовкерис да здук мысти матыстчис шайпаймунӱм ныв дорӱ.

— Анук, тӱ? Эг нин чайт, мый локтан...— шыасис зон да сюся видзӱдлӱс тӱдса синъясӱ.

Радысла Аннатӱ весиг йирмӱг босьтӱс, да ӱд кодлы нӱ окота петкӱддыны небзьӱдчӱмтӱ...

— Со и видзӱд кинотӱ ачӱд, вошин кӱ надеясьыд. Колантор тай аддзӱмьд!— ныв весиг йӱткыштчис кинас зон дорысь.

— Эн лӱгась, Нюра. Ме ӱд таланъ воигӱн тӱянӱдз кежавлӱ. Лизаыдлысь юаси, да сылӱн сӱмын ӱти кыв: тӱ пӱ жӱника-невестасянныд, а юасянныд менсьым... Сӱдзи эз и висътав, кӱнӱ тӱ.

— Да ог ме лӱгав,— серамыс петӱс Анналӱн. Сувтыштлӱс кок чунъ помъяс вылас да небыдика шылькнитӱс-печиктӱс Кольӱӱс беринӱсь ныр кузяыс.— Эк тӱ, чутӱк-лудӱк!..— и кутчысис зонлы сойбордьяс.— Нуӱд нин вай, жӱник, киноад, пока помӱдз эгӱ сӱрмӱй...

...Кино чӱжыс тай усырныс ортӱдз киксисны-ваксисны видзӱдысьяс. Табак тшынӱн суктӱм сынӱдас кылӱсны киношнӱй йӱзлы «сола» индӱдьяс... Со, тыдалӱ, и пом... Здук-мӱд кежлӱ пуксьылӱ дзеналана чӱв-лӱнь. Ставлӱн ланьтӱмны, кодлы нӱ окота ас вылад босьтны киноысь пальӱдчан грексӱ...

— Э-эк-ма!— век жӱ сюрӱ смел морт.— Кужӱны тай овны бур йӱзыд! Вишкан-олан сиктад, да он и тӱд, кутшӱм гажа олӱм бокӱдыд кывтӱ-мунӱ... Кор нӱ таланъ шыльки олӱмыс катовтчас, е-рӱ-ӱ-ма-кань!..— кузя нӱжӱдӱс сӱйӱ.

Танӱ колӱ гӱгӱрвоӱдӱм: ӱнӱ, дерт, ставӱн тӱдӱны, мый сӱйӱ каднас татшӱм сӱрниясыд ок и донӱн вермисны лоны! А стӱч да миян геройяслӱн сикт бердас, 16 верст сайын, Воквад спец-

посёлокын дас во нин «чөсмасисны» курыд олөмөн матө кык сюрс морт. На пиын уналөн мыжыс вөлі сыын, мый көнкө да коркө лишнөй кыв лэдзөмаось...

Кыдзи висътасис Егор Владимирович, сгинитліс пө та бөрын мортыд, быттё мөс нюлыштліс. И некод эз төд, кодарө...

Бөрынджык, кык орчча колкоз өтүвтөгөн тай, а нимыс өтиыс-лөн вөлөма «Серп и Молот», кодкө нурбыльтөма вомгорулас, ми пө абу на йөйөсь пырны «Смерть и Голодад...» (тайө колкозыс ёна слаб вөлөма «Красная Звезда» дорсьыс.) Төлысь чөж туялөмаось шуысьтө, сөмын абу вөлөма йөз пөвстын «доброхотыд»...

Баба гожөм

Арся көдзыд зэръяс кисьтісны дышпырысь, нюдза, коставлісны кадысь кадө, тадзи сетісны туй дыр виччысяна баба гожөмлы. Сэсся өшійисны шоныд да кос лунъяс.

Чайтіс-ө ышнясьысь ар, мый ичмонь-гожөмыд лоө та кузяөн да сэтшөм оньыдөн! Кык вежонысь дырджык — шоныдөн шлонгысь поводдя. Сетіс жө тай помөдны сиктсаясыдлы шливөг зэръясөн торкавлөм уджъяссө.

Со и талун гырысь и посни петөмны идөртны му шөрө кольлөм шабді кольгаяс. Гажа поводдя дырйи и сёрни-басниыд кыпид.

— Клара, кытчө нө бара вошлін?— тешитчөны ньөжмыд вөраса ныв вылын шабді няръялан машина бердын уджалысь том котыр.— Эн-ө нин мөд мусукөс аддзы пыш ты дорад? Оз өд прөста Васька дедыс мөдөд лун шешъяв... Генусьыд со ловнас нин усис шогысла!— тувкнитөны өти зонмөс бокас.— Синсө дзикөдз ныждіс виччысьөмысла. Сідз өд, Геня?

Нывтө абу жө сөйысь вөчөма, сувтөдіс кольтаөн тыра телегасө, тэрмасьтөг суюыштіс юрси пратьяссө чышъян улас да чөскыдіника нюжөдчыліс:

— А мед көть и аддзи. Пөрысь вөлыд мутө гөрө на, и бөрөздатө оз тшыкөд мукөдыс моз...

И нем виччысьтөг дзобгө кынөмас дэльөдчысь зонмөс.

— Сідз найөс, Кларук, сідз! Эн сетчы, ныланөй,— сералөны шабді летысь нывбабаяс.— Мед аттё на шуас Митиперыд, мый вуж кузяыс эз дөнзы...

Кыпид теш-серам, машиналөн тарган шы... Кокни прөшвиөн гыалө арся сынөдыс...

Чөскыд тшакөн вөрыд тыр...

Талун удж бөрын Анна, Маша да Дуня пөдружкаясыскөд, сёрнитчис ветлыны вөрө тшакла.

Вөр-ваыс быттё кватитчөма бөръяыв да лышкыда, йөзсө чуймөдөм могысь моз, вольөсөн вольсалөма (тайө сёр арнадтө!) көчгоб-маслюкөн вөрдорса неыджыд кушинъяс. Кузь гожөмбыд тшакыс чунь пом мында эз вөв, и на тэныд! Босыт да көть гөрбушөн ытшкы, абу кө дыш. Олөма йөз эськө абу радөсь татшөмторйыдлы да: ок, абу пө бур водзын лишки тшакыд.

Анна, кызди и сёрнитчисны нывъяскöд, пыраліс Микулай ордö, корис зонмös төварышавны. Кольö батъыскöд буретш кулём вöлі дёмöны кильчö водзас. Ныв чолёмасис Егор дядькöд да шыасис зонморт дорö:

— Коля, он тай, видзöда да, эшты, весьөн пыралём лои. Ми со нывъяскöд вөрö мөдöдчим-а...

— Ме нин видзöда,— индіс мöдыс Анналөн сюмöд наберушка вылö.— Тöварышös корсянныд. Кötъ эськö и кöсийи, но некыз оз артмы,— зон ышловзис да надеятöг видзöдліс батъыс вылö.

— «Кöсийи», «ог вермы...»— нерыштіс писö Егор дядь.— Ме тай ог кут, ас пайысь. Войпук вылад транзьöдан, да он, небось юась, а тані эсытшöм нывкалы öткажитан,— и вильыша кунь-тыртліс син пöвсö Аннушлань юрсö катовтлёмөн.— ...Э-э, да тэ кötъ, тар бöж, тыртöм йöv пöдөнча мед босьтін,— удитіс на горöдны места вывсьыс звиркнитöм зонлы батъыс.— Мый нö, тшактö питшöгад тöбан?

Заворнича дорын сулалысь нывъяс казялісны воысьясös да пыр и вөрзисны мунны, эз кутны виччысьны ныла-зонматö. Ковмас кö пö, вötасны...

— Век жö, Кольша, ылöдöмакодъ лои тэнö уджсьыд,— торкис чöv-лөнсьö Анна да мунігмозыс лöсьöдыштіс зонлөн чикыля юрси вылысь картузсö.— Батъыдкöд, көнкö, чери кыйны лöсьöдчанныд вöлі, а ми сэтчö асланым тшакөн сүйсим...

— Шуан жö нинöм абусö, Нюра! Батъöй ачыс вöлі кашкö, йöзыс пö гобтö пötтöдзныс нин эштісны кыскавны,— мудералö Коля.— Аннушкаыдкöд кötъ пö ветлін, номös вылас вайыштің...

— Кольö, ме öд збыльысь шуа, а тэ сöмын тешитчан...

Микулай серöктіс да гач зепсьыс ыджыд кабырөн перйис көнтусь:

— А-а-к, кутшöм көра! Вай, инö, миритчам. На, чösма-сьышт!— и кисьтіс вольскöб тусьяссö нывлы соддзас.

— Аслыд нö мый?— Анна кöсийис юксьыштны лышкыд кавалерыскöд, но мöдыс вештіс нывлысь кисö, мудер видзöдласөн лукйысьыштіс питшөгас да перйис вильөн вурём табак көшель, ворсöдчыштіс ныв син водзын:— Талунсянь кута тшынасьны. Век жö дас сизим арös нин тырті.

Аннуш виччысьтöмысла быдсөн сувтовкерис:

— Тэнö, Кольö, эз-ö нин йöй руыс босьт?! Этатшöм страмсö нёнявны!

— Мый нö тані лёкыс? Семён дядь тай вомсьыс оз и чövтлы калянсö, да нинöм, оз бара-й норась.

— Кыз нö... Оз, дерт! Импералистическöй кадсяыс на... Лёк газ бöрад... Меным пö табакыд лекарство пыдди. А тэыс нö мый думыштöмыд?— Анна кватитіс көшельсö Кольö киысь да руд пызьсö кисьтіс муö.— Меным батъö шуис: берегись пö, Анна, казяла кö, мый мукöдыс моз табакөн балуйтчан! Кучиктö пö чölöсөн куля, ог и видзöдлы, мый тэ менам ныв.

Тöдны кö Аннушлы да и унджык нывъёртыслы, мый ядыс тайö лоас тшыглунысь медыджыд ылöдысьнас войналөн нем жалиттöм воясö да сідз и коляс мукöдыслы лёк тшаптуйөн водзö олёмас! Мария Фёдоровналы тай квайтымын нель ар нин, а эг пö и янсавлы проклятöй чигаркаыдкöд!

...Дивъя жö нин дай тшактö вотöмыд! Пидзöсчанысь да, быттö

зөр пиын ош, сөмын судзөдчав турун пиас сярвидзыхь кизь кодь гобъясөдзыхь. Яг вылын весиг дона гобйыс слөймөма ге-жөдіника петавны. Микулай тайос пыр жө смекайтис, эз на тай, милголова, ышты ульөм маслюктө өктыны. Казялөма, мый бур гобйыс аръяывисө понөльник пиас петөма, со и лэбалө-корсыхь-сьө зумыд тшакъяссө...

Сунгысис нөштаыхь пушyd лапъяс костө, да этша эз тангыс Анютакөд. Повзөмысла нылыд конйыштчис, муртса эз и усь. Эз кө ёртыс слөймы сывъявны, сідзи, гашкө, и лои.

— Весьөпөртін өд, мути!— шөйөвошөмөн ойөстис ныв да ситчис мездыхьны топыд сывъясысь...

Повзөмысла тіралана гөлөссыс да матын, дзик орччөн лоөм шоныд лов шысыс зонлөн вежөрыс здукөн гудыртчис...

— Аннуш!..— тайө и ставыс, мый вермис пычиктыны ас пыхьыс Кольө...

Нывлөн киясыс асьныс, вөтын моз, сывъялісны зонлысь сыхь-лісө, некорнас на окавлытөм вом доръяс кужтөма өтувтчисны би пөсь да сөдз окыштчөмын...

Лектор

Кузь ар бөрад көдзыдыс быттө тшыг көин: өти здукөн кынталис му веркөссө, восьтис, мед көть и чурки-парки лымтөм на, төвся туйяс. Төлыд мортыды, мый көть эн шу, век жө сетыштө неыджыд шөйччөг. Оз, дерт, ставөнлы жө-а.

Сиктад регыд кывсис, мый сельсөветө воөма вөр лесозаготовка вылө разнарядка.

Анна төдө нин, мый сійө тшөтш веськалөма спискас. Ыджыд-джыд ёртыхьсылы во-мөд нин вичмылөма собавны вөрад: коді ямщикавлөма, кыскалөма вөрсө Мырпонаыбсянь пурыхь ээвтланинөдз; вынийөраджыкаясыд тішмылявлөмаөсь керяхьссө вөр кыскалан волокуша вылө. Дас вит арөса нывьястө оз на, көнкө, ыстыны кер сөвтны, но кыз висьтасьлөмны воддза кайлөмаясыд, коноводавнытө пө абу жө ма, гашкө пө, и сьөкыдджык на сійө уджыс сөвтчөм дорсыд. Сөвтчысыдыд өд мырсөны өтвив, кыз шуласны, ыджыд гомозөн, а кыскасысыдыд вөрсә туй вылын дзик өтнас... Пөрас кө волокушаыд, өтнады гөг пыхьтытөдзыд ковмас сөвтчыны. Бур, веськалас кө кодкө кыскасысыс пыхьс төдса... Сьөкыд уджсыд вөлыд, шуам, укшальмас, сэки ачыд, вөлыскөд тшөтш, синва-зырым сор йөткалан тыра волокушатө... Либө чибөыд, грекыс вылө, тювалас-петас сийөс костсыды... Да мый на оз вермы лоны вөрсә туй вылад...

Но став тайө «чассьөыс» Аннуш коддьөмлы көнкө водзын на, лун-мөд эм на налөн «шог» пальөдөм вылас...

А тарыт...

— ...Но мый, ёртыхьс, ставөнлы гөгөрвоана?— чышкис пөсялөм плешсө лектор.— Верманныд юасыны, ме дась вочавидзны быдөнлы.

Игө Митрей, пыхькөс вежөра пөрысь морт, малыштис пашкыр тошсө, кашөктис да гораа чөвтис:

— Ме вот көсья со мый юавны, төварыш лектор. Кыдз асьныд шуинныд, японечьясыдысь пө ныр-вомсө разим, так?

Фингьясыдды пӱ сюрис будь здоров. Накӱд, шышыясыдкӱд, яснӱ-пӱнятнӱ. Германечьясыдкӱд, шуанныд, эсӱйӱ — пак...

— Пакт. Роч ног кӱ, мирнӱй договор. Кыз, прӱститӱй, тӱянӱс шуӱны?

— Игӱ Митрейӱн... тыпу, Дмитрий Игнатъевичӱн тай вӱлӱ век на-а...

— Ещӱ ӱтчдыдысь воӱда, Дмитрий Игнатъевич, мый тайӱ догоровыс сетӱ позянлун овны Германияыдкӱд мирӱн. Уджавны, быдтыны челяднытӱ. А перспективаыс та выӱ,— лектор докнитӱс юрнас сай пельӱсын сулалысь том войтырлань,— тӱян сиктын, кыз ме видзӱда, ӱна ыджыд.

— Мый нӱ сӱя, персьперк... тыпу, кывтӱ чеган,— кыліс горӱдӱм.

— Коми кыв вылад вуджӱдӱмӱн, кыз эськӱ гӱгӱрвоанаджык висътавын?— мортыд гыжйыштӱс балябӱжсӱ.— Но... Мӱд ногӱн кӱ, водзӱ выӱ позянлун, надея...

— Позянлуныд эськӱ тырмӱ,— пырӱн жӱ кыліс томъясладорсянь кыпыд гӱлӱс.— Да со кодсюрӱ...— тайӱ кывъяс-ыскӱд сӱсянь жӱ кыліс нывлӱн чилӱстӱм шы,— оз на тай бура гӱгӱрвоны...

Гыалысь серам коркӱ-мыйкӱ век жӱ лӱнис.

— Но, менам ставыс,— чеччис лектор.— А ӱнӱ тӱянлы петкӱд-ласны кино... «Трактористы».

Игӱ Митрейыд нӱшта мыйкӱ кӱсйис на юавны, но мужикъяс пыр жӱ ӱвсьӱдӱсны:

— Гриш дядь, тӱныд нӱ мый шуисны? Оз ло войнаыд, оз. А в случае чево... Пушыд тошнад пӱдтан лешакъясӱс! Сет вай кинонас чӱсмасьны!

Вӱрын

— Но-о-о, Кубрак, но, донаӱй!— ышӱдӱс Анна вӱвсӱ кӱдзы-дӱн дорӱм тыра додь нетшыштны. Вӱв выныштчис да кокны-дика, ворсӱгтыр быттӱ, кропыштӱс-вӱрзӱдӱс волокушасӱ. Унаыс нин том ныв бур кывӱӱн аттӱӱалӱс батысӱ... Эз жалит Семӱн, Мырпонаыбӱ ыстӱс медъӱн вӱвъяссӱ. Шуӱма жӱ эськӱ колхозса председателыд, тӱ пӱ, Алексеич, бара на, видзӱда да, медсправнӱй вӱвъяснымӱс вӱрад лӱсьӱдӱмыд. «Труд» кӱзьяйствоад пӱ тай абу йӱйӱс, бур вӱвъяснад оз, небось, шыбласьны. Та выӱ «Алексеич» быдсӱн матӱӱктас:

— А том йӱзыслы кутшӱмджык упадь вӱвнад кыскасьнытӱ! Сӱтшӱм живӱтинаыдкӱд и мортлы абу дыр ловсӱ пуктыны. А мый найӱ керӱны «Трудас», меным пӱс ни кӱдзыд!— Семӱн макнитӱс кинас.— Тӱ кӱт и председателыс, йӱз водзас син дзебны меным ковмас, Митит Семӱнлы!

...Вӱлӱк помас, юж туй выӱ петӱм бӱрын, Анна сувтӱдӱс вӱвсӱ. Виддалӱс шыркӱтша гезъяс, эз-ӱ личавны, да шыльбдыштӱс пошкысь вӱвсӱ гыбрсялӱм ныр-вомӱдыс, быттӱ аттӱӱалӱс Кубраксӱ бур уджыс:

— Но мый, Кубрашка, лолыштӱн?

Вӱв корскӱмӱн пыркнитӱс юрнас, мынтӱдчис ныр вылас ӱш-йӱм кыз гыӱрысь. Ныв гӱгӱрвоис ас ногыс: «Эг на, Аннуш...»

— Ак тэ, китрöван!— серöктіс ныв да вöжжи помсö гаровтіс додь нырас.— Тэ көть кыз, а ме муна!— и кокныдика мө-дөдчис водзö. Төдö Аннуш: вежöра вöлыслы оз ков торъя индöд...

Выль, 1941 во

...Обед водзын мудзöм йöз сьöрсьөн-бöрсьөн петалисны жара ыпъялысь бипур дорö. Ак и лöсьыд жö лым пиын уялöм бöрад сулалыштны шоныдөн койысь би дорад! Жарыс здукөн нюлас-косьтас көтасьöм паськөмтö. Сöмын удит бергавны, майбыр.

Эм биыдлөн сэтшöм сям. Код төдас мыйла, но сы дорын мортыд пыр жö гычалö-лөнью... Оз кыв сёрни-басни, сöмын сотчысь пулөн кокниа трачкөдчöм шы торкышталö бипурдорса чöвлунсö. Кашөгтас кодкö, мыжа синъясөн чукөртыштас сапөг нырнас öгыр помъяс да бөр лөняс, быттьö вугыртас...

— Но мый, зимогоръяс,— ылісянь на шыасис би дорын су-лалысьяс дорö вöрса мастер.— Коді көсйö, някыльтö, мыйөн озырöсь. Пажнайтанныд-лолыштанныд да масьявтöг чукөртöй уджалан көлуйнытö. Талун кезлö шуам шабаш. Ставöнлы гөгөр-воана, господа-товарищи?

— А плант-тö нö, Ник-к-анорыч, код вылö öш-ш-öдам? Гаш-кö, к-кути-м-м-мутиыс вылö да?— «сярöбтіс» Шешыв Иван.— К-кылан, Н-н-ник-анорыч!

— А вай тэ вылö и öшöдам, Ваньö. Тэ тай со кутшöм мастер сёрни вылад, вот и воөдчан öти кывйö кути-мутиыскöд. Гашкö, и отсаласны плантö тыртны. А ми талун Выль восö тэтöгъя нин кызкö, Ен да бур йöз отсөгөн...— шпыньмунліс вöрса мастер.

А öд збыль, вунöма уджалысьясыдлөн, дзикöдз вушйöма ве-жöрсьыныс, мый көнкö свет вылас эм на сэтшöм праздник, кор поэö нем жалиттöг кольны бөрö, важас, став төрмөмасö да мустöмсö, пöсь петмөн сывны-гажөдчыны, нимöдны матыст-чысь Выль во...

Выль во... 1941 во. Мыйөн чуймөдан, гажөн ли шөгөн могмө-дан водзö вылö лача кутысь войтырös? Воöмыд тай: ставнад сөстөм на, пузчужöм кага кодь. Абу тай ылалöмыд...

Гоз-мöдысь нин öдзöсö торкөдчисны:

— Дыр на, Дуня, кутан сэнi легны?— дөзмöм гөлөсөн юасьö-ны ортсысянь.— Лэдз нин вай, дзикöдз öд кынман тані виччы-сигад...

Дуня, нывъяс пөвстын медея төлка кужысь-пöжасьысь, бөръя-ысь видзöдліс сёян-юанён тыр пызан вылö да дөвöля ыкнитіс:

— Тыдалö, ставыс лючки-ладнö.

Мыйыс сöмын абу пызан вылас: и сёла шыдыд, и тшытшöм капуста, весиг сола тшак нök пиын волялö... Видзөдтö, и блин пöжалöма — джуджыд стопаөн лөсталö выйнас пызан шöрын. Тöрыт фуражиръяс сьöрысь сиктса ыстөмаöсь татшöм озыр снөдсьö, мед ныв-пияныс көть Выль во паныданас чөсмасьыш-тасны пөттөдз.

— Но, пырöй, коды абу дыш!— горөдіс Дуня да водзвыв вешйыштіс бокö. Код төдас, мый налөн, кикимераяслөн, юра-ныс...

— Ой, нывъяс!.. Кутöй менö...— джöмдiс медводдза пырысь-ыс. Бөръясыс зырисны водзлань.

— Вешйышт, Дося, сет пызан вывсö видзöдлыны!..

И ыззöм войтыр осьса вомöн кынмисны места выланис:

— Ок, и мастерича тэ, Дуня!..

— Мый нö, тадз и кутанныд синъяснаныд панясьны-чеплясьны? Марш пөрчысьны!— гөрдöдыштiс татшöм ошкöм вылö велавтöм ныв.— Верма на öд и рöздумайтны.

Оз тай ков мöдысь корöм. Сявмунiсны пызан сайö пышкай чукөрөн. Номсасъыштiсны первой пötöсöдз:

— Дунь, а эсiйö нö, курыдыд? Эз на пактав...— шыасис кодкö нывъяс пöвстысь да чöвтлiс синъяссö пач костлань.

Спиртсö ыстöмаöсь вöрса кантораысь козин пыдди. Такöд тшöтш быдөнлы вичмöдöмаöсь «Казбек» кык пачкаөн. Табактö нывъяс луннас на сетiсны орчча баракын олысь зонъяслы: ми-янлы пö та ыджа чассöбид дзик нинöмла. Спиртсö на юкыштiсны накöд и.

— Эк, жаль, часыд абу! Он и тöд, кор Виль воыс тоньгас. Бур йöз, көнкö, во всю Ивановскую нин гажъялöны, а ми танi сыпирт доз дорын жöдзам.

— Но, нывъяс, вай кыпöдамöй! Чур, юöны ставөн! И мед воыс тайö лоас нöшта на шудаөн воддзасяыс. Виль воён, пöд-ругаяс, виль шудөн!..

...Этша и колö 15—16 арöсаясыдлы! Юыштöм бöрад ыпкöмөн пузис том вирныс, юмов руөн кайис юраныс... И горöдiсны сывны.

Сöстöм, мыла гөлöсъяс, быттьö вöрса ёлын жургысь ва: то кыпавласны, дзенöбтасны вылiас да сэсса исколөн вошласны керка сынöдын. Сöмын тай мыйыскö сывсьö том аныасыдөн пырджык шог сыланкывъяс...

По До-о-ну гуляет,
По До-о-ну гуляет,
По Дону гуляет
Казак молодой...

Кодкö сылысьяс пиысь век жö казялö тайöс:

— Нылукъяс, кодöс нö танi кольöдам! Энлöй вай лöвтныд! Ноко, тайöс босьтлам...

Эн тэ, Васё, юртö гыжъяв,
Эн на бара ныртö көр,
Аддзан, пувсö öтнам вота,
Босьт да верös сайö кор!

Со тай, майбыр, көн гажыд лытайтöма!..

Йöктö керка,
Йöктö пач,
Йöктö и галанка.
Ме тай мамлөн öтка ныв,
Чистöй кулиганка!

— Кывзöй, нывъяс! Мый татшöм озыр пызанлы да зрасö сулавны? Вай жö Öрття Машанымös босьтамö да öнi жö верös

сайö сетам Тима Пашö саяд! А мый,— öзйöны тайöс шуысылöн синъясыс, быттьö дзик сы моз и лоас,— Павелыд тай синсö оз и кежöдлы Марья вывсыд, век сыланьö чатöртчöма...

А сэсса гажмöм нывъяс кажнöйлы корсисны-бöрйисны пöв. Сöмын Аннаöс эз вöрзöдны, тöдöны, мый Кольö кындзиыс, мед и шмонитöм ради, сылы некод оз ков. Вöліс кö эськö Микулыд тані, вöрас, эз эськö мын Анна тешитчöмсыд. Но кор зонмыс кöнкö бокын (Кольöös буретш вöлі ыстöмны велöдчыны трактористö), эз серавны. Öттшöтшъяслöн бокын олöмыд сал-дательм кодъ жö.

Оз тай ков унаыс гаровтны мустöминикъясöс. Тутш-тотш кодкö вöчис нывъяслы öдзöсö, и мыччысисны суседъясыс. Зон ватагаön юрнуöдыс Сергейлөн пельпом саяс гудöк лётъялö, мукöд пырысыслöн кианыс кодлы мый шедöма, вайöны аскöдыс.

— Позьö оз, нывъяс?— шыасис Сергей да кузя паськöдіс-няжöбтіс гудöк мексö.

— Позьöыд тай öдзöс мöдарас йöжгылясьö, помка корсьö. Но тарыт, он кö быттьö ёнасö тэрмасьöй, верманныд стен долыс сулыштны,— ярскöба на и вочааліс Таля.

— А м-ми öд эг п-п-рöста сідз в-воій, а н-н-еыджыд сюрпри-зөн!— пычиктіс Иван.— В-в-вернö, зонъяс?

Мöдъясыс эскöдана гогйöдлöны юрнаныс:

— Вернö, вернö, кыз нö сюрпризтöгыд. Так штö эн ышнясьöй, донаяс, лэдзöй, пока дöбелыки эг лөгасьöй...

Дуня матыстчис Сергей дорö, кутчысис мöдыслы сойбордъяс:

— Гудöкасысьтö ме бы коли гажыс вылö, а вот тикöд, ки-подтуйтöмаясыдкöд, ог тöд, мый и керны...

— М-мый керны?! А н-н-окö, Сергунь, ч-ч-ашöбтлы!

Нярскöбтіс гудöк шы, юрöбтіс вынийöра гөлöс...

Здук кежлö пуксьылöм чöv-лөнсьö торкис вашöктöм:

— Ваньö! Тайö тэ?

— В-в-ылынакодъ б-босьтс-с-ис,— лэдзис синъяссö мöдыс да кежыштіс боклань.

— Да мый нö тайö керсьö... Дося!.. Маша!.. Вешйыштöй пыдіас, аддзанныд öд, шойччөг колö мудзöм мортыслы!

— *Поштатö Койгортсянь Гриваöдз новлöдлі. Войнаöдзыг на... Дас нель арöса нывка... Кутшöм стрась вой шөрнаг вөрöдыс мунны...*

— *Эн öд, кöнкö, подöн ветлöдлы, Марья тьöт?*

— *Мед кöть и эг, но страшнö, не гай госпоги! Менам паметын на, Зимовкалагорсянь воысь мортöс виöмаöсь вöлі нянь буханка вöсна, а тан, частö геньгатö новлöдлан да... Тöвнаг кöинъяс омьявлöны бöрсяныыг. А повзьöм вöлыг кö босьтас да вожъяс костсьыг песолтчас!..*

Долыд юөр

...Март пом. Тувсовъя небыд поводдяыд ёна вежö удж көртö. Ышмалысь шонді палялö-садьмö тövбыдъя ойбыралöмысь. Ко-дакостіön жугалöны-нейдöны вöрса туйяс, сөніксялöны пос-ныдык шоръяс. Со тай кöні вossö наказанньö Божöйыд!

...Уль лым пиын, быттö налькйын, вийсьöны-нöйтчöны төв-быдөн мудзём-укшальмём вөвъяс, петöны бөръя эбөссьыныс, дойдалöны йöзöс да асьныс доймалöны татшём слöйтём уджсьыд. Дерт, оз содты вынтö коньöръяслы ни ньöрийөн кульём, ни пöсь синва сор тшöктём-корём. Оз нин кывлы рытьяснад вөр баракын гажа сёрни. Мудзём йöзыдлөн сöмын öти, юртö розьöдана мöвп: воöдчыны узылан местаöдз да эбöстөг усьны-пөрны кöдзыд вольпасьö, сыркмунны сьöкыд унмөн, медем водз асывсö некор косьмывтём паськёмөн бара суклясьны ва пиын, сөн орьясътöдз тыртны, верман кöть он, проклятöй план...

Эм на, тыдалö, көнкö да кодкö морттö дöзьöритысьыд! Талун, наряд сетигөн, вөр мастер пыригмозыс нин шуис:

— Но, зимогоръяс, менам талун эм кык юör: öтиыс бур, а мöдыс нöшта на бурджык! Кодсяньыс заводитам?

Йöзыд быдсөн гажмыштисны тайö кывъяссьыс:

— Бурджыксö чöсмасьём вылас коль, Никанорыч, мавтас вылас...

— Да öд кыкнанныс чöскыдöсь, кодсö кöть эн босьт...

— Т-тэ, Н-н-канорыч, либö в-в-исьтав мый öбеш-шайтін,— волокуша ныр вылын пукалысь Иван дуллялыштис гартём самокруткасö да сос пöланас чышкис табак чирйöсь вом дорсö.— Либö сет б-бур йöзыслы лабутнöя, тэрмасьтөг т-тыртны к-коймöд пятилеткалаысь п-плансö...

— Но и Ваньö, но и стакановеч!— ызъялісны гөгөр.— Дась мусюрсö бертны! Гачтö кöть вöжжи помнас шыркөтшав, воштан мыръяс костас!..

— Но, öти юöрыс буретш тэныд, Иван,— чышкыштис серамсьыс чепöстчём синвасö мастер.— Заготпланыд, тэ кодь молодечьяс отсөгөн, лои тыртöма. Тайö раз. Мöд-кö...— лэптис кисö да корис лөнныштлыны шызьём йöзöс дядьö.— Мöд-кö, воан субöтаö ставнытö лэдзасны гортаныд, медем воан төвнас... Выхьынъясөн...

Мый тан вöчсис татшём кывъяс бöрад! Нывъяслөн чилзём-горзöмысь орччөн сулалысь вөвъяс повзьёмнысла звиркнитисны боклань, кытчö коді вевъяліс... Додь ныр вылын пукалысь Ваньö, быттö лыйём рака, кияссö паськыда шевкнитёмөн шняпурмуніс кок ув геженьö.

— Ура-а-а, гычöдны Шешывös, миянсьыным стакановечös!..— уськөдчисны ышмём ёртъясыс мачавны шай-паймунём зонмös.— И-и-и раз, и-и-и два...

Эз тай вермыны кутны ки-кокөн пыксьысь морттö да талун вылö мöдысь (абу часлив, мый кöть шу!) уськөдісны Ваньös няйт лым пиö...

Кор воö тулыс — лымйыс сылö,
И луныс лоö шоныд зэв...
Тэ видзöдлы лöз енэж вылö,
А бöрас аддзан лымтём вевт.

И гөгөр ставыс мича, дона,
Кор аддзан первой вижьюр чвет.
Мем тулыс кажитчö зэв ёна,
Кöть небыд турун эз на пет.

А бѳрас — ода кора тѳлысь,
И сиктын гѳгѳр еджыд рѳм!
Тан дзоридзалѳ льѳм да пельсь.
И менам еджыдик дѳрѳм.

Чугаева Аня, 15 ар.

Анналѳн внучка.

Караванка

...Во кызъ сайын мамѳлы, ловъя на вѳліс мортыс, мойвиис лыдгыны Иван Тороповлысь повесьт, кѳні том йѳз кылѳгчѳны пурьясѳн. Лыдгыштас неуна, лѳптас ѳчкисѳ плешаньыс да ме дорѳ шыасяс:

— А ѳг кутшѳм тѳгѳмлунѳн мортыс гижѳма, лыдгян да быттьѳ ачыг плот вылас кывтан.


Меным, том мортыдлы, кызкѳ веськодъ быттьѳ вѳлі, мый йылысь мунѳ сѳрниыс, но век жѳ ѳттор-мѳгтор юала прѳста сѳгз, басни рагыс:

— А тѳ нѳ, мамѳ, кытысь верман тѳдны, мый ставыс сѳгз ног и вѳлі? Гижныг позьѳ ѳг и кос берег вылын пукалѳг. Но мед, шуам, Тороповыг... Кыззи гижѳ книга водзкывъяс, ачыс пуртѳ кылѳглѳма, ас пырыс нулѳма тайѳс. А тѳ сѳтчѳ кутшѳм бокѳн касайтчан?

— Эж, Кольчик, Кольчик! (Нѳм помѳгзыс Кольчикѳн и шуліс менѳ, поконича). А ѳг ме ачым на плот вылаг кылѳгчывлі.

— Тѳ жѳ шулін, мый МТС-аг трактористкаѳн уджавлѳмыг. Кор нѳ ставсѳ удитін?

— Но, трактористнаг (сѳгзи пыр и шуліс — «тракторист») война дырйиыг вѳлі, а сыѳгз удиті и пур кылѳгны. Ме весиг тѳда сѳтшѳм места, кѳні пурйыг, быттьѳ чой улѳ дагъ, ю



горувсѳ ыджыг ѳгѳн исквѳтѳ-тюрѳ. Гривасяньыг абу ѳна ылын, Зимовкаа—Пѳгза костын... А гашкѳ, и неуна мѳглаынджык, сы мында каг бѳраг мыйяскѳ вушйыштѳма жѳ паметъысь... Гажтѳм

сійӱ местаыс, пуртӱ чагйӱс моз ӱтар-мӱдарӱ нӱйтӱ, сійӱс и видзӱд, мег эз резыӱд...

— Но и кыз, вайӱдӱнныг пуръястӱ местаӱдзыс?

Мам ньюмъёвтіс:

— Вайӱдӱм, эг тай бара и ньӱмдӱй. Запаньса начальствоыг весиг премируйтӱс аслысикас премияӱн. ӱні на ог гӱгӱрво, мый вӱсна. Сӱмын тай шуисны, пуксьӱдам пӱ пароход выӱ тӱянӱс, сили-голиӱс, грекыс ылӱджык. Буретш пӱ лӱсьӱдчӱма катны вывлань. Баруньяс моз и кайим мича пароходнаг. Нимыс тай... Бытьӱ нарӱшнӱ бӱрйӱма — «Коми колхозник». А гашкӱ, и «Бородино»... Кык пароход тай сӱтшӱмыс ветлӱдліс-а... Сійӱн и шлопӱдӱм-воим Гриваӱдзыг...

«Ак, мустӱм война, мый нӱ вӱчин тӱ йӱзыскӱд...»

— Мужичӱйлы выӱ кучкӱмыс вӱлӱм лӱсьӱдчӱма... со мый вӱсна удитӱн горӱдны, ныланӱй...

(«А зори здесь тихие...»)

...Девьята пекнича лун. Карлам Гриша вокъясыскӱд, Митрейкӱд да Пилякӱд, лунтыр нин ноксьӱны юкмӱс юрӱн. Дзикӱдз нӱйдӱма-кӱрӱшитчӱма срубйыс, быдсӱн боквыв нӱрӱма. Бытьӱ ӱд нӱйды, оз и шуравлы вӱдитчӱмысла да. Видзӱдтӱ, мый кузя юктасян вор дӱтшвидзӱ юкмӱс пӱлӱныс!

Колкозыд торйӱдӱма вӱр да тшӱктӱма вок сикаслы ладмӱдыштны юкмӱссӱ. ӱттшӱтш пӱ и выӱ вор тшапъянныд-перъянныд. Вокъясыдлы черӱн лӱсасьӱмыд чачаӱн ворсӱм кодъ. Батьыс, Карлам ӱльӱш, томысянныс пу дорад мастер, и пияныскӱд путь-луннас юксьӱма, абу дышӱдчӱма.

Сӱмын висьӱдчыштавны тай кутӱс пӱрыс мортыд, оз нин чернад пудьяс. Со и ӱні бокрын вутралӱ-гожъялӱ шондӱ водзас да гежӱдика индыштавлӱ уджалысыяслы неыджыд нелючкияс выӱ:

— Пиля, чер йывтӱ нӱ мый выӱ сетӱма?— быдсӱн пескыльтчылас места вылас.— Отсышт керсӱ бергӱдны, мать вою ети...

Вокъяс сӱмын серӱктыштлӱны ас костаныс батьыслӱн «етиясьӱм» выӱ. Велалӱмаӱс нин пӱрысылӱн желъ кодъ карактерыс дорӱ да...

— ...Ак-тӱ, сӱтаныд, мый ӱд керӱ, сӱ мокасыт!— этша эз горӱд ӱльӱксей дядъ.— Кодӱ нӱ татшӱм ног балуйтлӱ вӱвнас! Митрей, Гриша!

Туй кузя напасьӱн, бус-тшын, тӱвзис верзьӱма.

Гриша сатшкис черсӱ кер помӱ да ки увтӱыс видзӱдліс гӱнитысьлань:

— Босыт да тӱдмав бара бус писыд. Энлы, энлы... абу кӱ нарочнӱйды? Картуз модаыс тай дзик сыӱн... Сійӱ!— гажмыштіс быдсӱн мортыд.— Сумкаыс со бокас бротьялӱ и.

Вокъяс дась стрӱкаӱн пуксисны тшынасыштны. Батьныс эськӱ перйыліс жӱ калянсӱ, тотшкӱдыштӱс чурка дорышӱ, да мыйлакӱ бӱр суйис. Чӱвтліс синъяссӱ пияныс выӱ, кашӱктӱс да верзьӱмалы бӱрвыв видзӱдӱг шыасис пияныс дорӱ:

— Со мый, вокъяс, ме шуа. Нӱӱти эз мен глянитчы сикт кузя татшӱма грыма-громакыӱмыд. Мый кӱть эн шу, абу лючки

сьолөм вылын. Тэ, Пиля, медтом, вай эн дышөдчы, кайлы сель-
сөветөдзис, сутш, тыдалө, мыйкө лоёма. Кылан, Филипп?

— Кыла, батьö, абу на тай дзик пельтөм.

Зон чеччис, сапөг петаас кусөдіс помавтөм чигаркасö да ин-
діс чер вылас:

— Ог нин пырав гортö. Думыштанныд кө мунны, суюыштöй
струментсö пес вевт улö, йöз синмысь ылөджык...

— Ачыд мунігмозыд и меститан,— нарадитіс батысь.— Öт-
тшөтш и висьталан Парасьяыдлы, мед чаг-ёгнас пывсянсö
дзужнитас. Мыссянныд удж бөрад вок сикас. Праздник вечерня
век жö...

Оз, оз кажитчы Анналы татшөм уджыд. Иван, ыджыдджык
вокыс, лунтыр собалөма ёртыскөд вадорын, чери тывъялөма.
Ыджыд туис тыр со вайөма карас-кельчитö. Вайны вайөма, а
кекшуйтчыны пипу кор карасыдкөд зонлы дыш, корсьөма мог
да уйкнитөма гортсьыс. Со и пукалөны кык чой, муртса оз
бөрдны чери дорад. Анналөн ни Лизалөн оз лыб ловныс керны
легысь черитö. Босьтласны жö эськө кианыс пессьысь ловтö,
да чилөстөмөн бөр шыбитасны.

— Батьö, мый нö чериыскөд вöчны?— няргöны нывъяс.

— А ті видлөй лешакъясöс ва пиын водзвыв пöдтыны,— эс-
көдана чужөмөн шыасьö Семён.— Иваныд тай сідз вöчлө-а.

Лиза дась нин: кодакостіөн жöч тазйö ызнитіс ва да вайис
пызан вылө. Батысь муртса эз сьөмды серамысла:

— Ой! Вай вешйöй син водзысь, чиркованна гоз!

Жарыс вöсна ван осьса өдзөсö нем виччысьтөг, бок ногөн,
пырис Микулай. Воськовтіс водзлань да мазутөсь кинас ньöж-
мыда чөвтис юр вывсьыс рудов сера картузсö:

— Семён дядь... ВОЙНА...

...Дозмуклөн кропкысьөм шы панийис-веніс бабалысь кузя
ойöstөм...

— Тэ нö мый, зонмө... кутшөм война?— ру пиын моз кывсис
Анналы батыслөн шөпкана гөлөсыс.— Кольö, тэ шмонитан,
пиук! Сідз өд? Висьтав вай, мый шмонитан...— корис нисьö
тшөктіс шуны колана кывъяссö здукөн пöрысьмөм морт...

Зон матыстчис нывлань, шытөг сулалыштис, шылькнитіс Ан-
налысь кисö да бергөдчис мужичöйлань:

— Збыль, Семён дядь. Нарочнöй кабала вайөма. МТС-өдз
быдсөн воліс, корис йөзöс чукөртчыны митинг вылө.

— Öні нö кодарö сетчан?— палялыштис Семён.— Гортла-
нныд?

Зон довкнитіс юрнас да вөрзис петны:

— Мам-батьлы колö юөртны, оз на жö, көнкö, тöдны. Да и
суседъяслы юөрта митинг йывсьыд.

— Коля, энлы, ме тэкөд,— чеччис Анна, пач дор лабич выв-
сьыс кватитіс чышъянсö да порог сайсянь нин горөдіс:— Ме
регыд, Лизук!

Код төдас, мыйла эськө Лизалы, а эз батыслы вичмыны
эскөдана кывъясыс. Код төдас...

*...Октябр төлысь. Керкаын уна йөз. Бөргöны. Мужичöй (сійö
вөлөм менам батьöй) босьтіс менö ки вылас, качөдліс, топөдліс*

ас бердас, а ме пышъяла сыысь, дзебсяся... Сэсся мамö сетіс сылы еджыд дöра. Запанна вылын сійö гартовтіс коксö еджыд дöранас, босьтіс киас котомка да петіс керкаысь...

Кольöдiм сійöс Яклев поскөдз. Сэні зэв уна йöз нин вöлі: сыйöны, йöктöны, бöрдöны. Батьö ёна йöктіс. Пос вылас сэсся и шуис мамöлы: «Бергöдчы гортö, көть кытчöдз эн мун, век жö ковмас янсöдчыны... Челядьыдкөд бура ов, ме тэныд коля көкъямыс арöса көзяинöс, көкъямыс төлысья көзяйкаöс, нель арöса помощникöс да сизимдас сизим арöса стöрöжöс. Муысь чужлім, муö и мунам».

Менам паметьö тайö кывъясыс и колисны. Öкмыс төлысь мысти воис похоронка. Бать кувсьöма госпитальын, Волгоградской областын...

(Дина Александровналöн висьталöм серти).

Пöвестка

Гезыйд пö тай куим пратя... Куим кыв: война, мобилизация, похоронка — джагтöрöдөн шамыртісны сикттö. Квайтöд төлысь нин кульöны-нöйтöны йöзсö олöм гезлөн сира пратъясыс...

Асывбыд нин майшöдлö Öграöс, Колялысь мамсö. Тöрыт, пемдандорыс нин, пыраліс суседкаыс да юөртіс, сельсöветö пö воöма тайö төлысь вылö мöд мобилизационнöй список нин. Кодъяс сэтчö веськалöмаöсь, эз куж висьтавыны, вой вылö видзöдöмөн абу на пö разьöмаöсь.

Көть и тöдö Öгра, мый Микулай писö оз босьтны фронт вылад (трактор вылын уджалысьяслы сетöмаöсь бронь), но талун, код тöдас мыйла, ёнтышталö мортыдлысь сьölöмсö.

Öбед кад. Микулай мыськис кияссö да думыштчöмөн сулалыштіс рөмпöштан водзын. Мамыс тайöс пыр и казяліс:

— Пуксы нин, шыдыд көдзалас.

Мöдыс быдсөн дрöгмунліс видзчысьтöмысла. Öшöдіс ки чышкөдсö тув йылö да пуксис пызан сайö.

— ...Тэ, Колюш, мöдысь вылö аскöдыд босьт нянь тубрастö,— панясысь зон дорö шыасис мамыс да ышловзис.— Места вылад ладнöджык лоас öбэтэйтнытö. Та кузя вöлөк вуджöмөн сöмын кадсö воштан, шойччөг пыдди.

— Ме, мамö, пöсь шыдтö мукöд моз ог на веж шойччөг вылад...— том морт ырситіс-юис кизьöр коляссö веськыда тасьті помсыс.— По крайни мере, талун.

— Сідз эськö, пиук, сідз, пöсь сёяныд гыркыдлы лясöдджык. Сöмын ветлöдлöмыд тай асьтö лешöм кодъ. Вай нöшта чöвта!— уськөдчис тасьтіысла Öгра, но Коля öлөданаа лэптыліс кисö да чеччис пызан сайысь. Чуньяснас шыльöдыштіс посни чикыля юрсисö (дзик батыслөн кодъ!) да пасьтасигмозыс нин шыасис:

— Мамö, батьыд нö көн талун, оз тай тыдав? Аддзöдлыны коліс мунтöдз.

— А тэ лөссьыд видзöдлы, сэні тай асывбыд gryмакыліс. Тыдалö, кыйсян көлуйсö лэдзалö. Кыйкнитлы петігмозыд, эн дышöдчы. Висьтав, сэн на кө, мед пыралас да някылясьыштас.

— Аддза кө, шыасьла,— эскöдіс мамсö Коля да петіс.

— Слабог, ставыс на, тыдалö, Колялөн лючки-ладнö,— такö-

дыштис асьсö Öгра да пуксис пызан помö.— Бур, мый воліс гортöдз. А то думайт рытывбыд...

Быгльöдыштис чунь улас нянь чиръяс, быттö ворсöдчис крöшкияснас. Чöвтліс синсö пызан помас кольöм дозмук вылö:

— Но, лешак, дзикöдз тай ылалі Öграпенайс!— асьсö кöри-тыштис нывбаба.— Кора мортöс панясьны, а аслам...— босьтис пызан вивсьыс куш тасьтисö, и казяліс сы улысь мичаника ку-сыннётм бумага.— О, Господьö, мый нö тайö?— босьтис киас кабалаторсö. Матыстчис öшинь югыдлань, кутис лыддьыны: «Чугаев... Ни-ко-лай Е-го-рович...» Видзöдліс помас: «Во-енный комиссар...» Энлы,— дугöдчис лыддьöмысь Öгра.— Да öд тайö... Коля?.. Егоровичыс-тö!? «Вам предписано явиться...»

— А-а-а-а!!! Колюкöй!!!— поткöдіс керка сынöдсö вир-яй кöдзöдана горöдöм...

Кольöд, муса нылöй...

...Мельнича дор. Кольöдчысьяс, унджыкыс том йöз (пöрысь-ясыды кöдзыднад делö воöдчыны та ылнаöсö) бөръяысь сывъясьöны фронт вылö мунысьяскöд. Бөрö колисны сійö лунъясыд, кор гудок гажөн да сьылöм-йöктöмөн кольöдлісны рекруталысьясöс, кор вöлі на ыджыд лача войналөн регыд помассьöм вылö. Öнія мунысь-кольöдчысьяслы абу нин гажöдз. Сулалöны воча, сöмын курыд синва тюрö шогалысь чужöмъяс кузяныс...

Анна тан жö, мельнича пос дорас, сулалö Колякöд йöзсянь неуна бокын, дзик пос дорас. Жмитчыштöма зон дорö да синсö лапкывтöг видзöдö тöдса чужöм вылö. Коля ки мöдарнас чышкыштис нывлысь син доръяссö да мöд кинас крепыда сывъяліс Аннушöс:

— Эн бөрд, Анюта, ставыс лоö бур. Ог öд нэм кeжлö муной.

— Тэ кöть, Колю, сэсянь, фронт вивсяньыд, эн вунöд письмöтö гижыштны.

Зон нюмъевтис:

— Да öд ми письмöөдзыд на эштам бөр воны.

— Ак тэ, бызö-больö,— мырдсор нюмъевтис Аннуш да челядьдыръя мозыс кокныдика печиктис похвальбаöс ныр кузяыс:

— Чутік-лудік...

Семён, Анналөн батыс, тані жö, кольöдчысьяскöд. Тшöктöмабсь мортыдлы аслыс лэччöдны рекрутъястö Визинöдз. Ылыс туяд, да нöшта тöвнад, быдторйыс вермас лоны вöла-доддяыдкöд, со и корöмабсь пöрысьтö тöлкыс вылö. Сулалö вöвъяс дорын да зумыша смолитö чигарка бөрся чигарка.

Ныла-зонма кутчысьöмөн матыстчисны вöвъяслань.

— Видзöдлы, Нюра, Кубракыд тан жö!— радлыштис Коля да кыпыда шутевтис.— Кубрак, Кубрак!— Вöв чатöртис юрсö да гораа гөрöктис. Том морт матыстчис, шлапöктис живöтинаöс бокöдыс:— Тöдмалін, лытай, эн на вунöд! Тэ, Кубрак, бура видз кöзаякатö, öбидаö эн сет!

— Но и бур, тöдмаліс кö,— гажмис быдсөн Семён.— А ме жугла юрöс, кодöс, мися, вöжжи дорас лэдзны. Повзясны кö вöвъясыд этатшöм зырымбедьяссьыд,— индіс кинас зонпосни-ямщиçойяс вылö,— тöлкыд лоö этша.

— Но мый, товарищи, колӱ янсӱдчыны!

Тайӱ кывъясыс лӱчӱд пуртӱн чӱлыштӱсны колльӱдчыс и муныс войтырлыс сьӱлӱмъяснысӱ.

— Колю!!!— нывлӱн кияс, быттьӱ бордъяс, сывъялісны зонмӱс, синваисла курыд вом доръяс пӱтлытӱг окалісны том чужӱм-сӱ.— Ме кута виччысьны тӱнӱ, Колю, эзысьӱй, кута виччысьны!!!

Зонморт, дӱра кодъ еджыд чужӱма, ӱн кияснас ӱддортыштӱ сыркъялыс аныӱс ас бердсьыс, кузя видзӱдӱс юрсянь кок улӱдз-ыс, быттьӱ тшупис паметяс муса, дона мыгӱрсӱ, да сӱсся кузя да пӱся, вом доръяс доймытӱдз, окыштӱс бӱрдыс Аннушӱс.

Водзын бара на кыліс стрӱга горӱдӱм:

— Тӱрмасьӱй, пехотинечьяс!

— Лӱдз, Анна, колӱ мунны, оз ӱд кутны виччысьны!— чорзӱдыштӱм гӱлӱсӱн шыасис Микулай да мынтӱдӱс сьылі гӱгӱрсъыс Аннушлыс кияссӱ. ӱти воськолӱн чеччыштӱс кӱлея вомӱн, бӱрӱ бергӱдчывтӱг, ыджыда восьлалӱмӱн матыстчис мунысьяс дорӱ.

Доддӱ пуксьытӱдз вом тырнас апыштӱс кияс гумовтӱм пушыд лым... Сувтовкерліс места вылас, пуксис додъ нырӱ да троньӱбтӱс вӱжжи кӱлысӱн: «Н-но-о, Кубрак!..»

Ылын, туй кӱлысас нин, джажнитӱс гудӱк:

Грива гӱра, гажа гӱра
Ок ылысянь тыдалӱ,
ӱкаяннӱй менам сьӱлӱм
Гривасасӱ любитӱ...

Абу тай вичмылӱма Колялы, кыз и уна мукӱд томуловлы, бӱр воны чужан гортас. Пуктӱма том ловсӱ зонмыд Аймулӱн паськыд эргъяс вылын... Сотчӱма танкын.

Бӱръя кыв пыдди

Тайӱ гижӱд бердас кутчысьтӱдз на аслым чорыда шуи: сям-ман кӱ, зонмӱ, висътышт вай сы йылыс, кыззи война кадас мырсьылӱмаӱс-уджавлӱмаӱс нывбаба-трактористкаяс. Примерыс вылӱ босъті ассъым мамӱс, Митит Аннаӱс. Ичӱтсянь нин тӱдӱ, мый мамӱ сӱки уджавлӱма кӱрт вӱв вылад, вежӱма ас кодъ нывъертъясыскӱд война вылӱ мунӱм мужичӱйясӱс. Сылӱн казъ-тылӱмъясыс тӱдӱ, кутшӱм сьӱкыд вӱлӱма тайӱ уджыс, кор важиник дӱра пӱӱ гартовтӱм кокыд чеплялӱ-кынмӱ кын кӱрт вылад, а свет вылас медчӱскыдыс — трактор радиаторын, рузум пиын пуӱм сӱсь какольлӱн кӱрыс. Кор 18—20 арӱса нывъяслы кын бӱрӱзда вӱлӱма меднебыд вольпасьӱн... Тайӱс тӱдӱг чайтсис мен, йӱй вежӱралы, мый ӱнӱ жӱ, пырысьтӱм-пыр, и гижышта та йылыс, кыз шулӱны, восьта войтырлыс синъяснысӱ збыльтор вылас. Эг тай гиж. Да и кужан-ӱ тайӱс гижны, йӱзӱн олӱм, на пыр вир-дойӱн лӱдзӱм шогтӱ?!

— *Марья тьӱт, Победа лунтӱ бура на помнитанныд?*

— *Кыз нӱ! Луныс тай лымъя вӱліс, но йӱзыд кутшӱма радлісны! Сьылӱны-йӱктӱны! Рытланъыс ӱтув пызан лӱсьӱдлісны быдсӱн...— пӱрыс нывбаба, кыззи мем чайтсис, дзебыштӱс*

синъяссö да ньöжмыда согтіс:— Но медгёна ми рагуйтчим, кор Сталиныг кулі...

— Тi төдінныг, мый став лёкыс йöз вылас сы вöсна уси?

— Эг...— төдчис, мый олома ань ньöти оз ылöдлы.— Эг төдöй, но мыйлакö ёна жö и рагуйтчим... А кор колхозъястö öт-лаöдiсны «Маленков» колхозаг...

Тан ме неуна торкышті Маша тьöтöс:

— Маленковыг öг абу жö ылö мунöма...

Колö вöлі адгзывны Марья тьöтлысь синъяссö:

— Кыдзи? И Маленковыг сэтшöм вöлöма?

Мый татчö позьö нöшта содтыны, кутшöм кывъясөн төдчöдны ылі-матынъя бушкала вояссö? Сюрасны-ö сэтшöм кывъяс, мый отсөгөн верман петкөдлыны сійö кадся йöзлысь пытшкös дойсö?!

Со найö, война кадся нывбаба-трактористкаясыс, кодъяслы вичмис ас выланыс кыскыны медсьöкыд мужичöй уджыслысь курыд көрсö.

Трактористкаяс:

Матвеева Мария Михайловна

Попова Анастасия Григорьевна

Чугаева Анна Семёновна

Чугаева Евдокия Фёдоровна

Нечаева Мария Фёдоровна

Кондратьева Калиса Яковлевна

Карманова Евдокия Иринарковна

Костина Таисия Александровна

Чугаева Татьяна Егоровна — бригадир

Майбурова Мария Александровна

Майбурова Аграфена Степановна

Абих Евдокия

Шарапова Мария Евгеньевна

Шарапова Мария Семёновна

Чугаева Наталья Евгеньевна

Чугаева Фегосия Иосифовна

Пахтеева Прасковья Васильевна

Кокшарова Зоя Николаевна

Карманова Анна Михайловна

Матвеева Мария Павловна

Ушакова Мария Филипповна

Бессонова Павла Андреевна

Матвеева Евдокия Ивановна — токарь

Плугаръяс:

Чугаева Аксинья Степановна

Бессонова Зоя Андреевна

Чугаева Валентина Павловна

Майбурова Нина Фёдоровна

Чугаева Валентина Павловна

Заправщицаяс:

*Нечаева Анастасия Ивановна
Матвеева Марпида Васильевна
Истомина Мария Яковлевна
Пахтеева Раиса Васильевна
Майбурова Мария Александровна*

«Видз менӱ, талисманӱй...»

Менам том паметъын мамӱлӱн матъкӱм-вуштӱм:

— Орим, Марья! Воӱдчим тай олӱмӱдзыд, екуш-вартан... Чи-
бӱтӱ вож дорад велӱдысьыд сиктын эз ло!

Ылӱдчыштӱ мамӱ неуна, эм на, майбыр, кодлы чибӱтӱ велӱд-
ны. Зонпосни, кодӱ вӱвтӱ радейтӱ, школа бӱрын рытывбыдъясӱн
вошласъӱны вӱв картаын. Став чибӱтӱ велӱдӱмаӱсь сийӱс-кӱлуй
дорад, сӱмын ӱти дорӱ, Талисман нима вӱв дорӱ, некыдз оз си-
бавны. Видлӱмаӱсь гоз-мӱдысь доддывны, да код нӱ ас вӱляысь
сетчас торйӱдны асьсӱ дась нянь вылын олӱмысь. Статьис чи-
бӱыдлӱн — быттӱӱ изйысь кералӱма. Абу вӱв, а би! Со и чӱв-
тӱма сӱтана вылӱ синсӱ Аннаыд... Дыр думайттӱг ачыс кутчы-
сьӱма вӱвтӱ усьмиритны. Корсюрӱ Киясь Лидя тӱт гарыштӱӱ,
кыдз нӱ пӱ вермис мамыд змей кодъ вӱвсӱ пӱкӱритны!.. ӱнӱ
на со менам синъяс водзын мамлӱн лӱз сойлутшъясыс. Локтас
вӱв велӱданӱнсьыд, здыня усяс вольпасъӱ...

Пенсия вылас нин, аддзас вӱлӱ мамӱ туй кузя ротӱдысь вӱвъ-
ястӱ да, ылысянь на горӱдас: «Талисман, Талисманушка!..»

Мӱдыс пырӱн жӱ и гӱрӱктас да тӱрмасьтӱг кежалас Аннаыс
дорӱ. Курскӱдыштас ки помысь мыччӱм сакарторйӱн, педзыштас
места вылас да лӱнълас здук кезлӱ, кывзӱ анълысь сӱрнисӱ:

— Абу на тай вунӱдӱмӱд, дурмалеюшко, кӱзайкатӱ...

Мыйкӱ шӱппнитас чошъялысь пеляс, чышкыштас доршасъыс
синвасӱ да кокныдыка йӱткыштас ас дорсьыс вӱвтӱ:

— Мун, Талисманушка, мун, эзысьӱй, вӱтӱд ӱртъястӱ!..

Снимок вылын: пристань. Снимокыс авторлӱн архивысь.



Любовь АНУФРИЕВА



Олөмөй кык пельö ори...

* * *

Кымын ручка эг ньöблы:
вöлі и гöрд, и лöз,
и турунвиж рöма...
Но мыйлакö кывбуръясöй
век артмисны
гажтöмöсь...

* * *

Олөмөй быттö кык пельö ори,
и кык пöлöс öткалун
гудрасис сьöлöмам...
Медводдзаыс, кор меным
некод оз ков...
И мöдыс — кор ме
некодлы
ог ков...

* * *

Шондi чöвтiс гожся кöсынкасö
И вижöдiсны коръяс...
Му вывтi бара восьлалö ар.
А ме сiдз на эг виччысь сiйöс,—
эг удит шонтысьны
войвыв дзоридзъяс костын...

* * *

Нэриник олөмöс нуан ки вылад,
Уськöдан кö — виан...
Ставыс тэ сайын...

* * *

Тэнад руыд
 Выль воён лолалё:
 тэрмасын мичмөдны коз,
 лөсьөдан козинъяс
 выль невестаыдлы...
А ме — век на быттьө
 сьөд войыслөн чой,
Лэбала и корся асывсё...
И чайта, выль воас
 бара вуджа өтнам,
Шоныд жырйын
 кута
 кынмыны
 тэтөг...

* * *

Быд кольём во — торъя сувтланінын,
Быдөнлы көть өти сувтланіныс
 кольё вежөрас
 югуд бисерысь
 мича серпасөн.
Мөд ногөн оз овлы, өд Олөмыс
 абу век руд.
Татшөм сувтланінөн меным коли 2005-өд во.
Сэки мусаёй медводдзасысь шуис:
 «Ме радейта тэнё».

* * *

Ме эг на чуж,
А нимöй нин вöлі
Таня...
Татшөм пернапасөн
 лэби енэжсянь
И чужи...
Нимтісны Любаён.
Өні со ветлөдла
 му вывті
 и некытчö ог инась...
...А вöлі кө Таняён,
 кыдзи нö эськө
 олөмöй гөрддзасис?..
Гашкө, шудаджык вöлі...

* * *

Лымйыс тэрмасьö усьны...
Буракö, дышөдöма енэжын овны...
Буракö, оз инась шоныд кымөръяс костын
 кынмөм синва...

* * *

Радейта кыйёдны
шонді югөръяссө
рытъя стенись,
Найö вешъялöны öти инысь мөдö,
И ланьтөдöны синъясысь
чөсöдана дойсö...
...Öтка олöмыдлөн эм жö мичторыс...

* * *

Тэныд ог эскы...
И весиг тунъяс отсөгөн
изйысь тайö стенись
он жугөдлы...
Тэныд ог эскы...
А сидзкө, и радейтчөм йылысь
сёрни оз чуж...
А вöли кө мөдарö — эськө тэ
йитчин менам
лолалөмкөд...
Збыльысь, вöли кө мөдарö...
Но збыльысь, ме тэныд
ОГ ЭСКИ.

* * *

Тэ кө вöлин
менама синваён,
Эськө некор эг бөрд,—
Эськө поли
воштыны тэнö.

* * *

Му вылын могъясöс помала,
И воа Ен дорö,—
кора шойччөм
нэмъяс кежлө...

❖ ❖ ❖

Кык бана олөм

В И С Ъ Т

Тоня да Андрей сизим во нин өтлаынөсь. Гозъя быдтөны кык челядьөс. Ыджыдджыкыс, Машаыс, вит арөса, а Дималы куим.

Мишарин гозъя сиктсаяс пиысь олөны, позьö шуны, медся зумыда. Мөскаөсь, овмөсныс ыджыд. Яй выlö видзөны кук, кык порсь, курөгъяс на эмөсь и. Андрей радейтө вөралыштны, чери кыйны. Винаөн ёнасö оз ышмыв. Дерт, мудз веськөдөм ради ужнайтигас сё грамтө коркөясö пөрөдлө жö. Сиктса бабаяс асьныс весиг шуоны, праздникяс дырйиыд пö юыштөмыд абу грек.

Совхоз киссьытөдзыс Андрей тракториставліс, а мыйөн став-ыс кутіс дзугсьыны — дугдіс. Кодлы нө окота прөстатө мырсьы-ныд?

— Ме бурджык ас выlö уджала. Скөт видзам... Тшыглы ог кулөй! Лавкаысь ньобасьнысö тэнад деньга выlö кутам. Шко-латө, гашкө, оз на тупкыны,— шуаліс сійö Тонялы.— А гашкө, кытчөкө пөрөдчыны кута ветлывны. Вöрын уджавны бригадасө тай чукөртлөны. Пила-чертө кийн кутны кужышта жö.

— Ачыд төдан. Дерт, миян совхозыд оз нин, тыдалö, ловззы. Вахтанад ветлөдлігад семьясьыд көдзалан. Дай меным өтнамлы сьökыд лоö та мында скөтнас бергөдчынысö.

— Но, сідзкө, он кө лэдз гортысь бокö нажөвитчынысö, день-га мешөкнас тэ и лоан.

— Видзөдлам. Медводз колö ставсö бура төдмавны. Вахтанад ветлысьысид тай ёнасö оз жö ошйысьны ыджыд деньганад. Да и вöрын собалөмыд өд абу тракторад пукалөмыд.

— А тэ чайтан, менам кокни удж вөлі? Лунтыр тракторын, сітан гаддявтөдз зэркйыся, а меным сыысь грөшгяс чургөдасны! Быттө кутшөмкө милөстыня, дай сійөс на оз ас кадö сетны,— гөлөссö кыпөдыштис гөтырыс выlö Андрей.

— Эз эськө да, но вöрад нөшта на сьökыд лоö. Сэсся öні тэ быд лун гортын, шоныдінын сёян-юан, чистöй вольпасыын узь-лан, а вöрад татшөмыс оз ло. И нинөмла ме выlö горзыны, ме тэныд бур выlö висьтала. Мед гөгөрбок думыштін.

— Тэ выlö век кодкө горзөма,— ёнджыка нин пузис Андрей.

— Öні нө мый вөчан? Он горзы?

— А-а-а, тіянкөд, бабаяскөд, сёрнитны он вермы,— бара дөзмис Андрей да клуп-клоп петіс ывлаө.

— Вот тэкөд он вермы сёрнитны, өтарö равзö. Мыйысь и дөзмис? Ачыс заводитө, а сэсся мыйкө ме шуа да бара лөкөн лоа. Либö кызд көсйö, сідзи мед и вөчö, нинөм менсьым юась-нысö,— өтнасөн нин ропкөдчис Тоня.

Гозъя костад пö эськö быдторйыс овлö да. Коркö пинясьöны, а сэсся бурасьöны. Но быд лунтö пон да кань мозыд олігад мудзан жö. Тадзинад став радейтчöмыд чусмö. Со и Тоня да Андрей костын ыркыд кутіс лоны. Челядь, ен ськөдөн, дзоньвидзаён да кывзысьысьён быдмöны, горт гөгөр овмöсын лючки жö. Мый сэсся колö, медем шудаён асьтö кывны? Но оз на тай, вөлөм, сöмын тайö ков.

Андрей гöтырыслысь майшасьöмсö некыз эз вермы гөгөрвоны.

— Абу юысь, кöзяйственнöй, бабаяскöд ог каньяв. Мый верма — ставсö гортö вая, а сійö век ышлолалö, лов вылын пö шуштöм. Мый и колö? Гашкö, мöд мужик йылысь думайтö да? Код тöдас тайö катшасьдысь? Но удж бöрсяыс эськö некытчö жö оз ветлыв да. А колöкö, удж вылас кодкö эм... Школаас öд эм жö мужикуловыс,— броткöдчис жö сійö пес сараяс куритчиг-мозыс.

Андрей, дерт, радейтис Тонясö, сöмын ас ногыс. И вежөгтис ёна. Вежсис зонмыс öтлаасьöм бöрас. Мед эськö гöтырыс сылөн син увсьыс некытчö жö эз вошлы. Бытьö чеп йылын видзис сійöс. Сідзи и шулывліс Тоня верöсыслы: домав пö, сідзкö, дай. Некытчö ветлывны эз лэдзлы, весиг аддзывліс кö, мый кодкöдкö сёрнитö, пыр и сүйсьыліс на костö, нуöдліс гортас. Сэні нин юасяс, мыйла ськөд сёрнитіс да мый йылысь. Мукöддырйисö Тонялы кажитчис, мый верöсыс радейтöм дорсьыс ёнджыка вежөгтö. А гашкö, оз и радейт да. Мелі кывсö нэмнас нин эз шулы. А Андрей чайтліс, мый коми мужичöйыд абу мукöдыс кодъ лесът кутю. Найö мойдöны сöмын, а комиыдлөн «радей-таыс» онас öтчыдсö петалас ли оз сы дон.

Кор Тоняыс институт бöрас локтис налөн сиктö, уна мужичöй-лысь сьölöмсö вöрзьöдіс. Весиг гöтыраяслөн дульваыс войталіс. Быдöнлы, кöнкö, вöлі окота шымыртлыны вöсньыдик коскöдыс еджов юрсиа, чöдлач синма акань кодъ нылöс. Пöрысьяс тшöтш жö пиньтöм вомнас вашгьялісны, но кадтö тай он бергöд. Чужöм-сьыд чуқырыд оз молясь ни. Шудыс вөлöма сöмын Андрейлөн. Буретш сылөн лэчкö и шедіс вöсни коска аканьыс.

Андрейлы тшöкыда дум вылас усълö том велöдыськöд мед-воддза аддзысьöмыс. Со и öні, куритчансö шпуткигмоз, казтьыліс важъясö.

...Сійö сентябрыс зэра вöлі. Туйяс машина-трактор кöлесаяс-ысь вожалісны. Дженьыджык кока войтыр туй вомöнсö öдва и вермöны вöлі вуджнысö. Андрей сэки ваяліс тракторнас совхоз муяс вылысь картофель. Видзöдö, туй шöрас няйт пиас кодкö сибдöма. Öтар коксö видлас перйыны, а мöдарнас вöйö. Мужичöй серам сорөн горöдіс трактор кабинасянныс:

— Лэчкö тай шедін?

Пикö воом ныв нинöм эз куж вочавидзнысö да забеднöйсла весиг бöрддзис.

— Коді нö эськö тэнö, мокасьтöс, таті тшöктис вуджнысö? Он мöй аддзы, кöлеяыс мый джуджта?

— Да ме вылö эсійö керкасьыс кукань ыджа понйыс увтыш-тіс, повзьöмöйла и чечышті. Ачыс татчö, небось, эз вöтчы, сюсь... Тöдö, мый сибдан,— бöрдан гөлөсөн висьтасис том велöдысь.

Андрей бöрыньтліс тракторсö да видліс бокияньджык матыстчыны Тоня дорö, но эз путымы. Ковмис лапкыштны трактор-

сьыс няйт пиас да пöшти шошаöдыс кыскыны нылöс. Тонялөн көмкот пöлыс сэтчö и коли. Он öд мöд луасыны.

Тоня сэки нöшта на мичаөн кажитчис. Бöрдөм бöрад вазьöм кельдылöз синъясыс быттьö нöшта на югыдджыкөн лоины. Найö сэтшöма кыскисны ас дораныс, мый Андрей öдва вермис кутны асьсö, мед не окыштны нылöс.

— Ме тиянöс гортöдыд нуа,— вöзийис Андрей.

Ныв нинöм вочасö эз шу. Сöмын довкнитис юрнас. Көть и вöли яндзим, но көмтöгыд да коскöдыд няйтөн эз жö вöv окота петкöдчыны став сикт водзас.

— Андрей. Мишарин,— висътасис том морт.— А тi Анто-
нина. Мый овна?

— Николаевна. Дерт, тайö школаын, а тi верманныд Тоняөн шуны.

— Тоня кө и Тоня. Но, кыдзи кар бöрад сиктса олöмьд?— водзö нуöдис сёрнисö зон.

— Мичаöсь тиян местаясыс.

— Буретш. Торъя нин арся туйясөн позьö любуйтчыны,— шмонитыштис Андрей.

Тоня сэтшöма видзöдлис Андрей вылö, мöдыслы яндзим лои шмонитöмсьыс да весиг корис прöща. Неуна чöv олыштöм бöрын шыасис:

— А гожöмнас миян танi и збыльсь гажа. Мöдлапöвса видзьяс выльсь көть эн воы...

— Воим,— торкис Тоня Андрейлысь сёрнисö.— Аттьö тиянлы. Гашкö, пыраланныд чай юны?

— Мöдысь. Талун уджыс уна на.

А аслас кокыс эськö пырö нин вöли ныв ордö, да кутчысис, көть эськö и полис, мый мöдысьыс, гашкö, оз и ло.

Колис кад. Сьölöмыс Андрейлөн öзийис сы выйöдз, быттьö бикурö бензин койыштласны, но медым рытнас кежавны Тоня ордö пукыштны, чай юигмоз варовитыштны, эз лысьт. Мövпыштас кежавны, да кокас быттьö краж көрталасны, сьöктаммас восьласыс да сiдзи оз и пыр. Öтарö пырис юрас — трактористыд татшöм нылылды абу пöv. А вежон мысти вочаасисны лавкаын. Тоня вöли ньöбасьöма нин, а Андрей куритчанла локтис.

— Видза оланныд, Антонина Николаевна!

— Чолöм, Андрей! Эн и волöй чайтö юны да?

— Сiдз тай слöйыс эз и сюр на. Позьö кө, талун пырала?

— Пыралöй.

Тонялөн сьölöмыс гораджыка кутис тiпкыны. Сiйö лунсянныс и йиджис сьölöмас Андрейыс. Тшöкыда асьсö кутлис, да пыр сы йылысь думайтö. Окота эськö вöли, мед пыралас, но мортыд эз и локлы. А öнi со паныдасисны да тöдлытöг моз и артмис корöмыс. Быттьö эз ачыс сёрнит. Тоня котөрөн мунис гортас. Лолыс топавлис, первойөн зонмöс корис да. Таöдзсö сiйö некор на татшöм смелнас эз вöv. А мый эськö сэтшöмыс? Корис кө? Гортас воём бöрас сiйö пыр босытчис блин пöжавны, он öд кушнас чайтö дуньгы.

Гöсьт воис рытладорыс. Дзик жöник кодь. Мичаа пасьтасьöма, кыскö астраяс да георгинъяс нетшкöма. Сэки арыс эз кöдзыд вöv да клумбаясыс эз на кынмавыны. Киас кампет көрöбка на и.

— Пройдитой,— кызкө зэв нин лөня артмис Тонялөн.

Андрей чужйыштіс коксыс көмкөтсө, сэсса лөсьыда сувтөдіс сійөс порог дорас да лажъялана матыстчис пызан дорө.

— Чолөмала тіянөс ас нянь вылө петөмөн!— чургөдіс сійө дзоридзьяссө да кампет көрөбкасө.

— Аттьө. Пуксьой.

Ныла-зонма эз төдны, кытчө асьнысө инавны. Көть вөлі дзик пыр бергөдчы.

— Тайө жырсө удж вывсыньыд сетісны?

Юалөмыс аслыс Андрейлы эськө дзик йөйкодьөн кажитчис, но сэсса нинөм юрас эз во.

— Да... Меным өтнамлы шогмас.

— Абу, дерт, карса патера.

— Карад, гашкө и, татшөмсө эз сетны.

— М-м-м. А ті он каитчөй сиктө локтөмысь?

— Ме өд сиктын жө чужлі. Карас сөмын велөдчи. Ме сэтчө, веськыда кө, вужъясьнысө эг и удит.

— А мыйла чужан сиктад эн мунөй?

— Сэтөн велөдысьясыс оз ковны. Да лолөй мыйлакө сэтчө оз и кыскы. Ставыс нин сэн төдса. А йөзад пө, школаын велөдысьөй на шуліс, ставныс овнад ыдждөдлыны кутасны. Ас гортад Тоняөн и колян, көть и велөдысь. Буретш тайө и ышөдіс бокиас муннысө.

— А ме со бать-мам гортысь некытчө эг и мун. Тані школа помалі, училище бөрын гортө жө и локті. Кыдзи шуласны тай, где пө родился, там и пригодился.

— Быдөн ачыс ассьыс ордымсө талялө. Но вай чайтө юам. Пузис нин. Ті чайтө крепыдөс юанныд али онө?

— Дзик чипир оз ков,— зон көсйис эськө водзө шмонитыштны, но эз нин сэсса.— Кутшөмөс кысьтанныд, сэтшөмөс и юа.

Блинөн чай юигмоз ныла-зонма варовитісны дженьыда, кызкө быттьө төдтөмөсь на вөліны да, сёрниыслөн гез помыс эз сюр. Мыйкө институтас велөдчөм йывсьыс и висьтасьыштіс Тоня. А Андрейлы и дзик нинөм висьтавынсьө, оз өд трактор йывсьыс кут большыны. Нылыдлы тайө абу интереснө.

Тайө рытсыньыс сэсса и гөрддзасис радейтчөмыс. Лунысьлун Андрей смелджыка асьсө кутіс. Тоня эз жө өтдортчы дай. Андрей сылы кажитчис жө. Смоль съөд юрсиа, кузь туша, мугыд яя, шмонитны радейтысь коми зонмыд өдйө и йиджис ныв сьөлөмө. Ар-төвсө сідз колясьыштісны, а гожөмнас нин көлысь ворсісны. Регыд том гозъялөн чужис ныв. Нимтісны верөсыслөн мам кузяыс. А кык во мысти чужис и пи, дзик жө батьыс кодь сьөдіник, быттьө чиган доддысь усьөма.

Гозъя олісны өтвыв, радейтісны өта-мөднысө. Челядьныс быдмисны шаньөсь, вежавидзысьөсь. Но бөръя кадас гозъя костө быттьө пон да кань гөн шыбитісны. Нинөм абусьыс пинясьөны. Со и өні удж понда венө воисны.

Андрей тшөкыда майшасис, Тоняыслөн сьөлөмыс, гашкө пө, эз и небзыв сы дорө да. Быттьө аттьөалөма лои няйт пиысь мездөмсьыс, сійөн өтлаасис ськөд. Но, мөдарө кө, эз өд аминь ыджыд шогысь мезды нылөс... Сэсса өд, мустөм кө вөлі, верөс саяд эз жө пет, а челядь на со чужтісны да... И ас кодыс уна-

өн сиктас өні на кодсюрө вежалө зонлөн шуд вылас. Гөгөрвоис эськө ставсө Андрей, но сьөлөмыс мыйлакө пессис.

А тшөкыда пинясьөмыс, тыдалө, зыртис морөссө. Бөрыннас эськө и каитчө вөлі горзөмсьыс, но он нин тай бөр бергөд. Нөшта на и сиктын кызвын мужичөйыс, сэтшөм оломыс пуксис да, бабаяслөн вомө пондісны видзөдны, да сійө пессьөдіс. Совхоз бырөм бөрад унаөн уджтөг колисны. Мукөдыслы, гашкө и, веськодь, а Андрейлы вөлі яндзим гөтыр да челядь водзас. Баба деньга нажөвитө, а сійө куш зептөн лөтъялө. Со лөкыс и ылык-нитлавліс.

А Тонялы вөлі зэв забеднө верөсылөн горзөмысь. Көть сійө и төдіс жө помкасө, но та выйөдз кратайтчөмсьыс да быд нинөм абусьыс пузьөмсьыс? Полис Тоня и сыысь, мед эськө верөсыс эз юсы. Од кымынөн нин шогнысө винаөн пальөдоны. Вина гагйыдлы гыж улас од веськавнытө кокныд, бөрсө этшаөн бергөдчөны. Олома войтырыс тай шензөны, водзынсө пө быдөн жө юлісны, а вежөрсө некод эз воштыв. Тайө пө мыйкө винаас, тыдалө, пуктөны, мед йөзыс өвсьынысө эз вермыны. Кодөс эн чайтлы, весиг найө оз палявлыны.

Тоня зілис ладмөдчыны, такөдны верөссө, но мөдыслы тайө кажитчис жалитөмөн. Мужик пө ме али абу? Баба бөждорө пө синва ог жө кут косөдны! А Тонялы верөсылөн вежсьөмсьыс нөшта на лөк. Унаысь войяснас гусьөникөн, мед некод эз адззыв ни эз кыв, юрлөссө көтөдіс. Андрей жө гөтырыслысь синва доршасьөмсө думайтис кутшөмкө сьөлөм косьтысь пондаөн.

Збыль вылас Тоня эськө некутшөм мөд мужик вылө эз видзөд. Оліс сійө челядьыс ради. Коркө өтчыд друг казяліс, мый весиг Андрейыс дорө көдзалөма. Дерт, радейтис сійөс, но эз нин важ мозыс. Эз нин сэтшөма тіпкы адззысьлігъясас сьөлөмыс, кор өтлаын мыйкө варовитисны, весиг вольпасяс мужикыс лои веськодь. Куйлө кодкө и мед. Весиг окыштөмыс, кутыштөмыс сылы лои веськодьөн, а мукөддырийыс и неуна зывөкөн. Но Тоня эз көсий торйөдчыны. Мед кутасны өтлаын овны, быдтыны челядьсө... И ставыс.

Андрейыслы сійө лөксө нинөм жө эз көсий. Мед, ен ськөдөн, ставыс сылөн лоө бур. А ачыс гортас ноксис кулома моз, сөмын верөс-челядь пондаыс. Весиг чайтны пондіс, мый велаліс нин татшөм оломас, мый гозъя костын тадзи и колө лоны да томдырся сьөлөм ыпъялом пыдди сөмын өта-мөдөс пыдди пуктөм да төждысьөм и кольө.

Но лов вылас век жө Тонялөн гудрасис. Быттьө гыма зэр водзын моз гөгөр пемдөма, быттьө өшйөма юр весьтас да вот-вот личкас муас. Унаысь Тоня лэптыліс рытьяснас сёрнисө, норасис, мый лөк, сьөкыд, а Андрей гөтырсө эз и гөгөрволы.

— Мый сэн сөран, кыті мустө зыртө? Али кодөскө радейтан? Коді сійө?— өтисө жө юасьліс мужичөй.

— Узь. Некодөс ме ог радейт. Сьөлөмөй дзикөдз нин кынмис.

— Менө он жө? Мыйла нө эськө өтлаынсө олам?

— Вай огө заводитө. Узь,— орөдіс сёрнисө Тоня.

Тайөн и помасьліс сёрниныс. Мый сэсся көсийс сёрнитны гөтырыс, Андрей эз төдмавлы, дай мөдыслы эз жө вөв туйыс верөсылөн юрас. Регыд мысти Андрейыс унмовсьліс, а Тоня юр висьмытөдзыс сэсся мөвпаліс. Казьтыліс и челядьдырсө,

школаас велөдчөмсө, сэсся институтса вояссө, Андрейкөд төдмасьөмсө-олөмсө, челядь чужтөмсө. Корис Енлысь ныв-пиыслы дзоньвидзалун, мед лёк туй выlö эз кежны да олөмас ставыс ладмис. Димаыслы бур мывкыд, а Машукуыслы, мед эз мамыс кодь шудтөмөн быдмы... «Мыйла ме сэтшөм шудтөм? Көні сійө, баба шудыс? Кытчö саяліс?..»— вояснас унаысь майшасис Тоня.— «Али прөстө сідзи чайта? Сөмын тай сьөлөмөй век быттö изки костö топалөма. Пыдзралöны. Доймө. Окота ырзөмөн бөрдны. А мый вежсяс? Нинөм. Көть мыйта бөрд. Бара кольö вой... Сэсся лун... Со и артмө — ола лун да вой... Абу эськө, ен сыкөдөн, пöрысь, но юрын тшөкыда гартчö дум: мыйла ме чужи вöльнöй светас, мыйла бать-мамöй меным ловсö пö-лыштисны? Да ачым на кыкөс чужті... Чужисны эськө да. Вот эськө унмовсьны, а аски не палявны... Тьфу! Йöй баба. Кодлы нö колян йылөмъястө? Тырмас нин, узь»,— асьсө өлөдіс Тоня.

Тадзи майшасьөмыд ловъяывысьыд асьтö вильөдөм кодбөн и артмө. Дум вылас волісны и ыджыд мамыслөн кывъясыс. Коркө Тоня норасыштіс ыджыд мамыслы, лов вылын пö зэв шуштөм овлө. Ыджыд мамыс весиг повзыліс. Мый нö пö, бласлө кристос, лоин? Али пö верөсыдкөд лёка оланныд? Ещö на и такөдыштис, оз пö эновт сійө тэнö да та вöсна пö эн жугөдчы.

Тайö кө сөмын? Мукөддырйиыс Тоня ачыс асьсө оз гөгөрво. Ортсысянныс кө видзөдны, нинөм лёкыс абу. Йöзыс на весиг Мишарин гозъялы вежалыштöны. Сьökыд олөмас пö лючки кутчысянныд. Неважөн на учительскöйын Нина Ивановна шуис:

— Медбур мужикыс тэныд, Николаевна, сюри. Менам Лёшка моз эз юсьы. Öтмоз трактористалісны, öтмоз совхозсьыс мунісны... Тэнад со горт гөгөрад ноксьö, вöрысь-юысь вайö, а менам сөмын стопка бөрся вөтлысьö. Соддзад колö видзны татшөм мужиктö!

— Да, да! Со тай кымынөн нин юсисны. Джын мужикыс öтар кок пöвнас мөдар югыдас нин,— сүйсисны сёрниö мукөдыс.

Антонина Николаевна сөмын чöv кывзыліс. Удж вылас сійө некодкөд дзик восьсөнсö эз ов. Дай сиктса мукөд аньяскөд гуся думъяснас эз жö юксьыв. Коркө ыджыд мамыс жö велөдывліс, öнiя олөмад пö китö некодлы оз позь сетны. Сідзи сэсся ставсö ас пыткас и кутіс.

А öнi кө майшасьөмсö кодлыкө висьталас? Код төдас, мый лоö. Некод оз и гөгөрво. Сераласны на, гашкө. Сэсся на верös пельөдзыс воны вермас. Светалы, воча чойыслы, коркө эськө заводитліс норасыны, пöшти гутөдіс нин морös пыткассö, но чойыс эз жö гөгөрво, вомаліс. Йöй кө пö тэ-а? Нинөм абунас висян. Он кө пö вермы сыкөд овны, мун. Либö лөсьöд том мусукös. Татшөм вөзйөм бөрад Тоня сэсся некодкөд думъяснас эз нин юксьыв. Кор медся матыссаясыс оз гөгөрвоны да «йöйөн» шуöны, код водзын и сьөлөмтö восьтан?

Ас пыткас ставсö и кутіс Тоня. А верöсыскөд мукөддырйисö гоз-мөдысьөдз луннас венö воны кутісны. Быд нинөм абу-сыс пурк-паркмунласны, а мый понда — и шунысö оз кужны. Тонялы таысь челядь водзас эз вöv лөсьыд. Мед эськө эз чорзыны да сэсся öдортчыны бать-мамсьыс.

Машаыс юасьліс нин:

- Мыйысь нө батыд век скöралö да горзö тэ вылö?
— Оз скöрав... Деньгасö некөн нажöвитны да сыысь забеднö. Удж сюрö да бөр ставыс лючки лоö,— гөгөрвоöдлiс Тоня.
— Удж абу да та вöсна мöй скöравлöны? Коктö кресталöмөн сöмын пукав! Майбыр. Да öд горт гөгöрад нокыс тырмымөн. Пыр тай висьталö, мудзи пö. Сэсса и вöравны öнi сылөн кадыс эм,— дзик верстьö моз нин, ен сыкöдөн, сёрнитiс нылыс.
— Сiдз эськö да. Но прамöй мужичöйясыдлы окота семьянысö аслыныс вердны. А олöмас со мый кутiс керсыны. А батынд прамöй морт. Майшасьö, мый тiянлысь пайкас... Мукöд моз эз юсы. Мед эськö оз жö вомдзась. Тьфу, тьфу, тьфу,— куймысь шуйга пельпом вомöныс сьöлыштiс Тоня.
— Мам, ысты, сiдзкö, батытö кытчöкö, уджсö корсны.
— Тэ бара таdzi эн шу,— öлöдывлiс нывсö Тоня.

...Матыстчис Виль во. Тоня виччысис воча чой гозъясö, кодъяс олiсны карын. Толя зятъыс коркö кöсйысьлiс отсыштны корсны карысь уджсö да, гашкö, öнi нин и могмöдас. Ачыс сiйö стрöитель. Висьтавлö вöлi, стрöитчан котырад пö уджалысьяс-ыд век колöны. Со тай кутшöм öдөн кыптöны карас виль керкаясыс. Гоз-мöд тöлысьөн енэжсö нин пыкöны. А Андрей киподтуя. Татшöмтö, эскис Тоня, быдлаö позьö босьтны. Быд рыт и асыв кевмысис сiйö Ен водзын, мед локтан воыс ваяс шуд.

— Но, Тоня, чукöрт ноптö верöсыдлы. Праздник бöрас лэччам карö,— пыригмозыс нин висьталiс Толя бур юöрсö.

Тонялөн весиг сьöлöмыс топавлiс, быттö мыйыськö повзис да эз кöсйи лэдзны Андрейсö. Көть эськö вежөрнас и гөгөрвоис, мый уджыс колö. Майшöдлiс бокö мунöмыс.

— Кöсйисны босьтны? Кытчö? Кыdzi кутас уджавны? А кöнi кутас овны?— öти-мöд бöрся юасис Тоня.

— Всё продумано,— рочасьыштiс зятъыс.— Гöсьтъястö пö весиг чайнад он юктав,— шмонитана кöритыштiс сiйöс Толя.

— Ог и юктав. Мужикöс нуны кöсьян да,— воча серöктiс Тоня да корис прöйдитны пызан сайö.

Сэсса пажнайтiганыс став йывсьыс и сёрнитiсны. Медводз шуисны карас овмöдчыны Андрейлы, сэсса семьялы юр сюянiн лоö да вöлисти нин Тонялы челядьыскöд вöрзöдчыны... Мыйта сёрнитчисны да лöсьöдчисны, а мунöмыс артмис сöмын на мöд во арнас. Тулыснас ньöбисны Дырносось пон чом ыджда дача, сэсса лэччöдiсны ассьыныс керкасö да выльысь лэптiсны дачаыскöд орччөн.

...Мишаринъяслөн олöмас пöшти нинöм эз и вежсьы. Сöмын сиктсян карö лэччисны. Позьö кö шуны дача вылас олöмсö карсаөн. Первойсö, ладмöдчигас, эдджык пинясьны, а сэсса бара важ кытш вылас сувтiсны. Андрейлы на и содтöд помка мöдiс сюрны — сиктас көть вöлi ставыс тыдаланаджык, а карад пö олöмыд гусяджык.

— Вежöгтöмыдла юр вежöрыд, тыдалö, дзикöдз гудыртчöма. Ме öд абу пон! Кор мен танi гуляйтнысö? Да и кор гуляйтлi? Сулан кö көть öтчыд — сэки и мыжав...— скöралiс Тоня.

— Вот сiйö и эм, кутнысö ог вермы... А кута кö — кыкнантö помала!— воча горзiс Андрей.

Тоня весиг ветліс өти тōдыс дорō. Чайтис, мый сійō раммōдас мужиксō. Но сōмын денъга шыбитōм и лои. Еджыд вылō пō тай сьōд гōн оз пет, шулōмаōсь важ йōз. Андрейислōн сямыс не-кутшōма эз вежсьы.

Өти гожся рытō удж бōрсяыс Тоня сулалис автобус остановка вылын. Сэни жō лажъялис зэв тōдса чужōма мужичōй да сюся видзōдис сы вылō.

— Мый, эн тōд? — шыясис мужичōйыс.

Тоня вочавидзис, мый эз, кōть и дум вылас уси нин, мый тайō сылōн вōвлōм однокурсникыс, Сергей. Велōдчигас Сергей вōтлысьыштис Тоня бōрся, но налōн сэки нинōм эз артмы. Зон-мыс вывтi нин уналысь сьōлōмсō косьтылис, весигтō Тонялōн некымын пōдруга веськавлисны, да сы вōсна ёнджыкасō и кō-дзōдчис Сергейсьыс. Поліс, мый коркō сьōлōмсō чорыда дойдас, оз кут вермыны нывъяс пиысь гōтырпусō бōрйыны да.

— Ми жō тэкōд институтад өтлаын велōдчылiм! Тэ өд, Тоня? Осипова?

— Тоня, но абу нин Осипова. Мишарина.

— Верōс сайō петiн? Дерт, этатшōм мичаыд мужиктōгыд эз коль. Челядь, кōнкō, эмōсь и?

А Тонялōн лов вылас быттьō мыйкō ылькнитис, ойдōдис сьō-лōмсō. Сылы лои нин зэв окота варовитыштны Сергейискōд, юасыны олōм-вылōм йывсьыс, висътавыны ассъыс, кōнкō пукуышт-ны, весиг кутлыны, но өдйō сайкалис. Дум вылас пыр и воис верōссылōн вежōгтōмыс. Тайō здукас матыстчис автобус, да Тоня, быттьō чеп йылысь орōдчōм пон, уйкнитис пытшкас. Лолыштис, мый мыни важ тōдсаыскōд сёрниысь, но... видзōдō да, а Сергей сулалō нин ськōд орччōн.

— Кытчō нō сэтшōмасō тэрмасын? Али сы выйōдз тшапмин, мый весиг өтлаын велōдчывлōм морткōд сёрнитны он кōсйы?

— А тэ кыдзи олан? — тōдсаыслысь дивитōмсō орōдис Тоня.

— Бура. Гōтыра, кык пи быдтам. Уджала. А тэ кыдзи?

— Менам ставыс жō ен ськōдōн. Удж, верōс, ныла-пия. Со, дачаын олам. Патерасō ньōбны ог вермōй, вывтi дона да. Дыр-носысь дача ньōбим да йōрас сиктысь ассъыным керканымōс пуктiм.

— Эн кō мун сиктад велōднытō, өнōдз эськō патераа нин вōлiн. Карса сайō петiн дай, либō ме сайō, — Тоняōс пельпомōдыс кутыштігмоз шуис Сергей.

— Дерт эськō да. Сōмын тай менам татшōм шудыс вōлōма. А тэ кытчō мунан? Дача вылō жō?

— Тэ бōрся вōтчи. Кōсйин пышйыны, а ме кутi.

Тоня татшōм вочавидзōмсъыс весиг гōрдōдис да нинōм водзō шунысō эз вермы.

— Повзин тай. Ме ёрт ордō муна. Кōсьям карса шумсьыс шойччыштны. Ветлам, колōкō, тшōтш.

— Ме бара ог. Гортын уджыс юр выв тыр.

— Сидзкō, ме тэ ордō кeжала. Отсышта, — чуньнас тувкōдлис Тонялы бокас Сергей.

Таысь Тоня нōшта на повзис. Сергейыс өд зэв өтчаяннōй велōдчигас вōлi, да другōннад, кōнкō, эз на вежсьы. Мый шуас, сійōс и вōчō. А збыльысь кō вōтчас? Мый и вōчны, кыдзи ве-

рѡсыслы гѡгѡрвоѡдны гѡсьтсѡ? Вайѡдас кѡ гортас мужичѡйѡс, сѣки Андрейыслы веськодѣ лоѡ, важ кѡть вьль тѡдса, ыджыд шум-зыкѡдз воасны.

— Мѡдысь коркѡ аддзысьлам, карын. А талун огѡ нин.

— Но, сідзкѡ, локтан вежонас, середаѡ, ме локта удж вылад. Кытчѡ?

— Мый кытчѡ?

— Кытчѡ матыстчынысѡ? Ме ѡд ог тѡд, кѡні тѣ уджалан.

— Дом бытаын вузася. Нѣльѡд судтаас. Кытшовтан да аддзан. А тѣ кѡні уджалан?

— Мѡдысь аддзысигад висѣтала. Но, пока. Меным регыд петны.

— Пока,— пыдїсянь ышловзис Тоня.

Кор Сергейыс петїс автобуссыс, Тонялы друг лои гажтѡм. Эз нин вѡв окота мунны гортас. Бергѡдчыны, Сергейсѡ суѡдны, сувтѡдны, корны аскѡдыс чѡй ордас ветлыны, либѡ кѡнкѡ сідз шѡйтны. Гортас ѡд бара лоас: «Мый вѡчин?», «кодкѡ аддзысь-лїн?», «тѡдмасин кодкѡдкѡ?» А талун со и збыльысь аддзысис важ тѡдсаыскѡд, кодї коркѡ весиг эз вѡв веськодѣѡн. Да и Сергейыслы Тоня кажитчыліс жѡ.

Институт помалѡм бѡрас Тонялы тшѡкыда усьліс на дум вылас Сергейыс. Мѡвпалїс водзѡ йывсьыс. Вѡчаасясны-ѡ коркѡ налѡн туйясыс? Тѡдас-ѡ Сергейыс? Шыасяс-ѡ? Кутшѡмѡн сѣки ачыс лоѡ? А Андрейыскѡд тѡдмасьѡм да овмѡдчѡм бѡрас вунѡдїс нин сы йылысь, весиг эз казытыштлы. Но со воис сїйѡ луныс — вѡчаасисны. И повзис. Весиг шыасьнысѡ эз кѡсйы. А Сергей абу вунѡдѡма вѡлѡм, весиг нѡштаысь аддзысьлыны корис. И Тоня ѡні мѡдїс повны — аддзысьлѡмсьыс нин. Весиг видїс асьсѡ, мыйла висѣталїс уджаланїнсѡ.

Гортас Андрейыс эз на вѡв. Недыр кежлѡ керкаыс шуштѡм-мыліс. Челядсьѡ кѡ мамыс дорѡ эз катѡд, на дорѡ эськѡ сьѡлѡмсѡ йитїс да тадзикѡн вунѡдїс Сергейкѡд сѣрнисѡ, а со нин, ѡтнасѡн. И син водзас шпынняялана век на сулалїс Сергейыс. Весиг гѡлѡсыс быттѣ кыліс.

«Мый нѡ мекѡд лои? Кутшѡм зї чушкис?»— бергалїсны помтѡг Тонялѡн юрас шуштѡм мѡвпгъяс. «Ме тай чайтлї, вунѡдлї нин сїйѡс. А этатшѡм регыдгъя аддзысьлѡм — и вѡрзьѡдїс ставсѡ... Мыйкѡ кѡ миян костын вѡлї, мед нин... А гашкѡ, тайѡ быд лунгъя допроссьыс мудзи да сїйѡн? Волас оз эськѡ ме дорѡ? Кѡть эськѡ мед оз да... А аддзысьлынысѡ окота, ме ѡд сы йылысь нинѡм ог тѡд...»

— Тоня, тѣ гортын?— думгъяссѡ торкис удж вывсьыс воѡм Андрейыслѡн гѡлѡсыс.

— Да... Сѣян?

— Мый нѡ синмыд сѣтшѡма юггъялѡ?

— Юггъялас, дерт, абу ѡд куньса,— мѡдарѡ бергѡдчѡмѡн нин пукталїс Тоня сѣянсѡ тасьтїясѡ.— Мыссьы да ужнайтам. Челядсьыс гажѡй быри. Гашкѡ, бѡр вайны да?

— Катѡдїн тай. Мед гѡжгъясны ыджыд мамысгъясас. Мѡд выхѡднѡяс, кѡсгъян кѡ, кайлам.

— Но. Ме кѡть ѡні вода, сѣтшѡма кокѡй мудзис. Сѣѡн талун мерайтчисны, а прамѡясѡ нинѡм эг вузав.

— А кыдзи нѡ сериалыд? Он мѡй видзѡд?— шмонитыштїс

верёсыс.— Реклама дырйиыс весиг он лэдз мөд канал выло бергөдлынысө, а талун водны көсьян.

— Видзөда да и вода.

Тонялы кажитчис, Андрейыс төдө нин Сергейыскөд сёрнитөмсө. Синсө дзевис, поліс, мый буретш сэтысь и лыддяс ставсө. Но рытыс коли вензэйтөг. Водісны да, Тоня дыр на эз унмовсь...

...Со и середа. Тоня быд пырысь мужичёйысь черөбмунліс, но на пиын төдсаыс эз вөв. Воис нин рыт, а Сергей сідз эз и лок.

«Эз и волы... Но и бур. Абу бур! Сьөлөмөй вичысьө. Ачым быттьө шөри поті. Отар джынтьяс полөмөй, Андрейөй, челядьөй, мөдарас — Сергей,— автобусын мунігас мөвпаліс Тоня. Рыгывбыд сэсся дількмунөм сьөлөмөн гортас жөдзис. Верёсыс весиг юасыны пондыліс, мый лои, но Тоня бара ыстысис мудз выло.

Асывнас сөмын на воис удж вылас, пырис Сергейыс.

— Кора прөща, мый эг лок төрыт,— мыш сайсьыс розаяс чургөдіс да кутыштіс сійө Тоняөс.

— Тайөс нө мыйысь вайин? Абу өд чужан лун.

— Ме өд төда, радейтан розаяссө... Да и мича аныдылы дзоридзьястө оз сөмын чужан лун дырйиыс козынавлыны.

Тонялөн сьөлөмыс дзикөдз сыліс. Верөссяныыс мелі кывъяссө сійө важөн нин эз кывлы. А оз тай прөстө, вөлөм, шуны, мелі кывйыд пө и кывтөм пемөсьяслы лөсялө. А кысь нин мортыдды оз. Сэсся и важья радейтөмыс, тыдалө, бара кутіс ломавны.

Лунысь-лун тшөкыджыка и тшөкыдджыка Тонялы усьліс дум вылас Сергейыс, а Андрей дорас быттьө дзикөдз көдзаліс. Кыдзи сөмын эз пессьы сьөлөмыс. Окота вөлі мунны верөс дорсьыс, но поліс весиг думыштнысө та йылысь. Да и Сергейыс абу жө өтнасөн. Гашкө, сылы тайө сөмын ворсөм, а Тоня со ыззис.

Сергей, дерт, оз думайт торйөдчыны гөтырыскөд, но эз көйы и Тоняөс энөвтны. Тоняөс моз сөвесьтыс эз йир сійөс. Кык бабанад майбыр. Отарыс гортас пуө-пөжалө, виччысьө, а мөдарыс мелісла ку письыс петө дай өтлаасьөмөн оз повзёдды.

А Тоня вөлисти лэчкө шеді. Кымын көйиыс мынтөдчыны, сымын лэчкыс зэлаліс. Водзвыв нин вөлі гөгөрвоө, мый тадзисө кык пельө сьөлөмсө чашкөдны оз артмы. Да и ассяныыс татшөмторсө эз виччысь, мый кык мужиккөд кутас овны. Институтас велөдчигөн өтдортчис радейтана зонсьыс, а өні оз вермы. Быттьө нарошнө юрсө сүйө петляас. Унаысь эськө асьсө и көритліс, мый кык челядя мам, а йөз мужикөс сибөдө. Сьөлөм потмөныс поліс и сыысь, мый коркө да кывсяс Андрейыслы, либө Сергейыслөн гөтырыс казялас. Сэки эськө мый лоө?

Гусясьөмнад олөмыд нөшта өти козин вөчис Тонялы — кутіс нөбасьны. Ачыс эськө мыжа. Отчыд и мөвпыштіс, радейтана мортсяныыс кө кага вайны... Со и сьөктіс. Быттьө заказ серти артмис. А өні сэсся и повзис.

— ...Сергейсянь өд! Мый вөчны? Аслам нин кык челядь, сылөн тшөтш... И тайөс перйиынысө ог вермы,— бөрдөм сорөн юксис шогнас чойыслы Тоня.

— Перйы, нинөм тэныд коймөдсьыс! А кага рузум кө көсьян мыськавны, вай. Шуан, Андрейсяныыд дай ставыс. Оз өд плешкас ло гижөма, кодсянь. Сергейыд тэнө куим челядынад өдвакө

босьтас. И Андрейыдлы татшөмторсö он жö висьтав — виас. Сергейыд төдö?

— Ме сылы нинөм ог висьтав. Мый лоны лоöма нин. Кыдзкö ачым бергöдча. Ог төд сöмын, кызди Андрейлы висьтавнысö... Ми öд, сыкöд пöшти ог узылöй.

— Йöй кö тэ-а! Вайны кö кöсьян, талун жö мед вöлі. Но, ачыд öд гөгөрвоан... Сэсся олыштанныд да и чолöмалан, нöшта пö öтчыд батыөн лоан.

— Света, ме кö тэ кодь кокныд руа вöлі! Ог öд вермы сыкöд, зывöк меным!..

— Öнi быть ковмас. Гоз-мöдысь на дай. Öтчыднад сийö оз верит. Кыдз нö эськö тадзсö прöступитчин?

— А-а-а, артмис тай рökыд вылö... Енмыс, тыдалö, менö тадзи мыждiс ас мужик вывтi узылöмысь.

— Лёксö нинөм эн думайт. Некод тэнö нинöмысь эз мыжды. Вöч, кызди тшöктi, и ставыс ладмас. Андрейыд челядтьö радейтö. И тайöс кутас. А Сергейыдлы и збыльысь, гашкö, оз ков нинөм висьтавнысö. Но ме эськö ог төд да... Ачыд сэсся думайт.

Чойыслөн висьталöм серти и вöчис Тоня. Кöть и лолыс пессис, а сёлöмсö быттьö ёсь гыжъясөн парсалiсны, кагасьыс эз мынтöдчы. Кыдзи нö ассьыд вир тусьтö виан? И Сергейсьыс вöляникысь кöдзöдчис. Думайтiс, быдмысь кага вылас радейтöмыс вуджас. А Сергей некызди эз гөгөрво, мыйла Тоня другысь орöдчис, но ёнасö суйсьыны эз кут. Кöть эськö и радейтiс сийöс. Зiлис кызкö гөгөрвоöдны аслыс: кыкнанныслөн торъя олом, семьяс...

Андрейыс бара кутiс кывны асьсö шудаөн, мый гöтырыс виччысис нöшта öти кагаös. Чужис нöшта öти ныв — Люба. Медся радейтана мортсяныс да, сийөн тадзи и шуис нимтыны Тоня. А босьтiс медводдзаысь мездорас да нимкодъысла нинөм шунысö эз вермы, бöрддзис. Врачьясыс весиг уськöдчылисны, юасисны, кыз асьсö кылö, шудсö эз гөгөрвоны да.

Больничаясь петiгөн мама-нылаös виччысисны став семьянас. И кор Любуксö сетiсны Андрейыслы, нöшта и чолöмалiсны, Тоня муртса эз нетшышт кагасö верöсыслөн кисьыс. Окота вöлі горöдны, мый абу тайö сылөн, мед весиг оз кутчысь, но пиньсö курчöмөн терпитiс. Да и гортас, кор Андрейыс корлiс кагасö ас ордас, висьтасис сылы батыөн, Тонялөн лов вылас ставыс пuzzyлис.

Андрей коймöд кага чужöм бöрад раммис. Тоняös нинöмысь нин эз көрит. Вежöгтынысö öнi быттьö и нинöмысь вöлі, гöтырыс лун-лун гортас кагаыскöд ноксис да. Бöрдысь бöжнад кö домаласны, некытчö он мун. А Тонялөн лов вылас сьökыд вöлі. Окота эськö звöнитлыны Сергейыслы, висьтавны, мый Любаыс сылөн, но смеллуныс эз тырмы. Гоз-мöдысь эськö ырыштчылис нин, да бара öлöдлiс асьсö. Да öд и нöбасигас нин шулiс, мый Андрейсяныс виччысьö... Чайтiс, вайöм бöрас ставыс пуксяс ас местаас, но сёлöмыд тай вежöрсьыд, вöлөм, ыджыдджык: сöстөм юрөн оз лэдз овны, öтарö пессö-вийсьö. Сэсся и Любаыслы Сергейыс ассьыс чужöм-мыгöрсö сетöма. Видзöдлас сы вылö, и бара ставыс гөгөр дойөн ойдö.

«Вöчи жö ме аслым думтö, пытшкöсö ставнас нин кырлалiс. Звöнитла. Корла, а сэсся водзö тыдовтчас», — верöсыслөн удж

вылас мунѳм бѳрын уськѳдчис телефон дорѳ Тоня, но кор кыліс радейтана, тѳдса гѳлѳссѳ, бѳр шыбитіс трубкасѳ. Сѳсся смел-мѳдчис жѳ.

— Привет!— муртса кывмѳн артмис Тонялѳн.

— Привет! Но, кыдзи оланнѳд-быдманныд?

— Ен сѳкѳдѳн...

Мый юасис-висьтасис Сергейыс, Тоня эз кыв. Юрас ковгис ѳти дум: кыдзи эськѳ корлыны ас ордас сійѳс, да волас-ѳ.

— Волы гѳститны,— орѳдіс Сергейыслыс больгѳмсѳ Тоня.

— Кытчѳ? Тѳ ордѳ?.. А верѳсыд?

— Сійѳ абу, уджалѳ. Волы дзик пыр,— дрѳжжитан и стрѳг гѳлѳсѳн артмис анылѳн.

— Ме ѳні ог вермы.

— Волы, мися, дзик пыр,— бѳрддзис Тоня.

— Мый нѳ лои?

— Нинѳм...

— Кор локтѳ Андрейыд?

— Рытнас.

— Виччысь... Сѳмын эн бѳрд!

Сергей эз гѳгѳрво Тоняѳс. Кѳть и ѳна нин гажыс быри сысь, но мыйлакѳ падъяліс. А Тоня жѳ эз тѳд, мый вѳчны. Яас быттѳ ѳтпырйѳ сатшкисны сѳ пурт, вежѳрыс кутіс гудыртчыны — локтас оз, — гупкис юрас ѳти мѳвп. Неуна сайкалыштіс Любаыслѳн бѳрддзѳмысь. «Час, батыд локтас»,— нѳнѳдігас висьталіс нылыслы Тоня. Кагукыс весиг кыдзкѳ кезъясьѳмѳн сѳйис, тыдалѳ, кыліс мамыслыс майшасьѳмсѳ да.

Муртса ланьтѳдіс кагасѳ, кыліс машина шы. Тоняѳс ставнас кутіс дзѳрѳдны, весиг эз кут путьмыны ѳдзѳссѳ восьтны.

— Тѳ ѳтнад?— кыйкнитліс Сергей пыді вежѳсланьыс.

Тонялѳн здук кезлѳ гѳлѳсыс бырліс, сѳмын юрнас и довкнитіс.

— Гажѳй бырис,— кутліс да кѳсйис окыштны Тоняѳс Сергей.— Тэныд кага вайѳмыд бур вылѳ лоѳма, смелмѳмыд. А мый бѳрдін? Висьтась, мый лоис?

— Сергей, тѳ менѳ прѳстит... Ме ог вермы висьтавнысѳ, кывйѳй оз бергѳдчы... Лок,— чѳв олыштѳм бѳрын нуѳдіс сійѳс пыді вежѳсас, кѳні пушкис-узис кагаыс.— Чуньтѳ либѳ дѳрѳм воротниктѳ курччы, мед оз вомдзассы. Видзѳд... Муса абу?

— Ме ог тѳд. Дерт, муса.

— Ныв али пи?

— Ныв. Любук.

— М-м-м.

— Миян. Тѳнад да менам...— эз и тѳдлы Тоня, кыдзи вомсьыс петіс.

Сергей джѳмдіс да вѳча кыв ни джын эз вермы шуны. Кымѳссьыс пѳсьсѳ чышкалігмоз бѳр петіс. Сылы татшѳм юѳрыс шѳндіа енѳжын чардби кодѳн лои.

— Менам?! Тѳ жѳ шулін...

— Да, шулі... Сысы и прѳщасѳ кора, мый тѳнад тѳдтѳг чужті, а ѳні висьтасы. Мый сѳсся шуан? Сѳмын чѳв эн ов. Сергей!

— Ог и тѳд, мый шунысѳ...

— Тѳ ме вылѳ скѳралан?

— Ог... Но шѳйѳвоши. Гѳгѳрво тшѳтш и менѳ! Нѳбасигад

шуин — Андрейыдлөн... Вайөмтө эг төдды. А өні шуан — менам! Ыджыд-ө нин?

— Талун куим төлысь тыри.

— Куим төлысь мысти вөлисти висьталін?!

— Ме полі...

— Мыйысь?

— Мый өтдортчан меысь, тшөктан перйыны...

— Ме сэки эськө ог төд, мый вөчи, но и өні ог жө төд, мый вөчнысө, кыдзи водзө овнысө? Тэ мый думайтан?

— Эн пов, ме некодлы ог висьтав. Көсьян кө, воливлы кагатө видзөддыны, он кө — эн. Ме тэнө нинөмысь ог мыжав. Сөмын ме вылө эн скөрәв...

— Тоня, позьө кө, ме муна... Мөдысь вола. Тэ меным звөнитлы, кор Андрейыд оз ло гортад. Меным колө ставсө тайөс бура мөвпыштлыны.

Сергей петіс, сөліс машинаас да шуркнитіс, а Тоня бара коліс думъясыскөд өтнас. Но сьөлөм вылас эз нин сэтшөм сьөкыд вөв. Сергей водзас воссьөмыс личөдыштіс, көть эськө и майшасьөмыс эз на дзикөдз сыв. Сэсся и гөгөрвоана лои, мый олөмас век жө нинөм оз вежсьы. Сійө коляс Андрейыскөд, а Сергей — аслас семьяыскөд. Сергей водзас воссьөмысь эз жө каитчы: батылы колө төдны аслас кага йывсьыс. А көсьяс-ө төдны батыс нылыслөн быдмөм йылысь — сылөн делө нин. Сьөлөмыд, дерт эськө, мөдарө кайтө — окота овны радейтана мортыдкөд, өтлаын быдтысьны, но кыкнаннысө торйөн домалөмаось и орөдчынысө он нин вермы.

Сэсся и нылуыс быдмыштас да кутас мыйяскө гөгөрвоны. Сы дырйи өд Сергейсө батыөн он шу. Пыр ковмас шуны сійөс дядьөн. Майшасис Тоня и сы понда, мед Андрейыслы оз жө кывсьы.

— Мый бара водзвыв ставсө гудрөдла? Гашкө, сэсся Сергей-ой оз и шыасьлы да? Кымын мужик тай аслас чужтөмысь шенасьө, абу пө менам... А ми абу гозъя. Гашкө, ставыс нэм кежлө сөмын аслам гуся шудөн и кольө да,— Любуксө гөн кодь небыд юрсиөдыс шыльөдігмоз вомгорулас шөпкөдіс Тоня.

Но тайө шогсьыс өдйө паляліс. Көть Сергейөс өна и шобрөдліс анылөн виччысьтөм юөрыс, кыдзи водзөсө овны, шуөма аслыс өдйө. Сійө весиг эз сяммы висьтавны ассьыс сьөлөмкылөмсө. Пөшти во джын мысти өд төдмаліс, мый сылөн нывка быдмө. Нөшта на и радейтана аньсянь. Но сійө жө радейтана аньыс гусьөн ставсө вөчис, а сэсся камөбтіс-юөртіс другөн. Сергей эськө Тоня вылө эз лөгав, көть и некыдз эз вермы гөгөрвоны татшөм воськовсө. Лунтыр да войбыд пессис сьөлөмыс — мыйла Тоняыс өтнасөн ставсө арталөма, сылысь весиг абу юалөма? Мөд лунас нин сійө звөнитіс:

— Тоня, привет! Тэ өтнад?

— Да.

— Позьө воыны?

Татшөм юалөмсьыс Тоня весиг шай-паймунліс. Сійө эз и чайт, мый татшөм өдйө Сергейыс явитчас. Эз куж чайтны, бур али лёк водзө тайө звөнокыс.

— Көсьян кө, воы. Сөмын өбедөдзыс слөймөдчы.

— Ме тіян туйвежын нин сулала...

Некымын здук мысти нин Сергей таркөдчис өдзөсө. Кыв нин джын эз шу, пырөмөн тшөтш воськовтіс нылыс дорө. Тоня вөтчис бөрсяныыс. Сергей дөрөм воротниксө курччөмөн сулаліс да синсө лапнитлытөг дзоргис ныв вылас. Тоня весиг нюмдыштис. Сылы вөлі окота төдны, мый йылысь өні думайтіс Сергейыс.

— Но мый?— лөня юаліс ань.

— Збылысь менам?

— Да. Но...

— А Андрейыд мый шуө?

— Сійө ассыыс моз и быдтө. Нинөм оз төд и оз төдмав. Ме некор ог висьтав. Тэ эн шогсы, гөтырыды оз жө кывсы.

— Тоня, а меным өні кыдзи сэсса овнысө? Ме өд ачымөс тэ водзын кута мыжавны.

— Мыйысь? Тэ ме водзын нинөмөн эн мыжмы! Ме ачым вөчи татшөм олөмсө. Воськыда кө висьтавны, ме эг и көсйы тэныд нинөм явитны, но висьтавсис тай. Гашкө, оз и ков вөлі висьтавнысө да? Но эг тай вермы кутчысыны. Прөстит.

— А кыдзи ме кута адззывны нылукөс?— сибдалан гөлөсөн юаліс Сергей.— Частөсө өд ог кут вермыны волевнысө...

— Дерт. Ме ставсө гөгөрвоа. Да и быдмыны кутас сійө. Он и төдлы, висьталас Андрейлы мыйкө. Челядьыдлөн өд вомас нинөм оз ов. Пока дзоля, верман көть быд лун волены. А сэсса олөмыс петкөдлас.

...Колины лунъяс, төлысыас. Любук вөляникись быдмис. Сылөн вөлі кык батъ — Андрей да Сергей. Дерт, өтарсө сөмын төдіс батънас. Кыкнанныс зэв ёна радейтісны нылукнысө. Тоня эськө и поліс кык пельө шөриалөм олөмсыыс, но янсөдчыны некоднанныскөд эз вермы. Енмыс кыдзкө пыр на отсавліс адззысылыны Андрейсыыс гусьөн.

Мукөддырайисө Тоня весиг шензис, мый гусьөн позьө овны кык мужиккөд. Кодкө кө татшөм олөм йывсыыс водзынсө висьталіс, эськө эз и эскы... А мамыслы да ыджыд мамыслы кө сылөн пөшөкөняасьөмыс кывсяс?.. Аслас кодъ гуся шудсө эз көсйы и челядьыслы. Унаысь кевмыліс Ен водзын, мед ныв-пиыс татшөм дзугъяс оз шедны. Көть и вөлі радейтана мортыскөд быттө өтлаын, и семьяас ставыс лючки, верөсыс раммис, но Тоня пыр оліс полөмөн. Медсясө сійөс шобрөдліс, мый коркө ставыс тайө эрдас.

— Мый сэки лоө? Енмөй! Весиг пола мөвпыштны та йылысь. Но өні колө водзө овны да быдтысыны. Бур көть, Любукөс радейтөны. И ме таысь шуда...



Выль кывбуръяс

* * *

Зэрö. Аски — Ыджыд лун.
Ва гуранö видзöдча.
Пемыд паськöм мем оз мун.
Нюмъялöмөн мичöдча.

Олöм гыясын эг пöд.
Радла пулы, пемöслы.
Эска, кöть и ог на тöд
ачым, кутшöм Енъяслы.

Нинöм вылö лөг ог кут.
Лёксö вежö волысьöм.
Меным усис помтöм шуд —
лоны татчöс олысьөн.

* * *

Со ывла вывсö лымъяліс,
но асьыс зарни коръяссö
оз тэрмась чöвтны лым вылö
лөнъ сяма
статя кыдз.
Октябрöдз гожöм шпынняліс,
эз казяв арся войяссö,
кöть тайö кадö кынтылö,
оз дзоридзав нин видз.
Ас уджысь вой тöv ылавліс,
сёр дорис йиön шоръяссö,
и вöрыс шензьö-гыалö
да видзö гожся мич.

* * *

Ме вошті асьым музаöс.
Кор мортыс оз тöд яндзим,
сэк бырö медся мусаыс.

Ме вошті мича кывъясöс.
Кор вужйыс сісьмö тадзи,
сэк косьмöны и йывъясыс.

Ме вошті югыд мөвпъясөс.
Кор кос туйсө он аддзы,
сэк уялан няйт гөпъясас.

* * *

Тэ ме кодъ жө зэв өтка,
кыдз лэчкө шедом пөтка.
Ми өта-мөдөс кылам,
пыр сьөлөм сёрни кыам.

Ме буретш тэнө корси,
и эска, мый эг сорсы.
Өд пыдөстөм лөз синъяс
сідз кыскөны ас дінас!

Кор мунлін ылі муө,
көн олөм дзулькйөн пуө,
ме гажтөмтчылі ёна:
Тэ меным вывті дона.

Бөр воин чужан карө,
и аддзысим ми бара.
Тэ орччөн кор, ме — вына
и висьөмъясысь мына.

Ен сетіс меным өртөс,
збой, кыпыд руа мортөс.
Ми пондам шудлун сывны
и өтув овны-вывны.

❖ ❖ ❖

Дона лыддьысьысь!

***Апрель төлысянь позьө нин гижөдчыны волөн мөд джын
кежлас. Эн вунөд судзөдны «Войвыв кодзувтө»!***

❖

Миян календарь

Таво «Войвыв кодзувлөн» важся ёртъяс — Борис Федотович Шахов да Степан Семёнович Раевский — пасйисны эськё юбилейяс. Борис Федотовичлы март 19 лунö тырис 80 арёс, а Степан Семёновичлы апрель 21 лунö — 90. Öнi он вермы весиг думыштны, кутшöм эськё вöли коми культураыс да литератураыс тайö кык ыджыд Морттöгыс. Кыкнанныслөн аслас туй, мукöдсьыс торъялана сям. Борис Федотович помавліс Ухтаса горно-нефтянöй техникум, уджавліс сэтчöс нефтешахтаын, ветліс спрециалистöн весиг ГДР-ö. Горький (öнi Нижний Новгород) карын Высшöй партийнöй школа помалöм бöрын — партийнöй да профсоюзнöй уджъяс вылын. Степан Семёнович велöдчис Коми пединститутын, уджавліс школаын, сэсся редакторсянь директорöдз — Коми книга лэдзанинын. А öткодъыс — гижнысö босьтчисны арлыдаöн нин. Но и босьтчытöдзныс мыйта вöчисны коми культураас — Борис Федотович роч карын коми кыв да литература кыпöдöм-нимöдöмнас, а Степан Семёнович — книгаяс да учебникъяс лэдзöмнас. А сэсся и гижöдъяснас.

Вöзъям Алексей Одинцовлысь «Гижöдъясыс ёртöдісны» да Геннадий Беляевлысь «Кывзы, другö»,—шуас» казътылöмъяс, а сідзжö Борис Федотовичлысь да Степан Семёновичлысь гижöдъяссö.

Алексей ОДИНЦОВ



Гижöдъясыс ёртöдісны

«Батькöд» вöсни стена орчча жыръясын пукалім. Нöшта и öдзöсыс на джынвийö вöли восьса.

«Жвуть-жать!» «Жвуть-жать!»— стен сайсянь кылö.

— Пётр Федотович, мый нö вöчанныд?— юалі главнöй редакторлысь, Пётр Шаховлысь.

— Да-а-а! Вокöс черкайта. Бара со мыйкö гижöма...

— Вайлы меным, лыддя.

— Босьт... Оз кö туй, вочакыв гиж да бөр мөдöд. Мед нöшта уджыштö.

«Борис Шахов. Гөрд дзоридзь-яса сьöд шаль. Роман». Кыз рукопись, гашкö кыксё лист бок вылын.

Нимкодъ лои. Романяс журналын вывтi гежöд гöсьт. Видзöд-лі: шефным нель лист бок удитöма креставлыны.

Ыджыд надеяөн, бурас эскöмөн и босьтчи лыддыны. Пы-

зан сайысь чечывтөг куйм лун тырмис. Шемөсмөдіс романыс джуджданас да олөмсө паськыда шымыртөмнас. Кадсө во комын нөбовтө.

Таөдз Борис Шаховлөн «Войвыв кодзулын» 1976—1984 во-ясын петавлісны нин «Тшөтшъяяс», «Лунтө ошкы рытнас», «Визув паныд», «Сибөд менө, Чужан му» ыджыд повесытьяс. «Сибөд менө, Чужан му» повесытсө вылө донъявліс филологияса доктор А.К.Микушев.

И со, киө веськаліс роман.

— Унджык жө черкайтөмыдөсь, Пётр Федотович. Тшөтш и коланасө,— лыддьом бөрын ошки романсө.— Сямөн, олөмсө бура төдөмөн и кадыслы лөсялана ног гижөма. Роч нога мөвпа-лөмыс, дерт, тыдалө, сөмын и вежыштны редактируйтігас.

— Но и дасыты, сідзкө, локтан номеръясө. Томөн гортысь рочас муніс, велөдчис нефтяникө да пыр на сәні. Дыр каднас рочмис.

Таөдз ме дасытылі нин Борис Федотовичлысь «Тшөтшъяяс» повесытыслысь мөд книгасө (петавліс 1983 вося 1—4 номеръ-ясын) да «Сибөд менө, Чужан му» повесытсө. Кыпыд лолөн ре-дактируйтлі. Петаліс 1984 вося 7 да 8 номеръясын. Гижөдъ-ясыс и ёртөдісны миянөс.

Волас Борис Шахов Ухтасыс Сыктывкарө да аттёалө по-весытьяссө лөсьөдыштөмысь да йөзөдөмысь. Озыр пызан лөсьөд-лас. Сёр рытөдз пукалам. Сійө миян удж-олөм йылысь юасьө, а ми — Ухта йывсьыс. Варов мортыд ас йывсьыс этша, ошйысь-төг висытасьө, но унатор йөз йывсьыс көсйө төдны.

Борис Федотович 1965 восянь — «Стройматериалы» Ухтаса производственной объединениеын генеральной директорсө ве-жысь да «Коминетфть» производственной объединениеын проф-комса председатель. Нефтяникъяс вөсна, налөн челядьыс вөсна төжд, оланінъяс да детсадъяс, дача местаяс корөмөн сы дорө жө медводз шыөдчөны.

Чайтсьө, та ыджда могсө олөмө пөртігөн мортыслы и шойч-чыштнысө некор, но аддзөма тай кад — узьтөм войяс тшөт-весьтө гижөма сы мында повесыт да кык роман. Бөръясьыс — «Овлісны-вывлісны» романысь Б.Ф.Шаховлы Финляндияса Кастрен Котыр 2000 вося ноябрын вичмөдіс первой премия.

«Войвыв кодзув» журналса котырөс Борис Федотович ёна пыдди пуктіс. 1983 вося төв помын локтіс Сыктывкарө да менсьым юалө:

— Алексей, тэнад уна посни челядь, а кодкө нө школаас ветлө-ө?

Вокыс, Пётр Федотович, висытавлөма семья йылысь.

— Анна, медся ыджыдыс, первой класс тулыснас помалас.

— Мөдөдлам Чёрной море дорө. Сәні миян «Черноморская зорька» бур пионерлагерь.

— Зэв полысь йөзас да өгнас нинөмысь оз мун.

— Кодөс нө эськө нөшта ёрт пыддиыс?

— Лидия Васильевналөн внучкаыс тшөтшъя. Төдмөдам да кыкнад ветласны.

— Вот и бур. Төдмөдөй. Кык путёвка мөдөда. «Коминетфть» объединение зэв озыр. Ухтаыс гожөмбыднас став нефтяникыс-лысь да мукөд организациясса ыджыд семьяысысь челядьсө

море дорын шойччөдам. Сыктывкарсыныд унаос жө быд гожом мөдөдлам. Ухтаын ме тiянөс виччыся.

Май шөрнас путёвкаяс кийн нин вөліны. Юнь коймөд лунө, пекничаө, кык нывкакөд самолётон лэбим Ухтаө. Овмөдчим Лидия Васильевналөн рөдня ордас. Звөнитлі Борис Федотовичлы гортас.

— Дачаын сійө, отпускын.

«Но вот, көсйис паныдавны, а ачыс код төдө дыр-ө кежлө дачаас мунөма,— шогө уси.— Субөта — шойччан лун, вөскресенньө поездыс мунө. Аддза-ө колана йөзсө?»

Звөнитлі Александр Константинович Журавлёвлы. Роч поэт, челядьлы гижө, Сыктывкарө воывлө. Висьтаси: «Ухтаө вои челядькөд. Море дорө пионерлагерө мөдөда вөскресенньө».

— Челядьтө ужнайтөд столөвөйын да бура шойччөй,— кытчө овмөдчим, юалис, да көсйисис:— аски, час дасын, локта тiянө.

Аскинас завтракайтны удитим — пыр и воис. Чолөмасим. Челядькөд киасис:

— Дядя Саша,— Настялы висьтасис. Анна дядя Сашасө бура төдiс: Журавлёв миянын некымынысь нин узыліс карө волигас. Челядь йылысь шмонь кывбурьяссө лыддис, туйө петысьяслысь нопьяссө видлаліс.— Купайтчан шапочка, плавки да тапочки абу босьтөмныдөсь. Немтор, «Спорттовары» магазинын ставыс эм. А наперво луныс миян, ме прөст — Ухтасө тiянлы петкөдла.

Медводз көрт туй вокзалө пыралім. Ыджыд пөв вылысь видзөдлім пионерлагерө мунысьяслысь ним-овьяссө. Аддзи и Аннаос да Настяос.

— Маитча вөлі, кыдзи челядьос мөдөдны, а сідзкө, татчө сөмын и ковмас локны, документъяс сетны,— Журавлёвкөд сёрнита.— Борис Шахов дачаас, сідзкө оз лок, отпускын да.

— Эн маитчы, локтас Борис Федотовичыд, быть локтас. Быд во, быд смена ачыс колльөдө. Юасьө, прөверяйтө, став коланасө мед туяс вөлі босьтөма, а сэсся ачыс жө и юөртө станцияса начальникыслы, мый поездыс туйө петны дась. Абу өд ветлысьмунысьяслы составыс, челядьлы сійөс котыртөма: «Ухта— Анапа». Ме быть жө вола тiянөс колльөдны. Аски ёнасө эн тэрмасьөй. Дас час кежлө кө воанныд вокзалас — бур. Мудзасны дыр виччысьөмсьыс челядьыд.

Журавлёв нуөдліс миянөс челядьлөн паркө, кинотеатрө. Кино весиг видзөдім. Бөрьяпомыс и «Спорттовары» магазинө пыралім, ньөбим став коланасө. Мудзтөдз, патераө вольтөг, лунтыр Ухтанас төдмасим. Пажнайтнытө карад, майбыр, көть көні.

Александр Журавлёв вөскресенньөнас пыр жө воис ми бөрын вокзалас челядьос колльөдны. Список сертиыс отрядса вожатөйсө корсим, но Настяос да Аннаос торйөдөмаөсь. Бөрдны кутісны:

«Некытчө ог мунөй!» — бөр гортө бергөдчыны көсйөны.

— Борис Федотович локтас да ставсө ладмөдас,— сьөлөм сетө Журавлёв.

— Оз, буди, лок... Мыйыс өд оз овлы, кытчөкө манитчас?..

— Локтас-локтас. Сытөг и поездсө оз мөдөдны. Документъяс на кырымавны сылы ковмас. Кадыс лун шөрөдзыс час сайө на...

И воис өд. Киасим.

— А этайояс нө мыйла бөрдөны?

— Торйөдөмаось. Абу өти отрядө веськалөмаось. Оз көйыны поездас пуксыны. Бөр пө гортө нуөд...

— Час, ладмөдам ставсө.

Корсим пионервожатөйяссө, индiм Борис Федотовичлы. Сийө босьтiс Настялысь путёвкасө да Анна отрядса пионервожатөйыслы сетiс. Нывкаяслөн пыр и косьмис синваныс. Пырисны вагонас, нопъяснысө пукалан местаас кольөмаось, матыстчисны өшинь дорас, нюмъялөны, кияснас өвтчөны.

Лун шөрын поездыс ньөжйө-ньөжйө вөрзис.

— А ме тiянөс талун некытчө ог лэдз,— Александр Журавлёв öтар-мөдарсянныс кыкнаннымөс сойбордъялiс.— Алексей ордын ме унаысь гөститлi Сыктывкарас волывлiгөн, узылвлi, а сийө Ухтаын медводдзаысь на. Тi, Борис Федотович, Виль восянь, буди, эн жö волывлөй миянө?

— Март праздник тiянын пасйим...

— Важөн, а öнi юнь! Делөсө вөчөма, пукалыштам өти пызан сайын, бур төдсаяс...

Ёна и гажөдчөма лои, гашкө, вой шөрөдз. Перво Александр Константинович баянөн ворсiс, а сэсся и Борис Федотович киас баянсө босьтiс. Кыкнанныс зэв сямөн, сьөлөмсянныс ворсөны. Баян шы улас нель гөлөсөн — Журавлёв гозъя да Федотовичкөд тшөтш и ме — важ и виль сыланкывъяс сьылiм.

Пекничаө енэжыс сөдз вөли, ни өти кымөртор. Самолөтас пассажирьясыс этшаөн вөлины. Öшинь дор пуклөсьяссө куим рад займитiм, но нывкаяслы пуксывны эг и лэдзлы: туй чөжыс иллюминатор пырыс куимнанным видзөдчим. Вывсянныс Ухта—Воркуталань нуөдысь көрт туйыс лызь туйөн кажитчө. Станциясыс, посёлокъясса керкаясыс истөг көрөб ыджадось. Нывкаяс самолётнас медводдзаысь на лэбөны да сөмын и чиктылөны-сералөны.

Сыктывкарө бөр локтiгас кымөра поводдяыс лои да самолөтас нем вөчтөмсьыс гажтөм вөли.

Борис Федотовичлөн кувсьөм бөрын тадзи жö сьөлөм вьлө гажтөмыс пуксис.



Гөрд дзоридзяса сьод шаль*

Р О М А Н

1

Паськыд пельпомъяса том зон пукаліс пыж бөжас да чибльöг кодъ чуманöн тэрмасьтöг кояліс пыжас чукöрмöм васö, кадысь кадö вештышталіс кинас гын шляпа увсьыс петöм да синмас пырысь руд юрси чикыльяссö. Сьод синкымъяс улын руд синъясыс сюся видзöдісны кыр йылас нокошитчысьяс бöрся. Миш Педьö сэтчö кайліс жö нин, видзöдліс, мый сэн керöны, да этша эз шензы. Сидоров избасяныс неылын (сідз тай шуöны этайö мича еджыд öшиньяса ыджыд пу керкасö) ёсь йылöн дöраяс зэвтöмаöсь. Вон не вон, чом не чом — палаткаяс пö тай. Кодöс майөгъяс йылö, кодöс öтка пуяс костö зэвтöмаöсь. Нель-ö-вит аршын** судта пожöмъяс костын дзик орччөн кык палатка сулалісны. Öти водзас, ыджыдджыкас, муас сутшкөм кузь зіб йылын дöлаліс куим рöма — еджыд, лöз да гөрд визьяса — флаг, а воськов-мöд бокынджык сулаліс винтовкаа салдат. Тайö палаткаас пö ачыс губернаторыс овмöдчöма. Миш Педьö эськö тайö Сидоров керка дорöдыд губернаторсö аддзылөм былö надеяөн и локтіс, кор кывсис сылөн воём йылысь. Көкъямыс гырысь пыжөн пö Емва вожсянь Уква вывса Перевөлök пыр локтöмаöсь.

Миш Педьö гортас нин вöлі мөдöдчö: батыслысь татчö бөрö-водзö былö и вöзйысьліс, а бөр туйыс гортöдыс кузь. Таті визув Укваыд эськö öдйö нöбöдас, да Уква вомсяныс Изьва йылöдыд ёна зібъясьны ковмас. Кызь вит чомкост*** лоö Изъядор-öдыд. Оз кө унджык. Квайт-сизим чомкостөн лун кө катны — нель лун ковмас. А манитчыны Педьöлы оз позь — батыс кутас скöравны. Виль видз таво колö лöсьöдны, важ видзясыс нин чера ки виччысьöны. Ва кузя тадзи шывъялігад озырлуныд оз сод. Но татчö волыныс Педьöлы вывті окота вöлі. Важөн нин кывсьыліс Уква вывса нефть корсьысьяс йывсьыд, коліс видзöдлыны, кыдзи мусö писькөдлöны да нефтьсö перйöны му пытшкөссьыс. Сэсся найö батыскöд асьныс Нибель йылысь да Сьöдъель пöлөн куим места тöдісны сьод дьöгöдь кодлысь петанінсö. Ёна сійö местаясас сісь чипан кольк дукөн пуркйö. Йöз сёрни серти, сійö пö нефтьыс и эм. Висьтавын кө, ветлыны

* Романысь юкөн.

** Аршын — важ мера = 71,72 см.

*** Чомкост — важ коми кыйсьысьяслөн ва кузя да вöрті ветлігөн ылна пасъян мера (öти чом дорсянь мөд чом дорöдз). Öти чомкост — 5—6 верст гöгöр.

да, Уква йывса нефть корсьысясыслы сійö местаяс йывсьыс? Колöкö, сэтчöдз кöрт туйяс нюжöдасны да налы, сэнi олысьыслы, ыджыд нажöтка ваясны. Батьыскöд тадзи сёрнитлисны и, кöть сійö и эз окотит быдторсö йöзлы висьтавлыны. Нинöмла пö татчö мянны воём йöзсьыс, натöг пö овсьö. Видзöдлыны кö, колöкö, сiдз нин кö окота — видзöдлы, но мый мян му вылын эм, эн больгы. Öнi Педьö нефть корсьöмтö аслас синмөн аддзылис, да воддза думыс вежсис. Кутшöм али висьталöм! Соссьыны колö, кывсьылас кö кодлыкö мян местаяс йылысь. Воасны кö — став вөр-васö лёкысь шызьöдасны. Сотасны да. Педьö локтигмозыс некымынлаö, кöнi вöли тöдчö, мый мусö писькöдлöмаöсь, сувтовкерлис да видзöдлис. Кытчö эз сувтлы, сэнi и сотчöм вөр. Танi со Сидоров изба гөгöрыс и. Куш ёсь йыла да жергöдчöм увъяса коз пуяс, кытчöдз синмыд судзö, червидзисны. А вышка гөгöрыс ызгöмыс-лязгöмыс мыйдтöм! Дас верст сайö, колöкö, кылö. Быд боксянь пöвъясөн вевттыалöм джуджыд вышка пытшьяныс помся гия-гольöдчöм да гора дзуртöм кылö. Вышка дорсяныс неылын кузь сарайын пар вöчан машина пö ушкö-пушкö, орччөн кузнеча да сэнi дугдывтöг клянгöны, Питерöдзис, кöнкö, кылö. Да татчö, татшöм зыка местаад матi берегö сё верст зверь-пöткаыд оз матыстчы. А Изьва йылад кö локтасны, дерт, тадзи жö ставсö шызьöдасны, оз кö ёнджыка. Сэсся кыйсьы. Оз, некодлы бара Педьö оз висьтав асланыс местаяс йылысь, танi ни некöнi. Мед ен видзас тайöяс локтöмысь. Мед нин тан найö бубыляяс моз (вышка пытшкöссьыс петавласны уджалысьыс, да чужöмъясныс ставныслөн дзик бубыляяслөн кодъ няйтöсь) ерикайтчасны-повзьöдчасны. А сійö öнi йöткыштчас да бөр шливгас. Гортланьыс.

Миш Педьö аслас дзoляник пыжөн сутшкысьлис берегас губернатор караванысь гырысь пыжъяс горулö. Пыжыс сылөн вöли дзик тыртöм, сöмын мыйсюрö шоныд кöлуй пиысь да лаз ногъяс сукар, чай-сакартор, сов, ид шыдöс. Да нöшта пищальыс Педьöлөн, и ставсö пыж нырас шабурён вевттыштöма. Ю вылын тулыс-гожöмын сола чери да сола яй он кут кыскавны, а чериыд да уткаыд либö оз асьныс пыжад чеччыштны ни уськöдчыны. А лун-лун ва катчöс зiбъясигад кынöмтö нюкыртлас на.

Сидоров керка дорын джуджыд кыр йывсяныс дзик вадорöдзис кыз пöвъясысь перилöа пос вöчöмаöсь. Педьö казялис поскöдыс лэччысь сьöд уска мужикöс. Сöмын сійö эз нин вöв öнтая моз лякöссьöм дөрöм-гача, а сöстöм сьöд пинджак улас джуджыд юрйыла лöз дөрöма, сапöга да картуза. Педьö сійöс пыр и тöдiс: вышка дорас неважөн матыстчылис да юасис.

— Ты приехал на лодках с губернатором?— юалис сэки сылысь нюмъялысь уска роч.

Педьö гөгöрвоис юалöмсö да пыркнитiс юрнас.

— Тогда откуда? Что, может хочешь устроиться к нам на работу?— водзö юасис роч морт.

Педьö бара пыркнитiс юрнас:

— Не-ет... Я Изьва... Ижма... Смотреть...

— А-а, ты с Ижмы и хочешь посмотреть, что мы тут делаем?— эз лэдзчысь сійö.— Хочешь, покажу, как мы пар делаем... Или как наш пар помогает бурить нефтяную скважину.

Пыравлис Педьö, видзöдлис вышка пытшкöссьö! Мед бара ен

видзас татшөминад уджаломысь! Пемыд, пырём бөрас первойсö өдва вуджөръяс тöдчисны, кок улад нильөг няйт, карасин да лёк дук пöдтö. Сэсся эськö, синмыс велалыштис да, тыдавныджык кутис, но Педьö мыйсö эз видзöд, ставыс вöли тöдтöм. Кутшöмкö ыджыд пу и көрт көлесаяс бергалісны, и мыйкö зэв ыджыд карнан моз улö-вылö помъяснас качайтчис-дзуртис, а качайтчысь помас кыз чеп гия-голякыліс да гашкö зор кызта көрт бедь му пытшсыс кыскаліс да. Кор сійö беддыс медся вылö качлö, сэки му пытшкас мыйкö и зутшкысьлö. Вот вöлөм кызди зутшйöдлöны! А көрт трубаыс мыйдтöм! И сувтса сулалöны, и няйт джоджас туплясьöны... А йöзыс шышка пытшкас ещö на мисьтöмсь, куш еджыд бугыльясныс и тыдалöны, мукöд-дырйиыс пиньясныс еджыдөн жергöдчыласны да.

— Видишь, на цепи штанга вверх поднимается?— кутис Педьöлы гораа висътавы сійöс шышка пытшкас пыртысь мортыс, бокö сувтöмөн, мед уджалысьясыслы эз мешайтчы.— Это поднимает специальное долото. А когда штанга будет в высшей верхней точке, долото с пригрузом в двадцать восемь пудов освобождается, обратно падает вниз и всей своей многопудовой тяжестью разбивает породу. Потом, подцепленная штангой, снова поднимается, и снова падает... Сейчас уже на глубине сорока пяти саженьей...

«Не-еля-амын вит саже-ень!— ас думсыс шензис Педьö.— Сы пыднаö нин розьöдöмаöсь!..»

— Так вот и бурят нефтяную скважину, вернее — долбят, пока до нефти не доберутся. Нравится?..

Педьö эз став висъталöмсö гөгөрво, но юалöмсö гөгөрвоис стöча да пыркöдыштис юрнас:

— Не-е...

Висъталысь да юасысь гажаа серöктис, нуöдіс бөр петны.

— Нет, значит... А ты сам чем занимаешься? Небось, в лесу зверя промышляешь? Охотник?

— Да. Охотник.

— Конечно, в лесу прекрасно, и воздух чист и свеж. Что ж, до свиданья, молодой охотник. А надумаешь научиться нефть добывать — приходи. Научим.

— До свидания,— Миш Педьö топöдліс сылы нюжöдöм кисö. И ки пыдöсыс, и шамырыс мортыслөн чорыдöсь, абу на, буракö, дзик барин.

...Öні сійö лэччис поскöдыс, тöдса мортлы моз бара нюмдіс да гогнитис Педьöлы юрнас:

— Что, парень, уже домой собрался?

— Домой.

— Ну, счастливо тебе. Надумаешь — еще приезжай.

И сійö матыстчис гырысь пыжъяс дорын ноксысь мужикъяс дорö да накöд кутис варовитны. Кыр йылас ещö öти морт — неыджыд тушаа салдат — тыдовтчис да поскöдыс вадорö жö кутис лэччыны. Шуйга пельпом саяс винтовка, а веськыд киас бринякыліс тыртöм ведра. Сійö лэччис да сувтис веськыда Миш Педьöлы воча, нюжöдіс сылы ведрасö.

— Эй ты, парень, черпни воды для губернатора и подними вверх. Вала, вала...— увтыртана содтис комиён да, аснас дөвöлен, жергöдіс пиньяссö.

Миш Педьоос роч салдатлөн увтыртана шыёдчөмыс быттё плетён сөтыштис, весиг пөсьыс чепөсийс. Сійө син бөжнас скөрысь козыныштис еджыд лычкаа гөрд погона салдат былө, мурч курччис пиньсө да вомгорулас сөдзөдіс: «Ачыд келлы, сапөга тай... Кокъясыд оз нёздыны...»,— да гурснитис чибльөгнас пыж пьдөссө.

— Ну ты, дикарь, что под нос бормочешь, ты слышал, что тебе приказали?— салдат ведрасө лэдзис кисьыс, босьтис Миш Педьолысь берегас куйлысь көрт йыла зібсө, доймымөн тувкнитис помнас Педьолы бокас да скөрысь содтис:

— Вала, вала, тебе говорят!

Тувкнитөмыс эз ёна дойд боксө, а киён воөмыс сьолөмсө кырыштис Педьолысь, да сійө вежөрттөгыс тшапкысис зібьяс, выныштчөмөн тувкыштис салдатлы аслыс да бөр тракнитис. Салдатлы кытчөкө ёсь көрта йывнас инмыштөма ли мый ли, ойкнитис сійө, лэдзчысис зібсьыс, а Педьө сувтис бөжас да пыр жө кутис йөткасьны берегсьыс. Но салдат пельпом сайсьыс нетшыштис винтовкасө да чургөдіс Педьолань:

— Стой, каналья зырянская, выходи на берег!

Педьө дугдіс йөткасьны. Сійө эз повзы, а скөрысь шензис да видзөдіс сы былө чургөдөм винтовкаа йөй салдат былө. «Морт былө пищаль он жө веськөд! Абу вед сійө ош».

Салдатлысь да Педьолысь пиньө воөмсө казьявлөма Педьолөн былъ төдсаыс, да сійө тэрмасьомөн матыстчис салдат дорө:

— Ты чего, служивый, в молодого парня вцепился? Оставь его в покое и убери винтовку. Она ведь ненароком и пальнуть может...

Салдат видзөдліс кортөм дорйысьыс былө да скөрысь өлөдіс:

— Ты еще откуда выискался, защитничек? Убирайся, не суй нос не в свое дело.

Но мөдыс эз и думайт бөрыньтчыны, а кинас вештыштис винтовкаыслысь чурвидзысь стволсө бокө:

— Да убери свое пугало, будь человеком...

Но ярмөм салдат эз көсий нинөм гөгөрвоны ни кывзыны, и дзик нин йөй моз горзис:

— Руки прочь!.. Не смей!..

Педьоос дорйысь бара кутчысис винтовка стволас да көсийс, буракө, выльысь вештыштны, өні сы былө нин веськөдөмасө, но салдатыс кутис тракйыны винтовкасө, и на костын артмис венласьом. Кыкнанныс нин винтовкаас кутчысьомәсь да оз лэдзчысьны. Сэсся салдат слөймис бертыштны да сконйыштны-уськөдны сылы паныд сулалысьөс муас. Вот сэки Миш Педьө ош моз вувзысис пыжсьыс веськыда ваас да өти здукөн лои тышкасьысьяс дорын. Мыш сайсянныс кватитис мышкыртчөм салдатөс өти кинас шошаөдыс, мөднас тасмаөдыс, вынөн кыс-кыштис асланьыс, кыпөдіс ки вылас, котөрөн матыстчис вадорас да бруткис ки-кокъяснас лягуша моз летйысьысь салдатөс ваас. Ставыс тайө артмис син лапнитігкості, но дорйысьысь роч вөлі сулалө нин, киас винтовка. Здук-мөд шемөса видзөдіс сійө то Педьө былө, то ваын болскөдчысь салдат былө да тойыштис Педьоос пыжлань:

— Быстро в лодку! Надо бежать, иначе тюрьма...

Педьө, дерт, и ачыс гөгөрвоис жө: өні сэсся колө татысь кыз-

мый позьö өдйөджык усйысыны, мед оз удитны тшапкыны найös. Педьö роч дорйысыськөд пöшти öттшөтш чеччыштис пыжас, кватитис пелыссö, а мөдыс пыж нырас винтовкасö шыбитис да мый вынсыс жö кутис зибьясыны. Дзоляник пыжныс налөн тювгис ва веркөсас лыбөдчылөмөн, быд йөткыштчөм бөрын кык-куим сажень. Кор салдат петис берегас, пышйысыс вель ылөдз нин удитисны йөткасыны. Салдат, кылө, лёкгоршөн кутис горзыны:

— Караул!.. Тревога!.. Нападение!.. Бунт!..

Салдат заводитлис вөтчыны пыжа бөрся берег пөлөныс, но потписны туйсö джуджыда да паськыда пушкыртыс бадь кустьяс.

— Каторжники!.. Вас расстреляют!.. Винтовку!.. Винтовку отдайте!..— кылө, горзис пикö воём салдат.

Эз на матын вөв ю чукыльөдз, а кыр йылас йөз тыдовтчисны, на пиын — винтовкаа салдатьяс. Найö котөрөн лэччисны горзысь ёртныс дорö. Пыж нырас зия зибьясысь Педьөлөн вель ёртыс копыртчылис, босьтис винтовкасö, кыпөдлис юр весьтас да шыбитис ваас берегланьыс:

— Берите. Нам она в данной ситуации пока ни к чему... Может, успокойтесь...

Педьö бергөдчылис да казалис: винтовкаа салдатьяс пидзöсчаниялисны да кутисны метитчыны. А чукыльөдзыс колö на зибьясыны да зибьясыны... Грымөбтис лыйөм... Мөдысь... Öти пуля, кылө, дзурскысис пыжыскөд орччөн... Бара мыш саяс грымөбтис. Пуляыс шутөвтис Педьö пель боктi, да сийö копыртлис юрсö. Ещö йөткыштчисны, ещö тювгысисны — Сидоров керка, и губернаторлөн пыжъясыс, и лыйсысь салдатьяс — ставыс коли чукыль саяс. Көть найö мыш сайын и ещö на кылис лыйөм, сийö эз нин повзьөд. Öнi сэсся өдйөджык, өдйөджык вель чукыль сайö, мед вөтчыны кө кутасны, не сюрны.

2

Вомыныс вөли верстысь на кузьджык, и көть ваыс и ёна нин ямөма, абу на гожся, джуджыд на, пелыснас йөткасыны Педьöлы эз вөв кивыв. А колö өдйөджык вуджны тайö вомынсö; вөтчыны кө кутасны, танi винтовканад найös пөткаясöс моз öктасны. Педьö нюжөдис пелыссö зибйөн йөткасысь вель ёртыслы:

— На, босьт пелыссö да өдйö сын, а зибсö мен вай. Ачым кута зибьясыны.

Пыж нырын сулалысь гөгөрвотөг видзөдис Педьö вылө да вөдзö йөткасис.

— Тэ этайö пелыснас сын,— Педьö лажъялыштөмөн гурйыштис пелыснас васö.— Сын. А палку мен вай. Öдйөджык! Скоро!

— По-русски это шест,— нюжөдис зибсö Педьöлы вель төдсаыс да босьтис сылы нюжөдөм пелыссö.— А это весло... А зовут меня Ильей. Илья я...

— Корошо. Садись да сын, а ме йөткася... А менö зовут Миш Педьö... Педөр...

— Вот и познакомились. Давай, друг Федя, давай... Поймают — не одобровать нам обоим...— ловсö личөдлытөг васö пелыснас гурйигмоз сёрнитис Илья.

— Не-е... Бежим...— эскөдана рочыштис жö Педьö.

Но век жö Педьö пыжсö веськөдис берегланьыс матөджык.

А друг берегтіыс вѳтчысясыс веськыдаласны? Сэки ковмас вѳрас пышйыны. А вѳрсьыд найѳс корсьсѳма! Сэні спасенньѳыс, мыйкѳ кѳ...

Заводитчис неыджыд коськ. Вомын кузяыс рѳмпѳштан кодъ шыльыд ваыс помасис. Водзланьыс ю пасьталаыс ваыс быттьѳ паськыд пѳртйын ыджыд би вылын жваркйис-пуис. Сѳмын ю шѳрѳдыс визулыс вѳлі шыльыд. Сэтчѳ, ва ныр визяс, и веськѳдіс Педьѳ пыжсѳ. Педьѳ йѳткасигас видзѳдіс бѳрѳ: некод сэні эз тыдав. Но сійѳ эз личѳдчы, нетшыштїс юр вывсьыс гын шляпасѳ, тувкыштїс бѳр пуклѳс костас да ещѳ на зїльдзыка, мый вынсьыс босьтчис зїбьясьны. Чикыля юрси пратьясыс сылѳн кѳтасьѳмаѳсь, лэччисны син вылас, и Педьѳ сѳмын юрсѳ пыркнитлѳмѳн мездьсылїс син сайѳдсьыс. Илья первой картузсѳ, а сэсся тэрмасьѳмѳн и пинджаксѳ пѳрччис, шыбитїс пыж нырас куйлысь кѳлуй вылѳ да бара став вынсьыс заводитїс сынны. Но пелысыс, кылѳ, гольснитїс изьясѳ, и сійѳ Педьѳ моз жѳ кутїс йѳткасьны пелыснас.

Педьѳ тѳрыт катїгас на казявлїс: Уквавомсянь кузялаыс — коськ бѳрся коськ, да дзикѳдз лигышмунїс, скѳралїс. Кѳть Изьва кузяыд коськьясыд тырмымѳн жѳ, да абу жѳ кыз танї — помся. А вот талун радлїс, мый Укваыс домавлытѳм чань моз чепсасьѳ да тѳв нырѳн нѳбѳдѳ найѳс ва кывтчѳссѳ. «Но,— мѳвпалїс сійѳ ас кежсьыс,— вѳтчысяс кѳ петїсны ыджыд пыжѳн, налы изьяс косттыс бергавнысѳ лѳѳ сьѳкыджык. Сїдзкѳ, кодьяс сюсьджыка зїбьясьсны, найѳ и вермасны. А ѳні Уквавомѳдз — некутшѳм личѳдчѳм. А сэтѳн... Ковмас дзебсянїн йылысь думыштлыны».

Бѳрѳ саялїс кутшѳмкѳ ю вом, сэсся вомын, сэсся бара изья визулїн, и Педьѳлѳн майшасьѳмыс лѳнныштїс, заводитїс зїбьясьны вьвтї ёнасѳ тэрмасьтѳг нин, но выныштчылѳмѳн жѳ: лэптас бѳрсьыс зїбсѳ да водзѳ пелька дзумгас ваас, пыжсѳ веськѳдігмоз ѳтвьесъасяс, да сьѳлѳмсяньыс йѳткыштчас и бара сїдз жѳ, и бара, пыр ѳткодя и ас кежсьыс пєслїс юрас ассъыс мѳвпьяссѳ. Татїтѳ эськѳ пышйисны, а водзѳ мый? Ачыс, дерт, гортас мунас, а тайѳ Ильяыс нѳ кытчѳ? Вот веськалїм! Татшѳмад Педьѳ эз на сюрлы да мед мѳдысь ен жѳ видзас: винтовкаясысь вед лыйлїсны, пулясыс пыж бокас дзурскакылїсны да пель боктыс шутьялїсны... Вермисны вед веськавны да вины! А мыйысь?! Нинѳм вед сійѳ лѳксѳ эз вѳч. Салдатсѳ тувкнитѳма лѳи?.. Ачыс кинас первой воис... Педьѳ эськѳ эз на и кѳсйы тувкнитны сылы да, а сѳмын ассъыс зїбсѳ нетшыштїс салдат кйись... Кѳть и веськалыштїс, эз на лыыс чєг, оз на ков винтовкаѳн повзьѳдчыны... «Дикарь пѳ»,— дум вылас уси да бара вирыс пузыылїс Педьѳлѳн салдат кывьясысь.

Педьѳ казялїс, мый Ильялѳн мыш вылас лѳз дѳрѳмыс сылї вывсьяньыс тасмаѳдзыс дзикѳдз сьѳдѳдлїс. Педьѳ и ачыс кылїс, кызди сылѳн мыш кузяыс пѳсьыс гач пѳдпушка гѳгѳрыс жѳ чукѳртчѳ да водзѳ гильѳдчѳ-писькѳдчѳ. Да абу и дивѳ: шондіыс со удитїс нин исковтны горув да вѳртас бердѳ сибѳдчыны — кык часысь унджык нин, кѳнкѳ, мый эбѳсныс зїбьясисны. Да содтѳд гожа шондіыс то мышгьяснысѳ, то шуйга бѳкьяснысѳ пѳжѳ. Ёна жѳ эськѳ лѳсьыд да гажа вѳлі талун пыж бѳжас пукалѳмѳн гыяс вьвтыс качайтчыштѳмѳн горувтѳ шливгыны-исковтны, май-

бырöй да, не этайö салдатыс кө. Мыйдта эськө позис нимкодьясьны вежөдөм берегъяснас, вомынъяс кузя рөмпөштан моз югъялысь ва веркөснас, коськъяс вылын видзөдны ваыслысь сюрс лыда эзысь дзирдъясөн ворсөдчөмсö. А öнi сэсса он весиг лысьт Уквавомад узьмөдчыны? Суны эз суны, а корсьны, көнкö, кутасны. Первой вед сэтчö и локтасны. А сэсянь кытчö? Код төдас, колөкө и оз кутны водзö корсьны? Изьва йылö вед, буди, оз кайны. Мый сэсь корсян? Педьö, кытысь ачыс, некодлы эз висьтасьлы... А кытчö Ильяыс воштысяс? Колö сылысь юасьлыны, мый водзö вöчны, да вöлисти...

Шондiыс дзебсис нин вöртас сайö да сöмын зарнийөн югзьöдiс көнсюрö джуджыд гөраөн кыпöдчысь веськыд берегсö. Регыд водзысь кывсис понъяслөн увтчөм. Илья дугдiс йөткасьны, кывзысьыштiс, бергөдчис Педьöлань, кисö нюжөдiс понъяс увтчөм шылань да, думыштчөмөн, ньöжйөн шуис:

— Это, по всей вероятности, деревня Уквавом... Нам туда заходить нельзя...

— Да. Уквавом. Надо верк Изьва катны, сразу правый...— Педьö öвтыштiс кинас веськыдвылö. Сийö көть вель уна роч кыв төдiс, грамотной морт — приходской школаын куим во велөдчис да бура помалiс, лыддысьны и гижны кужö, а вот рочыдкөд сёрнитны оз куж вөлөм. Гөгөрвоö, а вочавидзныыс да висьтавыныыс оз куж. Яндысьö содтöд. Повтөг кө эськө — висьталiс на да: сылөн со юрас план чужис да буретш колö висьтавыны. Татчö, Уквавомас, оз ков сувтлыны, а пыр колö чукыльтны Изьва катыдö, мед уквавомсаяс эз весиг аддзывыны найöс, катны Айюва вомөдз да сэтысь и корсьны шойччыны сувтлан места. Сэн, көнкö матын ю вомас, кутшөмкө чом ли, вөр керка ли кыйсьысьяслөн, колö лоны, эм. Корсьны кө кутасны найöс, некодлы юрас оз во сэтысь корсьны. Шойччыштасны да, сёрнитыштасны да, вöлисти сэсса водзö мыйкө кутасны керны.

Ылын кутiс югъявны кыа улас паськыд ва визь: Педьö гөгөрвоис, мый тайö Изьва нин, да веськөдiс пыжсö веськыд берег дорасджык. Уквалөн визув ваыс сажень кык пасьта гырысь тшупөдъяса ва нырөн ызгөмөн пырис Изьва ю шөрөдзыс. Педьö кежөдiс пыжсö тшупөдöсь визув вывсьыс посни серөн валъялысь лөнъ вылас, но пыжыс пыр и дзижнитiс-сибдiс лыа вылö. Педьö кинас öвтыштөмөн тшөктiс Ильяös лажынытчыны пыжас, ачыс чечыштiс ваас да нырсяныыс кутiс кыскыны-дзижгыны ляпкыдiнсьыс джуджыдджыкинö. Кор пыжыс кокниа кутiс плавъявны, Педьö кияснас каттыштiс-катöдыштiс пыжсö да кучик гөленя кыс юрсö ва весьтас пыркöдыштөм бöрын, мед ваыс эз вывтi кай пыжас, ачыс сölis. Вадорас уквавомсаяс некод нин эз вуджрасьны. Илья бергөдчылис Педьöлань, гогнитiс юрнас да нюмдiс. Педьö гөгөрвоис жö. Сöмын кык пон сиктланьяныыс уськөдчылисны кыр йылас да ныръяснысö вылö чатрөдлөмөн гора увтчисны пыжа вылö. Но регыд Педьöяс саялисны кыр саяс, и понъяс дышпырысь гоз-мөдысь тьявкнитiсны да сэсса öвсисны. Гөгөр чөв-лөнъ сувтiс, сöмын пыж ныр улын ваыслөн сьяльгöмыс да пелыслөн да зiблөн көрта помъяснас изъясö гольскөдчöмыс кылис. Педьö казялис, мый Илья пыжнад ва паныдтö абу на ветлывлöма. Кыдзи оз зiбйыштчы, сiдзи и дзибыртö пыж нырсö то öтарö, то мөдарö, да Педьöлы ковмылис

пыжсö бөр веськөдөм ыло джын ынсö воштыны. А водзын пыжа туйыс — ой-ой! — кызь кымын чомкост. Тадзи кө катны, өтарө-мөдарө дзибрасигад, водзö он воы. И Педьö матыстчис Илья дорö да кутис велöдны висьталöмөн да петкөдлөмөн.

— Лок сюда, ме туда сувтла. Сюда, — корис Ильяос да вежсисны местаяснаныс. Сэсся зибнас йоткыштіс нырсö ва шөр-ланьыс да висьталіс: — Оз ков тадз йоткасьны. Не так надо. Вот так надо, вот так, — пыжсö колана ногөн веськөдіс да петкөдіс, кыдзи колö зібйыштчыны, мед пыжыс водзö мунас, а оз кеж бокö. — Вот тадзи колö, водзö... Так, период. Понял?

— Понял, Федя, спасибо. Научусь.

— Понял кө, давай месте. Ты и я, месте, — смелмис да рочөн дзик нин гөгөрвоана кутис командуйтны Илья ылын.

— Бур, — нюмъялөмөн вочавидзис Илья. — А ты учи лодку вести, учи меня. Я быстро пойму.

Федя чуймыліс, а сэсся зэв нимкодь лои, мый роч морт комион шуис.

— Я, Федя, тоже кое-какие слова по-зырянски знаю. Нужно знать тот язык, где живешь.

Федялы таысь нимкодь лои: «Пыдди пуктö комисö». Найö бөр вежсисны местаяснаныс. Педьö сетіс зібсö Ильялы, а ачыс босьтіс пелыссö да заводитісны зібьясьны. Илья видзöдавліс Педьö ыло да ськөд өттшөтш ёна старайтчөмөн зіліс йоткыштчыны сідзи, кыдзи велөдіс Педьö. И артмис мортыдлөн: пыжныс налөн өдөбталөмөн кокниа кутис шливгыны берег пөлөныс.

Кор Айюва вом весьтö воисны, рытъя кыаыс кусі нин, но эз и пемдыв — асья кыа нин дасьтысис. Чусмөм рытъя кыаыскөд орччөн вөртас бердтіыс енэжыс вижөдöма-югдöма нин. Кольö здук, и сійö паськалас-паськалас, а сэсся гөрдөдас-доналас, и шонді бара быйкнитас-мыччыяс, көть и дзик на неважөн сійö Уква шуйга берег сайö нёровтчыліс-саймовтчыліс.

Педьөлөн воддза думыс Айюваö пыралөм йылысь вежсис: сувтан кө öні шойччыны, войыс коляс. А тасянь неылын нин Пожня сикт и бурджык сәті йөз узигас катны. Найос корсьысьяс кө локтасны да кутасны юасьны — некод нинөм, эз аддзывны да, висьтавны оз кужны. Уквавомын эз аддзывны, Пожняын эз жö — сэсся и колөкө корсь кысь окотаныс.

Педьö бөрийис лөсьыд изъя берег да сәтчö пыж нырсö дзажнитөдіс, ачыс пуксис бөр пуклос ылас. Илья сувтсөн видзөдіс сы ыло.

— Колö сёрнитлыны... Разговорить, — первой комион, а сэсся рочö вуджис Педьö. — Мудзин? Дальше толкать... шест — можешь?

— Могу... Конечно, могу.

— Кушать?.. Кочешь? — Педьö кинас клопйөдлыштіс кынөмас да вомнас «ам-ам» вөчис.

Илья паськыда нюмдіс да пельпомъяссö кыпөдлөмөн пөлөстліс юрсö. Педьö гажаа серөктіс, сюйыштіс гын шляпасö юрас. Вадорад лои прамöй ыркыд.

— Менам тай кынөмөй ёна сямалö-а... Я кушать. Вай пасьтась, пинджак и картуз... — тшөктіс Педьö, петкөдіс кинас пельпомъяс ылас да клопис юрас. Сэсся старайтчөмөн бөръяліс роч кывъяс: — Сейчас мало отдык, чай пей, сукари и —

фью-ить, дальше,— шутёвтіс Педьё.— Деревня Пожня идем ночь, никто нет. Солнце, тепло, короший берег и отдыхаем. Понял?

— Все понял, Федя, все правильно говоришь: если есть близко деревня, ее надо проехать, когда люди спят, а потом уже где-нибудь отдохнем. Бур?

— Бур,— серөктіс Педьё, чеччис берегё, пыж нырсыыс босьтіс чер, пөрт, лазсё. Пөртсё да лазсё колис из вылас, а чернас кайліс кыр йылас. Недыр керасыштём бөрын локтіс мездор тырыс кос пескөн, мөтыр вылө керыштём беддён да сямөд-торйөн. Лөсьөдіс бипур, перйис тасма йылас өшөдөм бивасыыс биасынсё, өтчыд-мөдысь колснитліс тывкөртнас биа изъяс — сэтысь сывкнитісны би киньяс. Педьё пөлыштіс бива тшакас кутчысьөм би кинь вылө, сійө өдйө кутіс паськавны да тшынасьны, сэсся пөлясьөмөн жө өзтіс сямөдсё. Яра сотчысь сямөдсё суюыштіс пес улас, вөрөштыштіс-лөсьөдыштіс, мед өдйөджык ломзяс, да бара кайис кыр йылас черөн. Локтіс кык кос чуркаөн, пуктіс найөс бипур бокас пуклөсьяс пыдди. А сэк кості Илья удитөма нин ва тыра пөртсё мөтыр йылө өшөдны.

Кывтігад-пышйигад нылөдөмысла дзикөдз брөд көтасылісны. Уквавомсянь катігөн киссис жө пөсьныс, дөрөмъясныс мышъяс выланыс эз и косьмывны, да тані бипур дорас пукалігөн ыркыд лои. Водзтө шонтө, а мышсяньыд йирмөг босьтө. Педьё пыж нырсыыс босьтіс шабур да кышаліс-вөнясис, а Ильяыс мыччис важиник дукөс, кодөс босьтіс ыркыд войясын шебрас пыдди.

— На, пасьтавлы, мед не колодно. А то нем вөчтөгьд колодно.

— Спасибо, Федя,— Илья босьтіс паськөмсө да плавгис пельпом вылас.

Чай пузьөмсө виччысигмоз, Миш Педьё пукаліс думыштчөмөн да видзөдіс бипур вылө. Пөрт улын гөрд кывъясыс горша нюлісны песъяссө, еджыд тшын лөня гартчис-кышөдчис веськыда да сыліс пемыдлөз енэжас. Коми зон ичөтсяньыс велаліс вөрва дорө, бипур сылы вөлі бур ёрт кодь. Гожся вадорын либө арся коз улын, көть лым гуын ноддя бокин бипурлөн трачкөдчөмыс эз сөмын вир-яйсө шонты, но и сьөлөмсө. А вот талун сэтшөм жө гажая трачкөдчөмысь бипурсө аддзис вөтын моз. И пукалө мыйлакө оз өтнас, кыдзи овліс пыр, а кыкөн, төдтөм морткөд. Куньліс синъяссө, бөр осьтіс — кыкөн.

Сылы воча, бипур мөдарладорас пукалө выль ёртыс, роч морт. «Мыйся морт сійө, нем думышттөг юрсө пудъялө?.. А ёна и лыйсьөмыс, и этш петтөдзыс зібъясьөмөн пышйөмныс — ставыс вемөсын вөлі. Сійө, торйөдчасны кө, аслас чужан Изьва вылын, уна вылө куим лун и — гортас. А Ильяыслөн көні гортыс? Нефть перъянінас өд кысянькө локтісны жө? Колө юавны...»

Педьё корсис ньөр, кокнас шыльөдыштіс лыааджык места да шыасис думыштчөм роч ёртыс дорө:

— Илья?..

Сійө кышөдчис да матыстчис Педьё дорө. А Педьё кызджык ньөр помнас гирснитіс кузь чукля визь.

— Со тайө Изьва... река... Верх — деревня Изъядор,— чуткис өтар визь помас.— Сто двадцать вёрст, шуёны. Низ — село Ижма, далеко еще очень. Я свой дом — Изъядор,— Педьё чуткис первой аслас морөсө, а сэсся Изъядор сикт пасьян места.— Твой дом... где?

— Я, Федя, издалека. Слышал город Ярославль? Вот оттуда. Я тебя понял... Гөгөрво... Если ты не возражаешь — тэ не против — мы пока с тобой, твой дом. Там сориентируюсь и буду пробираться к своему дому, в Россию. Гөгөрво? — комион юалис Илья.

— Гөгөрвои, — гогнитис юрнас Педьö.

— Не возражаешь?

— Не возражаешь... Чай пузис, вай чайсö юам.

— Вскипел... Давай чай пить. Бур, — нюмдис Илья.

— Корошо. Чай пить, — воча нюмдис Педьö, лэдзис мöтыр йылысь дзулькйон пуысь пöртсö муас, лаз нопсьыс перйис чышъян тубрас да разис сйöс. Восьтывлöм чай пачкаысь ки пыдöсас пыркöдыштіс чайсö да койыштіс пöртъяс, пöртсö выльысь мöтыр йылас здук жежлö öшöдліс, виччысьліс первой дзульксö да бөр лэдзис муас. Чышъян тубрассыс жö кулак ыджта сакар тор босьтіс да пурт тышнас кутіс колскöдны-поткöдлыны. Поткöдлöм сакар торъяссö бөр пукталіс чышъян вылас. Бара пыраліс лаз нопъяс, перйис сэтысь неыджыд мешöк, кружка да пуктіс чышъян дорас жö:

— Пей чай. Мешке сукари. Твой кружка, я делаю мой кружка, — Педьö разис нырагезйон көртыштöм мешöксö, перьяліс сэтысь чышъян вылас ид сукаръяс, ачыс бара кайис кыр йылас да пыраліс вöрас. Здук мысти локтіс кульыштöм сямöдöн, пуртнас весйыштіс кильсö да небыд сямöдтö лöсьыда кусыньтіс дзоляник чибльöгö, пурт йывнас писькöдіс кусыньтöминас кык розь да вöсньыдик вöлалöм ньöрийон вурыштіс сэті.

— Вот моя кружка, — Педьö киас бергöдлыштіс чибльöгсö да ышмöм челядь моз радліс.

— Давай, Федя, я буду пить из него, — корис Илья, а кружкасö мыччис Педьöлы.

— Не-е, — шуис Педьö да первой кисьтіс Ильялы кружкаас, сэсся чибльöгас да видзчысьöмөн ырситіс сэтысь. — Корошо, губы не горячий.

Педьö сакар торсö суюліс чаяс да гиджнитіс пиньнас, ид сукарсö чаяс жö первой көтöдыштіс, сэсся небыда курччис да кутіс чурскыны пöсь чайсö. Илья вöчис Педьö моз жö.

И пöсь чайыс сэтшöм лöсьыда визувтіс пытшкöстіныс, шонтіс вир-ййнысö налысь — кок чуњьяс йылöдзныс визйöдліс, сьölöмнысö небыда да меліа малыштіс. Куим сукарöн морт вылö и сёйисны, кылöдісны сакаралыштöм пöсь ваон — Илья кыкысь кружкасö тыртліс, а Педьö аслас чибльöгö чайсö куимысь сёлкнитліс и — кынöмыс быттьöкö пöтыштіс.

— Ну как, Федя, подкрепился? — шмонитана юалис Илья.

— Корош, — збоя вочавидзис Педьö. — Полный пузо. Екать перёд коть куда.

Илья серöктіс, чеччис чурка-пуклöс вывсьыс, мыччис кружкасö.

— Спасибо, Федя. Давай тронемся, пока в той деревне, как ты говоришь, спят. Мунам.

— Мунам... Тронемся, пока спят, — Педьö зія шуалис Илья бöрся роч кывъяссö, чукöртіс да бөр суюліс ставсö лаз нопъяс, а лазсö нуис пыж нырас. Киас чай пöртийон здук жежлö думыштчыліс, мый вöчны кольöм чайнас, да кисьтіс сйöс бипур вылас.

Сійө скöрысь джажнитіс, выlö пуркнитіс еджыд ру. Педьö выльысь пöрт тырыс ва гумовтіс да кисьталіс бипур вылас жö. Водзöсö сійö эз нин водзсась да джажгы, а нориника дзижгискусіс. Педьö мöтырнас разöдіс тшыналысь-руалысь сэрапомъяссö да корис Ильяös:

— Мöдім.

— Мöдім,— йöлöга моз вочавидзис Илья да сöліс берегсьыс лэдзыштöм пыжас.

Лöня визувтіс Изьва. Ва веркöсыс вевттьысис вöсньыдик кизьöр шебрасөн, кодкö кö эськö мöдлапöвсяньыс öні аддзыліс катысьясöс, чуймöдан серпас эськö аддзис: еджыд ру шебрас вывтійыс ва паныдсö нюдза вöрзисны кык морт, быттьö öти кузь бедь помъясö кöрталöмаöсь, найö öттшöтш лайкыда мыччысьласны морöсöдзныс да бöр пыраласны ру пиас, сöмын юрныс кольлö, бара кыпöдчыласны морöсöдзыс, мед выльысь вошлыны...

Шы ни төв. Пыж нырöн юклöдлöм валөн сяльгöм да зібъясьысьяслөн ваас тельскöдчöм шыясыс сöмын тöдчöдісны асыв заводитчöм водзвылын медся чöскыд унмөн узьысь войыслысь лöньлунсö. Педьö да Илья чöла, тэрмасьтөг и öттшöтш, зібъясисны берег пöлöныс.

Быль чукуль сайысь, верст кузя кымын вомын юрын, кыр йылас тыдовтчисны керкаяс. Илья бергöдчис Педьöлань да нюжöдіс кисö керкаяслань.

— Пожня,— довкнитіс юрнас Педьö да ещö неуна катыштöм бöрын вуджис мöдлапöлас.

Асыв-войвылын, веськыда пыжөн катысьяслы воча, кузь вомын пом весьтын, кöні быттьö юыс сэсся помасьö, енэжыс вочасөн гөрдöдіс-доналіс. Эз удитны вомын кузяыс джынсö катны, бара мыччысис вөр саяс шойччыштны дзебсьылöм шонді. Сылөн зарни югөръясыс кокниа писькöдчисны вöсни ру шебрас пыр ва веркöсöдзыс да небыда югзьöдісны сійös. Сёрмöм руыс ва веркöссьыс орöдчыны весиг эз удит — катысьяс син водзын кутіс сывны. Войнас эз и пемдывлы, сöмын берегдорса серпасъяслөн визьясыс шылялыштисны, но шондіыс бөр торйöдіс быд бадь кор, турун за, ва чераньлысь ва веркöссьыс кок туйсö. Шызис ловзис и вөр-ваыс: кыкнанладор берегас öддзисны дзольгыны-радлыны лэбачьяс, кöнкö матын гораа кöкыштіс кöк. Таво Педьö первойысь на кыліс сылысь гөлöссö. Збыль гожöм нин тай, сідзкö, заводитчис. И Изьвалөн ва веркöсыс гызис: дутдывлытөг, быттьö ваыс пуны заводитіс, чеччалісны черияс. Зібъясьысьяслы весиг сьöкыд вöлі видзöдны, водзын ыптъялісны кык шонді. Енэжас вöртассьыс муртса орöдчöма, зарниөн пöртмасис гöгрös шонді да лышкыда кояліс ассьыс шоныдсö; а ю кузяыс пыж нырсянь вомын юр берегöдзыс миллион эзысь бисерөн нюжöдчис мöд шонді и сэтшöм югыда дзирдаліс, мый катысьяслөн синъясныс кутісны доймыны.

Вомын юр куръясьыс, бадьяс увсьыс бордьяснас гораа сялькöдчöмөн кыпöдчисны кык мича горда да жбыргисны ю весьттыс ва катчöссö жö. Педьö виччысьтöмысла быдсөн лажыньтчыліс: пыж нырсяньыс неылысь и кыпöдчисны, весиг ва веркöссьыс налысь лэбзян туйсö пыжнас удитісны таявны, быттьö пицаль кö эськö ки улын вöлі. Но пицальыс Педьöлөн, кызь

көктямысод калибра централкаыс, сълөн нимкодсянторйыс, пыж нырас куйліс. Вьль централкасö кольöм во батыскöд Педьöлы ньöбисны, да дзонь руч ку дон сувтіс. Пищальыслы Педьö этша радлöм радліс нин. Дерт, пистона пищальыс бура жö вöлі инмö и ылысь босьтö. Но центра-алка-аыд! Кокньыд, оз бара пельпомъястö личкы тыр ветлігад, и лыйныыд — сизим-дас воськов сайсянь жö арся вийöртö көть дозмöртö уськөдö! Медся нин дона сійö, мый патронъястö гортад, керкаад зара-диталан кутшöм колö: урлы, дозмöрлы, либö вöрканылы вылö — посни дрöб, гырысь дрöб, картеч, а ошлы — пуля, а вöрад сöмын бöрйы, кутшöм патрон тэныд колö. Лыйин и витöдз лыддыны он удит — вьль зарад пищаль стволад!

Уткаяслөн лэбзьöмыс Педьöлысь быттö кынöмсö нюкыртіс, морöспань увсö кутіс някавны. Куим ид сукарыд тай, буракö, дзонь сутки нин регыд лоö да, жебиник пыкöд на. А со кутшöм чöскыд сёянтор ныр увсьыныс лэбис. Педьö видзчысьöмөн пуктіс пелыссö, Ильяöс кутыштöмөн вежсис ськöд местанас да лажыньтчис пыж нырас, көлуй увсьыс босьтіс пищальсö, лаз морöссьыс перйис öти патрон да пидзöсчаньöн жö и сюйис пищаль стволас да пищальнас нин бөр вуджис аслас местаö. Педьö тöдіс: öнi сэсся кымын ылöджык йöз оланінсянь кутасны ылыстчыны, сымын унджык пöтка кутас паныдасьны. Пожнясянь найö вель ылö нин катісны, да öнi сэсся и лыйöм шыыс нин сэтчöдз весиг оз кыв. А öбед вылö быть лоö мыйкö лыйны. Шойччытöг да бура сёйтöг эбöсныс налөн водзö зібьясьны оз ло.

Шондi мыччысьöм бöрас, кор кутісны меліавны сълөн шоныд югөръясыс, Педьöс унзіль босьтіс, весиг шобрöдлыны заводтіс: быттö сійö гортас нин, и мамыс ыджыд тасьті тыр пöсь яя шыд вайö сылы пызан вылö. Ильялысь казявліс душ-мöдысь шутов-шатовмунöм и. Уткаяслөн жбыркнитöмыс вöтліс унзільсö, но ки-кокъясыс и тушаыс дзоньнас — ставыс вöлі лигышмунöма. Быть колö сэсся сувтлыны. Педьö сюсьджыка нин видзöдаліс таладор и мöдлапöв берегсö, думсьыс лöсьыдджык шойччанін корсис. И дзик неылысь пожöм вылысь казяліс сьöд пöтка. Чукчи, буракö.

— Илья,— гусьөн шыöдчис Педьö. Илья бергöдіс юрсö.— Чукчи — корошей кушанньö.— И Педьö кыпöдліс пелыссö пыжас, петкöдліс, мый Ильялы колö дугдыны зібьясьöмсьыс. Илья сувтöдіс зібсö пыжас да сы вылö мыджсьöмөн видзöдіс то пöткалань, то Педьö вылö. А Педьö кок увсьыс босьтіс пищальсö, и шуйга кинас ёна видзчысьöмөн йöткасис дзик берег дортіыс. Но матыстчис лыйöмöдз да пищальсö бөр кок улас пуктіс: дозмөр вöлöма. Кыдз сійö сразу эз казяв, со кыdzi кузь голянас гоньгöдчöма. Воча шондiыс ылöдліс — сьöдөн кажитчис.

— Почему не стреляешь, Федя?— шöпкöмөн юалис Илья.

— Тайö дозмөр. Мать. Нельзя. Яйцо, маленький глукар...— Педьö корсис, корсис колана роч кыв, но эз сюр, да сідзи и заводитіс видзчысьтöг зібьясьны. «Ладнö, ачыс гöгөрвоас, абу ичöt. Тöдö вед: тулыс-гожöмнад быд энь пöтка пöжтысьö да быдтысьö».

Вьль чукуль сайысь петігөн, Педьö вылысь öнтайся горда гозъятö казяліс: найö орччөн шлывьялісны мöдлапöлас бадь кустьяс пöлöныс. Педьö кватитіс пищальсö да уткаяс кыпöдчигас нин шковгис-луйис. Бөръяыс, ыджыдджыкыс да ёнджыка басит-

чөмыс, ва веркөссьыс дзикөдз орөдчыны сідз эз и удит — чергөдчис, а мөдыс бордьяснас ва веркөсас швачөдчыштөм бөрын кыпөдчис да лэбис.

— Лэбав да быдтысь таво,— дөвөля колльөдіс видзөдласнас лэбысь уткаөс Педьө.— Миянлы и өтиыс тырмас...

Йөлөгаыс лыйөм шысьыс на гораджык чөв-лөняд лои, быттё мөдлапөв вөрсө поткөдісны.

Педьө да Илья зіля зібьясьөмөн вуджисны мөдлапөлас. Сэтчө вуджигөн нин Педьө казяліс, мый бадь кустьяс саяс вөлом вель паськыд шор визувтө юас. Педьө пыжсө матыстіс плавьялысь утка дорас.

— Бери, Илья.

Илья копыртчыліс да судзөдіс уткасө, голяөдыс кутөмөн лэптыштліс да петкөдліс Педьөлы, сэсся пуктіс пыж нырас. Ачыс өна вашьяліс.

Неуна зібьясьыштөм бөрын Педьө казяліс өзын кодьөс. «Тані кө, Пожнясянь бур чомкост, эм пыж сувтөданін,— думыштіс Педьө,— сідзкө, и кутшөмкө шойчанін эм. Чом ли, керка ли». Педьө веськөдіс пыж нырсө берегас да выныштчөмөн пыж джынсө тойыштіс берегас.

— Всё. Отдык!— Педьө пелыссө пуктіс пыжас, выныштчөмөн нюжөдчыліс — веськөдіс кияссө, коссө, босьтіс пищальсө да петіс берегас.

Вадорсянныс кыр йылас пөлөсөн кайө төдчимөн таялөм ордым. А кыр йылас кыз да кузь, сись кодь веськыд пожөм пуяс костөд тыдаліс ляпкыдіник вөр керка. Горувсянныс кажитчис, быттё сійө ляскысьөма му бердас, йөжгыльтчөма-дзевсьөма пуяс костө. Пожөмьяс костөдыс таялөм ордымыс Педьөос да Ильяос петкөдіс вель паськыд кушинө, кодөс куим боксянь кытшаліс гажа пожөм яг, а джуджыдкодь кыр горулын сьялькөдчис-визувтіс куим-нөль сажень пасьта ю. И гажа нөрысас матісянныс вөр керкаыс лои эз пу бердө куткыртчөм пөтка кодь, а тшапа гоньгөдчөм петук кодь. Первой видзөдлөмсянныс Педьө гөгөрвоис, мый керкаыс идөра олысь зверь-пөтка да чери кыйыслөн. Гөгөр вөлі лад, быдторлөн аслас места: керка водз лэбулас пу тувьяс йылын өшаліс кыйсян көлуйыс: капканьяс, лэчьяс, дзоньталөм гымгаяс — көть өні найөс вөйт; сэн жө лөсьыда көртыштөма да меститөма кысөн эжөм лызь гоз, койбедь. Педьө кыпөдчыліс кыз конда кер помысь вөчөм пуклөс вылө да босьтіс йирк плакаяс помас кымыньтөм ыргөн пөрт: сразу ковмас шыд пуны. Видзөдліс лөскас: сэтчө лөсьыда меститөма зверь куяс косьтан көлуй, бок вылас пөрөдөм джынвийө осьса вевтьяса туисьяс, чуманьяс, көч капкан чукөр. Педьө өти чуман судзөдіс да пуклөс вылас пуктіс. Вөрладорса стен бокас, бара жө неыджыд лэбулын, запес чипас — оз өти лунөн ов кыйсьысь. Педьө вештыштіс пу игансө да осьтіс керка өдзөссө. Керка пытшкөссьыс өвтыштіс са дук. Кор Педьөлөн синьясыс велалісны пемыдас, сылөн видзөдласыс и керка пытшкөссьыс пасийс керкагөгөрсө кодь жө идөрлун: кыйсьысьлы колана керкапытшкөсса көлуйыслөн бара быдөnlөн вөлі аслас места. Дзоляник өшинь пырыс пыськөдчысь югөрыс югдөдіс йөра вольөн вевттьөм нар; нарбокс пельөсас му джоджө изийсь тэчөм пач гор, а пач вом весьтас өшалісны йиркас сутуга помысь

крепитом кык кыз пу крук. Кыкнанныслон вылас кык крук, а улас отик: портто пусигад поэю улджык жар вылас лэзны и вылджык кыпдны, мед горяс оз пет сёяныс, а пусис ко — оз кдзав. Пач вом водзас кос пес, сямд, сэн жё стен бокас сартас выло ошопек. И нар улас мездор мында кос пес жё пыртома. Воча пельосас щеллю тувйыштом пеша, пеша чуньяс костас сартас пом на чурвидзис, а улын, лабичас — пеша вор. Педью думсыс откодялис асланыс улыс керкаыскд да ошкыштіс тодтом кыйсысыс: и пызансё, и лабичсё налөн моз жё конда керйыс поткодм да лэчид черөн лёсийм плакаясыс вочома, абу жё дышдчома. Сомын налөн керкаыс муртса ыджыджык лоо, вылыс джоджыс паскыджык и ошиньыс абу гаддён, а стеклоөн тупкома.

Козяиныс, буракё, важөн жё нин абу волёма — керкасыс пдм дуктор кылышто.

— Пачсё ломтыштам,— гогор видзёдлом бёрын шыдчис Педью Илья дорё.— Пусям и дуксё вежыштам — шойчыны бурджык лоо. Тэ портнас лэчывлы вала, а ме пачсё ломта. Понятно?

— Понял, Федя. Порт — котелок, что ты достал с чердака. И мне надо принести воды. Так будем и учиться. Я по-зырянски, а ты по-русски. Бур?— нумъялис Илья.

— Корошо,— вочавидзис Педью.

Илья петіс, а Педью посныджык песъяс бёриймөн сюялис пачас, аслас биасянён озтіс сямдтор да сюйыштіс сійос пачо.

И со нин лөня булькакылис портйын шыд, сылөн чоскыд ду-кыс заводитіс нырбордьяснысё пукалысыслыс гильдны.

И со — сёйны заводитісны тэрмасьтөг, шыдыс посджык на вөлі. Но вочасөн пыр оддзисны и оддзисны, сомын гора ырскөм кылис да геждика шыд пиас котодм сукар гуджгөм. Первойөн паньсё пуктіс Илья да довөля чышкалис усьяссё.

— Ак, чоскыд жё шыд артмома.

— Нөшта на ко дырджык прамөя сөйтөг тадзи зэлдчөмөн зібъясим, колөко ещө на лои чоскыджык,— нумъялис жё Педью, пуртнас шорипель вундіс тасьтё лэптом уткасё да джынсё мыччис Ильялы.— На, сэсса яй сорнас, мед ещө чоскыджык лоо.

Но водзёсё чоскыд шыд дукус некоднаннысё нин эз ышд. Илья утка коксё вильөдігмоз душ-мөдыс паньыштіс да и дугдіс. И Педьолөн потёма жё нин, да сійо портсё шыд да яй коляснас ошөдіс тув йыло лэбулас. Поттодз сөйөм бөрад унзиль кутіс личкыны да Педью весиг чайсё помөдз эз ю — первойөн порччис брөдняссё да нюждчис нар вылас. Тубыртом шабурсё пуктіс юр улас. Илья пырыс-пыр жё и вөтчис сы бөрся, но Педью эз нин кывлы сылыс ни порчысыөмсё, ни водөмсё — узис нин.



«Кывзы, другö», — шуас

Арлыд сертиыс сійö меным бура лöсяліс бать туйö. Ог тöд, кызди артмас, а пи моз и кöсья мыйсюрö пасйыштавны.

Степан Семёнович Раевский. Коми книга лэдзанинын уджаліс комын во (1948—1978): радöвöй редактор, главнöй редактор, сэсса 20 во (!) директор. Квайтымын арöссö пасйигöн öти партначальниккöд сёрни панлöма, вöчöма аслыснога разведка. Пенсия вылö петан кад пö öд менам воис, заявление гижны али мый?

— Уджав. Ми жö тэнö, Степан, ог вöтлöй.

Вунöма нин, тöлысьыс колис али эз, крапкасны: «Мун!» Забеднö, кор тадзи вöчöны. Мыйла эськö оз дасьтыны мортсö да шуны: лоас, дерт, местатö прöстмöдны. Лöсьöдчы...

Сэки ме буретш аспирантура бöрын вои. Сöмын мыччыси Сыктивкарад — звöнок. Пырав пö сёрнитны. И шуöны, миян пö эм мöвп пуктыны тэнö издательствоön веськöдлыны. Ме эг повззы пыр жö пыксьыны. Ог, шуа. Уджыс меным некымын-торйöн эз лöсяв. Öти помка дзик пыр и вöсьті: мися, финансьясын нинöм ог гөгöрво, кутшöм меысь директор! А шöр помкаыс — Степан Семёнович. Ог тöд, колöкö, кодкöд и лёка оліс, но кодöс тöдлі сы гөгöрысь, ставныс радейтісны. Син саяс, а кор нинöм да некод кö эз мешайт, и синмас шулывлім дядя Стёпаön, пан Раевскийön, Чудакön, ещö на кызкö. Сылы и миянлы быттö тадзи и коліс. Некутшöм öбида чир эз вöв! И вот сы пыдди кöсьöны пуксьöдны: артмö, быттö менам киön тшöтш мортсö вöтлöны. Эг вермы сöгласön лоны, эг вермы. Сьölöм вылад öд нэм кежлад из ли, изтор ли коляс. Кызди сэсса синмас бур ёртыслы мöдан видзöдны! Ме и панлі на сёр-



ни начальствокод. Мися, делёсö сылөн пуктöма лад вылö, быд жельторйöдз тöдö, пöшти оз на и больничнöясь-бюллетенясь — мед уджалас! Позьö вöлі та вылö воча шуöмсьыс ясыда гөгөр-воны: ставсö решитöма нин, сöмын öтитор кольöма. Кодöс выльсö индыны?

Тöдöмысь, ми эг öтчыд сёрнитлöй выль йывсьыс. Шуö меным, вештасны жö нин пö, да босьтчин эськö! Сы мында öд вöчöма уна вонад, неокота литературасö гөгөрвотöм морт вылö кольны. Ышлолалö...

Бур, мый эз ло бөлбан киö вуджöдöма эстафетасö. И районса додсьö уна во жö нин кыскысьлөн киö. Степан Семёнович вежöг-тöмөн видзöдiс мыйкö дыра да гөгөрвоис, мый делöйс и выль директорыслөн мöдöдчас. Усьпаньвыв пуксис, кызди шмонь сорөн шулывлöны.

Кор карын тöвсö олö пенсионерыд — сийö öтитор. Дзик мöдтор — гожöмнас кö ылi дачаö либö сиктö овмöдчö. Кодлыкö тöвнас бур, кодлыкö — гожöмнас. Дядя Стёпа кутiс гожöмъяссö Межадорын овны. Батыслөн ыджыд да ён на керкаын. Алексеевна гöтырыскöд да Юля внучкаыскöд сэнi гожйöны. Ов да красуйтчы эськö... Оз овсьы! Пан Раевский велалöма, мед сы гөгөр вöлі «клуб по интересам». Интересыс öти — литература. Патераыс Печать керкакöд дзик орчча да, тöвнас вöлі то öти, то мöд, то öтпыр котырөн пыравлам видлыны. Ёна радейтiс пукыштны-варгыштны да кывзыны, кызди-мыйöн ми олам.

А гожöмнад и мат! Гажыс бырас и — некытчö пö воштысьны. Юляыскöд ю дорö ветласны, вөр дорö пырыштласны... Степан Семёнович вель зiля кутiс перöөн вöдитчыны. Но öд лун и вой он гиж, дай оз быд лун жö кыскы. Перöйд тай пö тшöкыда жö «мудзлывлö». Чизрасьыс удж, капризнöй.

Кутiс ыджыд ёртöй меным письмöяс гижны. Лёкыс пинялö! Тэ, чиновникөн лоöмыд да, стариксö он кöсийы видлыны! Сьöкыд ли мый машинаад пуксьыны да Межадорöдзыд шутёвтлыны! Карас воylvлö вöлі пенсия лунъясö. Да мыйсюрö ньöбасьыштны. Локтас да, гортас сöмын на пырас — звöнитö нин:

— Тэ, чиновник!..— öзйöма, скöрмöма да тэрмасьöмысла кывйыс оз артмы.

Сиктöдзыд ветлöдлыны, «шутёвтлыны» он жö тшöкыдатö путьмы, редакторылөн уджыд (ме сийö вояссö вöлі «Югид туйын») да начальстволөн сэкся сюсь да стрöг синмыс ёнасö эз сетны вöлятö. А татчö кö воöма ёртыд, орчча керкаад котөрөн нин петан!

Пыра. Сийö менам ныр улын дженьыд чуньяса, быттö пыктыштöм кияснас тiрöдö-пыркöдö ок скöрысь... Кутыштла, топöдыштла.

— Чи-чин-овник!..

Видзöдан да, нюмыс вөрзöдыштö нин вом гөгөрсö. Здукөн ваймöма скöрлуныс:

— Кывзы, другö,— панö кутшöмкö сёрни.

* * *

Öткаөн-öткаөн кутiсны кольны йöз, кодъясöс ми мукöдсьыс вöлі торйöдамöкодь морöсаныс уна рада орден-медаль планкаяс

серти. Часто, ёна често мыччысисны сэсся налөн нимъясыс съод рамкаясын. Матө 12 во сайын медбөръяыс аслас ола-ниныс, Печать керкакөд орча патерасыс, петис Степан Раевский...

Степан Семёнович — межадорса морт, чужлома 90 во сайын, 1918 вося апрель 21 лунө. Кадыс гөгөрвоана кутшөм, но Зөтьө Семө батыс овлома аслас уджөн. Дыр узьны либө весь овны аслыс ни гөтырыслы, сэсся и быдмыштыс челядыслы абу сетлома. Олома «справноя»: кутшөмкө озырлун абу, но керка-картаыс крепыд, и скөт эм, и мукөдтор судзсьө. А водзө, кы-дзи унджык межадорсаыс, — колхоз, өтувъя овмөс. Челядсьө велөдчөмыс абу торкавлөма. Кадыс кутшөм вөлі, сы серти ставыс. Степан пиыс Коми пединститут помалас 1938 воын. Учителътө быдөн вөлі пыдди пуктө, содтөд нин сиктад. Но том велөдыс, кызь арөсыс муртса петыштөм зон, веськалас оз чужан Сыктыв вожас, а изываса нималыс Мокчой сиктө.

Бöрын, фронтөвöй туйяс бöрас нин и ещö уна во мысти, сöмын С.С.Раевский кутас тöдны, мый Яков Рочевлөн трилогия-ас Макла сиктыс сійö и эм Мокчой-Мохча. Гражданскöй война кадö сэнi гöрда-еджыда гыалөмсö петкөдлөма Яков Митрофанович.

Но кор С.С.Раевский велөдыс нимаөн сöмын на локтас школаас, СССР-ын вөлі лектор виччысьöмөн нин видзöдавлөны рытыввылө: сэнi öдйö мөдiс кыптыны дай ыджыдавны фашизм. А сійö, тöдöмыс, социализмдыкөд дыртö оз миритчы, сiдзи и тöд. Учитель Степанлы ковмис лоны салдатөн. Весиг эз салдатөн, а кужыс-тöдыс офицерö дасытыны сійöс босьтöмаöсь 1940 воö.

Гөгөрвоана, армияс и суис С.Раевскийöс войнаыс. Висьтавны кө, кытьястi да мыйта кытшлалөма сылөн фронтөвöй туйыс советскöй муыс öтдор! Норвегия, Финляндия, Польша, Германия. Гвардияса майор-артиллерист. Батарейөн командуйтöма. Сэсся дивизионын штабса начальник. Дерт, и госпитальяс. Коркө сэсся Степан Семёнович петкөдлiс меным ыджыд съод рентген лист: морöс кудсö снимайтöмны, а дзик сэнi, көнi съөлöмыс-лы колö тöдчыштны, ыджыд пуля, вуджөр кодь.

— Нач пö съөлөм бердад да, ог нин вөрөдöй, — шуисны хирургъясыс. — Кык миллиметр...

Сiдзи и нуис Степан Семёнович съöрсыйс тайö немецкöй «козинсö» кыз му улö. Фронт бöрас Раевский веськавлас партийнöй удж вылö. Морт грамотнöй, йöзкөд сёрнитны кужö, найöс гөгөрвоö — ставыс быттьökö лючки мунö. Но öти пöраö кодлыкö абу кажитчöма, тыдалö, аслас веськыдлунөн. И локтас Степан Раевский Коми издательствоö радөвöй редакторөн. Да öд тöлка морттö öдйö казялöны. Издательствоыс сылы лöö мөд гортөн. Ачыс — главнöй редакторөн, бöрынджык и директорөн. Стöч кызь во веськөдлiс, кытчөдз эз ковмы пенсия вылö петны. Но и сэки на шогсьö вөлі, мед пö эськö бур киö жö веськалiс издательствоыс.

Мыйта вöчис С.С.Раевский! Кымын гижысьöс велөдiс, туйдiс, отсалiс либö көть ышöдыштiс. Коркö и меным, студенталiг-коньöралiг, судзсьыштiс сылөн лышкыдлуныс. А татшöмторйыд

оз вун. Арлыд костным мый ыджда, а быттьо нэмөвөйсе
другъяс: сяммыліс кызкө да мыйөнкө кыскыны ас дінас.

СССР-са писательяс радө сійөс вөлі босьтөмәөс кызди коми
кыв вылө вуджөдчысьөс. 15 сайө кыз и вөсни (челядьлы!)
книга комиөдөма. Уналы сійө отсаліс и критиклөн перөнас.
Литератураад өд, а критикаад, гашкө, и содтөд на, тешкодя
артмывлө.

Төд вылын дядя Стёпакөд өти сёрни. Звөнитө. Юасьө, лыд-
ди-ө ме сэтшөмтө повесът. Воча шуа, мися, дась куйлө то эськө
журналыс да мыйкө эг на сяммы босьтчывнысьө.

— Кызди эн на сяммы?! Чудак!.. Öнi жö лыдды, сэсса сёр-
нитам. Талантливөй повесът, ис-клю-чи-тель-нөй!— и брун труб-
касө.

Лун кык мысти бара звөнитө. Но, лыддин-ө? Лыдди, мися.
Бур повесът. Сөмын «исключительнөйсьө» ме нинөм эг аддзы.
А сійө — кутшөмкө усьөм гөлөсөн висьталө, ме пö мөдысь
лыдди:

— Обычнөй повестушка! Вот чудакед,— тадзи асьсө нин
шуө.

Педагог да шань сёлөма морт, сійө кызкө пырджык вөлі
томъяс пөвстын. Либö найö сы гөгөр. Тшөтш и литературнөй
геройассö сэтшөмъясöс медводз казяліс. Гижис Геня Дуркин
да Вася Манзадей йылысь, Владимир Ширяевлөн повесътъясын
нывкаяс да зонкаяс, Фёдор Мелехин йылысь... Уна рецензия
да статья гижис, уна доклад вöчліс челядьлы литература йы-
лысь, пыр висис сы вөсна. Мукөдөс тойліс посни войтырлы
лыддянтөрсö лөсьодавны, ачыс лэдзис коми школалы лыдды-
сян книгаас. Медся төдчанаторйөн лои дзоля школьникъяслы
дасътөм куим небөг. Тайö «Шондi югөр», «Асья кыа» да «Чу-
жан му» нимаяс, кодъяс өнөдз петалисны унаысь нин. Найöс
лөсьөдысьлы (1975 воö) вөлі сетөма Коми республикалысь
И.Куратов нима премия.

Издательствоын уджалігас Степан Семёнович роч вылысь
вуджөдіс быдса библиотека.

Көть и, шуи нин, вөлі бур критикөн, челядьлы литература
лөсьөдысь-котыртысьөн, РСФСР-са культураын төдчана пасйөм
уджалысьөн. А пенсия вылас петөм мысти мианлы содтөд на
воссис: йөзөдіс газет-журналын уна гырысь и посни висът. Ги-
жис найöс и карын төвйигъясö, и чужан сиктас асланыс
ыджыд керкаын гожйигъясö. Унаөн лыддисны и төдöны
С.Раевскийлысь новеллаяссö. Найö ичөтикөсь да кокныдикөсь,
кутшөмкө кыпыд да пырыс тыдалана, олөмыслы воча нюмъя-
лана кывйөн гижөма — весиг абу гижөма, а быттьо пыр-
мунігмоз пасйышталөма. Кызди да мыйсянь найö пансисны?..
Ме некымынысь веськавлі Степан Семёновичлөн межадорса
керкаас. Öтчид петкөдіс сараяс, зургис дженъыдик кыз чуньнас
лэбувланысь:

— Эстчö со чыкыш овмөдчөма, чудакед, да ме новелла ги-
жыштi. Висьтор Юялы. Лыдды, абу кө дыш.

Юля внучкаыс сэсса уна новеллаын тшөтш лөö. Лыдди ме
чыкыш поздысьөм йывсьыд да редактор синмөн (сэки «Югыд
туйын») муртыштi. Ичөтик — газетад лөсьыд сетны. Редак-
циялы колö, мед пыр выль том лыддысьысь вөлі, а челядьлы

лыддянасö йöзöдны этша мый сюрö. Гиж, шуа, ещö мыйкö татшöмсö некымынöс да вай миянлы.

— Менам эськö эм нин да,— нюмсö кутö да пызан пöвъяс чуньяснас таркöдö...

Тадзи пансис, сэсся кык небöг тыр чукöрмис сылөн татшöм новеллаыд. Бобув, шондi, кымөр, тшак, ур, пелысь, вугыр шатин... Юля да «ме» — сылөн пöльыс. Нинöм быттö абу, а лыддян, и югдыштö да шоналыштö кытiкö. Сидзи и нимтылис воддза небöгсö — «Шоныд войвыв», бöрын рочнас «Теплый север» нимөн тшöтш петiс.

Локтö син водзö öбликыс... Вашмунöма:

— А чикыш позтö помнитан? Эн кö сэки ошкышт, гашкö, мукöдсö эг и гиж!

Пöръясян, дядя Стёпа, гижин! Сэсся кутшöмкö кывйөн на-рошнö вöли крукыштан, öдйö ваймысь характерсö бура нин тöдан да. Сийö кыз öзъяс-пузяс! Но щöтя Зöтьö! Здук мысти дзик мöд. И чужöмыс, и гөлöсыс, мöвпнас и.

— Кывзы, другö...

Сэтшöмөн и колис миянлы. Пеляд воддза моз кылö: «Кывзы, другö».



Кузь туйо петигон

В И С Ъ Т

Митипер дядь локтис удж вылысь, кильчө помас на коскөдзыс пөрччысис, пачсьыс көшөн петкөдіс дэбыд ва да майтөгөн мыськис сьодасьом кияссө. Кисө косөдөм бөрын ветліс юкмөс дорө, вайис сэтысь көдзыд ва ведра да кисьтис мыссян дозьяс. Первой мыськис чужөмсө, сэсся упкигтыр зыраліс көдзыд ванас сьылісө, морөссө, кыгчөдз судзис — мышкусө. Пыр жө лөсьыдджык лои, а то ывлаыс жар и мастерскөйын жар, лолавны нинөмөн. Во дас нин сійө, көть и пенсия арлыда, механикалө совхоз мастерскөйын, но татшөм жар гожөм помсө оз помнит. Мыссьөм бөрас пукалыштис кильчө лабичын да вөлисти пырис керкаас.

— Но и жар талун... Төрыгтя дорысь, буракө, жарджык...— пыригмозыс шуис сійө.

— Пөжө тай... Вермас шерөн зэрны,— шыасис гөтырыс.

— Шер не шер, а татшөм кө ещө лун-мөд лоө, ставсө косьтас-сотас. Көдзөм турун и то лёбзьөма.

Митиперлөн Олдогтя гөтырыс, не арлыд сертиыс пөрысьмөм чужөма, но визув на, пукаліс шөр өшинь дорас лабичын да дөмис верөсыслы дөрөм.

Кор помаліс, дөрөмсө суйис шкапө, а пызан вывсьыс мыччис письмө.

— Со письмө вайисны... Челядсянь, тыдалө. Поштальон Огаш висьталіс, Москвасянь пө,— гарыштис Олдогтя да письмөсө пуктис пызан вылас. Митипер дядь зеркалө водзын сынасис, сэсся пыркнитис дөрөмсө да матыстчис пызан дорас. Сэні нюжөдліс кисө да судзөдіс пельөс джаджсьыс өчкисө, лолыштис сы вылө, дөрөм бөжнас чышкаліс стеклөяссө да вөлисти пуксис пызан сайө. Тэрмасьтөг осьтис письмөсө да заводитис лыддыны. Лыддис ас кежсьыс, корсюрө мыйкө шөпкөдаліс вомгорулас. Письмөыс, буракө, эз гажөд Митиперөс, чужөмыс сылөн вочасөн зумышмис, плешкас лоисны содтөд чуқырьяс.

Гөтырыс сулаліс сы дорын да синсө вештывтөг видзөдіс верөсыс вылө. Сійө, дерт, пыр жө казяліс, кыдзи вежсис верөсылөн чужөмыс, да сэк жө думыштис: мыйкө челядкөд неладнө. Юавны нинөм эз юав, но төждысяна виччысис, мый висьталас Митипер.

А Митипер помаліс лыддыны, босьтис өчкисө да письмөыс-көд тшөтш пуктис пызан помас.

— Мый нө вомад ва босьтін?— эз вермы терпитны Олдогтя.

— Натальыд гижө,— шуыштис Митипер, сэсся бөр өчкиасис да кутіс выльысь лыддыны письмөсө.

— Да мый нинөм он шу?— горөдіс Өлдөтя.— Лыдды вай гораа...

— Мый лыддыныыс?— Митипер ышловзис.— Свадьба кеж-лө лөсьөдчы. Пиыд пө гөтрассны көсйө... Натальыд корө воыны Москваас...

Өлдөтя тайө юөрысь шогө эз усь. Сійө важөн нин думайтис, мый пиыслы кад нин гөтрассны, семья лөсьөдны. Гөтыртөг олөмыд — абу олөм, да ещө учёной мортлы. Быдтор вермас лоны... Слабог, абу нин том, таво Выль во бөрын кызь көкъямыс нин талялас. Институт помалөм бөрас Москваө колисны, кутшөмкө кандидат нин пө... Весиг ичөт чойсө, Наташаөс, нүөдіс ас дорас велөдчыны. Регыд нин и сійө институт помалас. Сідзкө, слабог, ставыс лючки-ладнө. Мыйла сылы не гөтрассны? Самөй кад, а то сідзи и вермас пөрысьмыны...

— А тэ мый шогө усин? Али абу рад?— Өлдөтя сюся видзөдліс шөйөвошөм верөсыс вылө.

— Мыйла абу рад, шуан? Ме думысь, водз на радлынысө. Натальыды невестаыс зэв абу кажитчөма... Сы вөсна и корө, мед торкны свадьбасө.

— Мый сійө гөгөрвоө?! Ачыс на челядь мывкыда. Юрас төв шутялялө.

— Сідзтө, гашкө, и сідз... Но зэв нин ёна кулитө невестасө. Сэки и Өлдөтя зумыштчис, но век жө шуис:

— А тэ лыдды, лыдды письмөсө, мый пыксян?

— Лыдды, лыдды! На ачыд лыдды, колөкө,— босьтис письмөсө да вештис гөтырыслань.— Ачыс учёной, кандидат, а невестаыс пө кокни мывкыда. Уджалө пө ресторанын официанткаөн... Ноко, вайлы письмөсө,— нюжөдіс веськыд кисө Митипер.— Со тай гижө: «Өтчыд Витя нүөдіс менө рестораназ ужнайтны. Кор волас гортө, оз сэтшөма веглясь. А сэні? Быдөнлы нюмъялө, копрасьө, веглясьө. Мавтчөма да пудритчөма сідзи, быттё мас-каа. Ме кымынысь шулі Витяыды: татшөм кикимера вылас он жө гөтрась. А сійө сөмын сералө. Оз кывзысь менсьым. Волөй татчө да өлөдөй сійөс, мед оз гөтрась сы вылө, а то сёр лоө. Гыр-дзаыд пө матын, да он курччы... Загсө шыөдчөм нин сетөмаөсь. Ачыс нинөм тиянлы оз гиж, көнкө, сөмын свадьба вылас корас...»

Өлдөтялөн доршасис синваыс. Сійө босьтис письмөсө кияс, но лыддыны эз кут, бөр пуктис пызан вылас, а ачыс ыджыда ышловзис:

— Сідзкө, невестасө абу ас сертиыс бөрийөма...

— Гашкө, и... Нинөм, юртө эн өшөд,— Митипер видзөдліс гөтырыс вылө.— Мый нө? Ветлам али мый? Натальыд тай корө... Витя пиыд эськө оз кор да... Тшапмөма, гын юрид... Учёной лоөма... Быттё эг ми сійөс быдтөй да велөдөй,— аслыс ныр улас броткис Митипер дядь, сэсся пуксис лабичас өшинь дорас да кутіс ротшйөдлыны чуньяссө,— кор скөралө, век сійө тадзи вөчө.

Кор неуна такалыштисны юөрсьыс, гозъя пуксисны орччөн да кутісны гадайтны: мунны али не мунны? Первой өтвылысь видісны писө, мый өдтортчис гортсьыс, бать-мамсьыс. Квайт во чөжөн өтчыд на воліс гортас, да и то тшук кежлө, быттё эз отпускын вөв, а командировкаын. Збыль өмөй налөн пиыс, ве-жөра морт, учёной, босьтө гөтырназ шогмытөм нылөс? А гашкө, ачыс Натальыс эз ставсө бура төдмав да төдтөгыс суклясьө?

Да өд бура кө думыштлыны, сійө абу жө паныд вокыслөн шудлы? Сідз да, тадз да, этадз да, эсідз да. Көть мый эз ло, гозъя шуисны ветлыны видлыны чоя-вокаос. Майбыр, кадыс эм, картупель босътны оз на ков.

Ыджыд карын чоя-вока олісны өтлаын, Витя квартираын. Нинөм, оз вошны... Өлдөтя көть и райцентрысь ылөджык некытчө на эз ветлы, зато Митипер дядь уналаын вөлі, кык во сайын весиг пи ордас гөститіс и.

Өні гозъя пукалісны чөла да думайтісны, мый вөчны, мунны али не мунны? Шуны кө нин веськыда, кыкнанныслөн гудрасис сьолөмыс, кыкнанныслы неокота вөлі вөрзёдчыны гортсыс.

— Митипер, шу мыйкө! Мый он сёрнит? Ковмас нин, буракө, ветлыны, али эновтчыны?— дыр чөв олөм бөрын шыасис Өлдөтя, а ачыс друг думыштіс: кутшөм ставыс төдтөм лоө ыджыд карад, да ещө Наталья шуө, мый ковмас пө мунны пыді му пытшті, метроөн!

Митипер дыр нинөм эз шу. Пызан вывсьыс сійө босътіс письмөсө, бөр суйис конверт пытшкас, сөмын сөдзөдіс:

— Думайт, эн думайт... Рөднөй челядь өд...— сэсся бергөдчис гөтырыслань да содтіс:— А тэ, Өлдөть, думышты, мый босътны гөснеч пыддиыс... Куш кйөн сэтчө он лок...

— Мый и босътнысө? Сэні, майбыр, көнкө быдтор эм, абу миян лавкаын моз... Картупельтө да шома капустатө он ну. Сераласны. Чери-ййыд сэні, пөди, тырмө. Көрсө эз вунөдны.

— А тэ вот чери-ййсө и лөсьөд. Час, ме кайла лөскө да бурджык кос яй торъяс бөръя. А тэ лэччыв көбрегад да торйөд бөръя кыйөмсьыс гырысджык чериас. Аски пөжасьышт... Рыска шаньга, сөчөн, черинянь. Суткинад оз тшыксьы... Гортса гөснечыд медся на любө: сійө бать-мам керкаысь, көні найө чужисны да быдмисны. Мед найө уськөдасны төд вылас: тані налөн эм бать-мам, чужан пельөс, ас рөднөй горт... Значит, сідз! А то шуан...— Митипер чеччис да лөсьөдыштіс дөрөмсө:— Тэ, Өлдөтя, лөсьөдчы, а ме ветла управляющөй дорө, вөзйыся недель кезлө... Да и колө төдмавын, кутшөм машинаыс аски карас лэччөны.

Няньшом гудралөм бөрын Өлдөтя пырис комнатаас, восьтіс платтө видзан шкапсө да кутіс думайтны, мый эськө сылы пасьтавын. Гортад көть мый пасьтав, некод оз дивит. Да и коді кутас видзөдны олөмаясыд вылө? А Москвад, челядь дорад, дзик мөд делө, лөк паськөмөн сэтчө он мун. Да и челядьдылы лоө яндзим, лөка кө пасьтасям: шуасны, паськөм пө тиянлы ньөбалам-ньөбалам, а онө новлөй. Аслыс перйис шкапсьыс вөс-ньыдик еджыд шерстянөй ковта да кельыдлөз платтө-сарапан. Митиперлы перйис руд костюм да дженьыд соска еджыд дөрөм, идзас шляпа да сандалет-тупли.

Өлдөтя сэсся петавліс суседка ордас, корис сійөс ветлігкостыс вердыштавын порсьсө да видзөдлывыны град йөрас, мед көзаяс сэтчө оз пырны. А бөр воис да, Митипер гортын нин вөлі. Ужнайтіганыс кыкнанныслы, буракө, сөяныс эз пыр. Өлдөтя гоз-мөдысь вилкинас чуткыліс пөжөм чериас. Митипер юис сөмын стөкан чай.

И войнас майшасис, унаысь чеччыліс. Эз узьсьы — дай пом. Дыр на думайтіс, кыдзи кутас сёрнитны пиыскөд...

Асывнас, кыдзи и сёрнитчисны, өшинь улас сувтіс ыджыд машина, кодён карысь ваялёны совхозлы удобренияяс. Шофёр-ыс, Юркин Федя, ар комына шутилив морт, петіс кабинасыс да улөдз копыртчыліс пассажиръяслы:

— Никифор Иванович да Авдотья Петровна, сёлөмсянь кора пуксьыны таксиё. Часён лэччөда вокзал дорөдз, мед ті онө сёр-мөй поезд вылас,— мунысьяслысь чемодансө өккуратнөя лэптис кузовас, а асьнысө тшөктіс пуксьыны кабинаас да сумкасө босьтны сьорсьыс.

Федя — варов морт, мукөдъяс моз эз немөяв, мунігад ськөд гажыд оз быр.

— Но, мөдөдчим!..— вөрзьөдчигас горөдіс сійө, сэсся юрсө бергөдліс Митиперлань да юалис:— Мый, Иванович, Витяыд пө гөтрась?— сэсся быттьө ачыс жө вочавидзис:— Бу-ур... Кад нин!

Федя бура төдіс Витяөс. Сөмын кык арөсөн ыджыджык сыысь. Найө быдмисны пөшти өтлаын. Но юалис, быттьө оз төд:

— Кымын арөс нин сылы?

— Төвнас, Виль во бөрас, тырис кызь көкъямыс...

— А меным кор вөлі сы мындаыс, менам кык челядь нин вөлі... Кад нин, ка-ад...— нюжөдіс шофёр, сэсся друг содтіс:— Ми Ленакөд коймөдөс нин виччысям...— Федя өзтіс папирос, но сёрни эз дугөдды:— Регыд том бабаыс сылы пи ваяс... Бара праздник. Бара ковмас тьянлы ветлыны внуктө видзөддыны...— Сэсся папироссө вувзис өшинь пырыс да кутіс ошйысьны:— Км... Менам вот ичөтджыкыс сэтшөм быдмө... Лукав и, мудер и. Век ыждаля да мыйкө корө; то тайөс сет сылы, то сійөс вай, то эті-йөс мыччы. Мамыс дзик матө воис. Быдмас да, буракө, началь-никөн лоас.

— Гашкө,— жугыля вочавидзис Митипер.— Челядьыд тай век бать-мам вылас мунөны.

— Дугды, Митипер дядь,— Федя топыдджыка кутчысис ру-ляс.— Ме бара сы кодь эг вөв... Кыдз нө сійө, бать-мамлысь не кывзысьны?..

Машина петіс сиктысь. Асфальтируйтөм туйыслөн өтар-мөдар бокас шылькнитчөмаось муяс. Отарас, лун бокас, көдзөма турун, мөдарас — пуктөма картофель.

«О, господи!.. Мый бара өні вөчсьө муяс вылас?!»— думайтіс Митипер, а сэсся, быттьө важсө казытыліг, негораа шуис:

— Да-а, Федя, тэ пөди төдан на? Со татчө, лун бокас, вөйдөр миян колхоз көдзліс, өзимөй шобді... Мөдарас — сю да ид. О-о! Кутшөма няньыс быдмыліс! Шобдісө тась босьтлім кызь вит—комын центнерөн! А өні мый? Турун вөдитөны, а йөв да яй лавкаын оз овлы. Муяс вылө турун көдзөны, а Сыктыв бокө джын виддзыс пуктытөм кольө. Колхозлөн сы мында машинаыс эз вөв, но некутшөм удж эз эндыв. Ставсө вөчлім асьным. А өні тулыссянь арөдз сідз шусяна шефьяс уджалөны... Видзьяс и муяс вылын карса йөз. Да налы өд веськодь, уна-ө да кутшөм турун лоө, мед сөмын кадыс колис... Вөйдөр, коді вермис легны, ставөн вөліны видз вылынөсь... А өні пөрнөй нывбабаяс лызья-лөны гортас... Йөз серам жө эськө да! Да и мый сійө кутас уджавны совхозын, кор аслас усадьбаыс сійөс вердө и юкталө. Быдтө картофель, совхозлы жө сійөс вузалө да ещө кык-ө-куим

порсь видзё. Бара жё денёга... Да и мый порсьяссё оз видз, кор лавкаас няньыс тырыс, коть быд лун пуд босьт...

Машина журёдіс водзё. Федя мыйкё кёсийс шуны, но эз лысьт торкны Митипер дядьёс: сиктын сійёс ставён пыдди пуктёны.

— Сідзтё — сідз, но нинём он вёч! Ёні ставсё машина вёчё... — шыасис жё тай Федя. — А йёзыс мый? Пенсия — закон серти, сідзкё законнёя шойчёны.

— Сійё и эм, мый ставсё — машина... Кыті да кор позьё, колё, дерт, машинаён... Тэ вот быд лун карысь кыскасян... А тэ вот коркё лэччыв да видзёдлы, кызди тракторыд ытшкё да кызди боковёй йёзыд уджалёны... Сідз вот. А шойччыны? Мед шойчёны, кор уджыс абу. Вайдёр крестьяниныс шойччыліс сэки, кор туруныс вёлі зорёдын да няньыс йёртёдын...

Ёлдётя тувкис верёсыслы бокас: эн пё сёр нем абусё. Кор шоссесё кыкнанладорсянныс топёдіс вёр, Ёлдётя яндысьёмён видзёдліс Федя вылё да корис сувтёдлыны машинасё.

— Мый нё он висьтав, ме эськё важён сувті, — шыасис шофёр, кежис дзик туй бокас да личкис тормоз вылас. Машина сувтіс. — Вай, тьётка, пырав вёрас, видзёдлы, эм-ё таво тшак-вотёсыс?..

Кор Ёлдётя бёр локтіс да пуксис машинаас, чужёмыс эз нин сэтшёма чукрась, вёлі гажаджык... Федя лэптыліс шуйга кисё, видзёдліс часі вылас да мёдёдчис водзё. Митипер пукаліс чёла да мыйкё, буракё, чорыда думайтіс. Корсюрё шочиника видзёдлываліс гётырыс вылё да думнас жалитіс сійёс: «Гашкё, эз ков вёрзёны места вылысь?! Коньёрой мучитчё кынёмнас, да ещё майшасьё челядьыс вёсна... Сылы, майбыр, быдтор жё сюрлі, быдторсё жё нуис ас вывтыс... Мужикъястёгыд медся сьёкыд уджъяссё ковмис вёчны... Ставсё терпитіс да война бёрын сылы, Митиперлы, ныла-пияёс козьналіс. Сёмын вот ёбиднё, мый найё ётдортчисны гортсьыс, энвотісны пёрысь бать-мамсё. Но ладно, Витя мед эз лок, сійё ыджыд мортён лои... А мёдыс? Наталь велёдчё учительё да оз и думайт гортё локны! Быттьё миян сиктын оз позь учителявны».

Пукалё Митипер да ышлолалё: «Кутшём бес менё вёрзёдіс гортысь? Быттьёкё локтём бёраным Витя вежас ассьыс думсё. Том дырйи ми быттьё ёна кывзысьлім бать-мамлысь... Свадьба вылё кё эськё корисны, сійё мёд делё».

Сійё дась вёлі сувтёдны машинасё, бёр подён бергёдчыны гортас. Но ёні кысь нин! Со тыдалёны нин кузь трубаяс, джуджыд керкаяс, вот-вот карё пырасны. Ёлдётя, тыдалё, думнас Митипер моз жё каитчис, мый весьшёрё вёрзис гортсьыс.

...Федя виччысьтёг зём сувтіс. Гозья, асланыс думъясё вёйтчёмнад, эз и тёдлыны, кызди Федя вайёдіс найёс көрт туй вокзал дорё. Вокзалбердса площадь вылын сулаліс уна машина.

Федя петіс кабинасьыс, муніс мёдарас, восьтіс Митипер гозьялы ёдзёссё.

— Воимёй, суседьяс! Извинитёй, тэрмаяс, — сэссия кузовсьыс босьтіс да муас лэдзис чемодансё. — Миян складыс тані матын. Поездыс дыркодь на оз мун. Ме грузитча да бёр татчё локта, пуксьёда тиянёс вагонас, кольёда...

Федя муніс, а Митипер гозья пырисны вокзалё. Ёлдётя чукрасис да гёгёр видзёдаліс корсис кокньёдчанін. Митипер,

дерт, пыр жö гөгөрвоис гөтырыслысь майшасьёмсö да нуöдiс залсьыс туалетö. Сэсся бөр локтiс залас да кутiс видзöдавны поездыслысь ветлан расписание, сэсся сувтiс öчередьö. Касса дорын öчередьыс вöли вель ыджыд.

Митипер чуймöмön видзöдлiс öчередь выlö: «Кытчö да мыйла та мында йöзыс быд лун мунöны? Гашкö, ми моз жö челядьныс дiнö?..»

Öчередьын сулалiгас бара юрас вирдыштiс: «Мыйла эськö ми мунам?! Да мед гөтрасьö сы выlö, кодi сылы кажитчö. Кутшöм ми сылы велöдысьяс. Миянлы öд ськöд не овны?! Натальы кö оз кажитчы, сийö нинöм на оз висьтав... Да и ми асьным мый сылы шуам? Кыдзи сийöс велöдны кутам? Велöдны, велöдны! Миянöс коркö велöдлiсны жö, но вöчлiм ас ногön».

Митипер друг петiс öчередьсьыс, пуксис тыртöм скамья выlö да, гөтырсö виччысигмоз, кутiс асьсö такöдны: «Збыль öд, Витя дорö öнi мунны нинöмла. Корис кö эськö свадьба выlö,— быть мун. Он мун сэки — оз ло лöсьыд! А öнi — мöд делö. Кор на ещö свадьбаыс лоас? Лоас-ö?»

Кор Öдöтья локтiс, Митипер шуис сылы, мый билетьяссö оз кöсйы босьтны. Сэсся варовитiсны вель дыр. Гөтырыслы нимкодъ лои, весиг чужöмыс шылялiс: сылы муннысö неокота жö вöли. Сöмын юрсö довкиöдлiс да шуалiс:

— Сё збыль, сiдзи, сiдзи... Кутшöм ми, кос шегьяс, öнiя том йöзöс велöдысьяс? Слабог, мед гөтрасьö... Сылы овнысö гөтырыскöд. Сöмын вот Натальяд жаль, бöрдö кö.

— Жа-аль,— нюжöдiс Митипер.— Жалитны сийöс нинöмла... Мед нырсö оз суй, кытчö оз ков. Воам гортад да ме сылы чорыда гижя... Думыштчöма велöдны ыджыдджык воксö! Тöv йыв бобув!

Митипер босьтiс чемодансö, а гөтырыслы сетiс сумкасö да петiс ывлаö. Пыран кильчöсянь неылö пуксисны скамья выlö да, Федяöс виччысигмоз, заводитiсны нурьясьны пöжас няньön.



А вöрыс быттьö бöрдö

ÖТИ ЮКÖНА ПЬЕСА

ВОРСÖНЫ:

СУС ПУ — куимсё арöса пöль.
КОЗ ПУ — ар кыксёа парма-ай.
КЫДЗ ПУ — сё арöса парма-мам.
ПЕЛЫСЬ — дас көкъямыс арöса венеч ув ныв.
ТОМИНИК КЫДЗ ПУ — дас квайт арöса нывка.
ТОМ МОРТ — ар комына.
РАКА — тöдысь.
ПИПУ — ар кызя зон.

Сиптыса занавес сайын кылö сьылан:

*Коми му кузя ме муна,
Гöгöр сулалö сьöг вөр.
Вöрыс вывтi, вывтi уна,
Сыысь унаыс оз тöр.*

Ылісянь муркакылö гым, сьыланыс вежсьö медводз нор, майшöдлана,
сэсся шог да дой мыччысь шыладөн. Залын пемдö, вoсьсьö занавес.
Сцена вылын сулалöны пуяс. Бушков ёсьмö, пöльтö тöв, шлячкö зэр,
гымалö, чардалö. Тайö шыясыскöд öтшöтш юргö пармалөн гөлöс.
Пуяс костын тыдовтчö эбöссö воштöм, ылалём морт.

Пармалөн гөлöсьяс:

— Кывзы! Восьта тэныг гойöс,
Эз кө пöртмав синтö войыс,
Сьöлöмнаг кө эн на чорзьи,
Вежöрнаг кө тэ эн торксьы!
— Вöлі Енмөн тэнаг пöльлы, пöчлы,
Менö видзлісны, кыз асьыс лов.
Войтыр, мый нö тiкöг вöчсьö?!
Кулö парма — мортыг дыр оз ов!
— Бушков чаг моз ставсö гартас,
Кöдзыг тöвлы морт лов — сартас.
Косьмас войтöгз паськыд ю,
Нярмас видз и эндас му.
Гудыр сынöг пöгтас ловтö.

*Коньөр муным кольö овтöм.
— Швачкöбтас кор мышкаг гым,
Сявкмунас му выlö чардби,
Тэнö неког нин оз кыв,
Мыйта гажыг, бöрг кöть няргы.
— Мөвпышт, морт рöг, водзвыв артышт!*

**Бöрьяысь чардыштiг, морт усьö коз пу кок улö. Бушков лöньö, зэр кобö.
Кöнкö ылын кылыштö на гым. Ньöжйöник югдö.**

КОЗ ПУ. Окма, пöгиб тiкöд, вошöм войтыр.
СУС ПУ. Ловъя-ö, кулöма-ö бара?
КЫДЗ ПУ. Тыдовтчас. Гашкö, мудзсьыс да повзьöмсьыс
воштiс садьсö. Ок, и зэрис да гымалiс!
КОЗ ПУ. Да... Чорыда! А миян том быдтасъяснымлы ставыс
на веськодъ, шуньöны тай, эз и кывлыны, кöнкö, нинöм.
СУС ПУ. Сийö и бур. Дженъыдикöсь на, да вермим на тай
вевттыштлыны лысьясөн, а быдмасны, да ставыс: зэр и лым,
тöв и шляча — ас вывтiныс кутас мунны.
КЫДЗ ПУ. Сiдзи.
СУС ПУ. Ок, кор нин и шондiбаныс петалас да бара на
поздысьлас менам небыд тошкö да ускö?
КОЗ ПУ. Со тай, югдыштö нин.
ПЕЛЫСЬ (*вöтасьö мыйкö, горöгö да босьтчö лыгдьöглöмөн
бöргны*). Мый тi керинныд, мый тi керин-ныд!.. Кыдзи вер-
минныд?!
КЫДЗ ПУ. Мый нö лои, дзоридзанöй? Узян-ö, олан?
ПЕЛЫСЬ (*сыркъялöмөн*). Лёк вöт уськöдчис, югыд кыддзöй,
парма-мамöй, зэв лёк вöт. Быттö льöм пуöй-чойöй, кодi тай
сикт бердас, дзик туй бокас сулалö, курыд синваөн мыссьö,
отсöг выlö корö, а некод абу. Дзикöдз нин öд кулан выйын.
Нетшкöмаöсь сылысь дзоридзсö, таялöмаöсь кок уланыс вöсни
росьяссö, урöстöмаöсь. Кулö ёсь дойсьыс, а ме нинöмөн ог
вермы отсавны?!
КЫДЗ ПУ. Энлы, энлы шогсьы, венеч ув ныланöй миян.
ПИПУ (*сагьмö, очсалö*). Ун пальöдысьöй, вöтыд вöт на и эм.
А збыль вылас, кöнкö, ставыс лючки.
РАКА (*кыськö виччысьтöг шняпкысьö му выlö*). Кар-р, нинöм
он кар! Збыль тайö ставыс... Төр-р-рыт на, гым-зэрöдзыс, кар-р,
төр-р-мис сьölöмыс льöм пу чойыдлөн.
СУС ПУ. Тэ нин, дерт, ставсö тöдан!
РАКА. Тöда! Öнi сэтшöмтор-р висьтала, йир-р-мöг ставнытö
босьтас. Кар-р-кар-р-рöдз вöйдөрлун лэблi, кык-ö-куим сикт
гөгөр-р-тi. Ъдждыд уськөттö суöма дзордзалысь пуястö. Аддзи
кар-р-раул! Төкөтö садьтöг эг усь. (*Казялö куйлысь мортöс.*)
А этийö нö кодi?!
КОЗ ПУ. Садьсö жö воштöм морт, вермас лоны, чардби
вөтöдiс сийöс.
РАКА (*матыстчö*). А гашкö, кар-р, чар-р-гöдiс да? (*Кыв-
зысьö.*) Ловъя, лолалö. Буракö, кылö ставсö, сöмын шыасьнысö
выныс абу. Кар-р, абу жö кö тыр-р сюсь-а? Кодi нö öтка пу
улö чар-р-далiгас суйсьö?
ПЕЛЫСЬ (*скöра*). Но, ловъя кö, мед и кывзö миянлысь

шогсьём-норасьёмнымös, гашкö, вежöрыс югдас да висьталас аслас морт рöдыслы, кутшöмджык миян татчöс олöмным!

РАКА. Да, да. Мед мор-р-рт р-р-рöдыслы юör-р-ртас...

СУС ПУ (*ракалы*). Но тэ, рака, кар-р-зін, кар-р-зін мыйкö тані, кар-раул горзін, а кутшöм ускöттö суöма, сідзи тöлкөн эн и висьтав.

РАКА. Ой, эн и казътив! Пöшти став дзоридзалысь пусö кодкö тöбöма еджыд рузумөн быттö кагаös, кок увсяньныс да юр вылöдзныс гартöма пеж черань везйөн, сы пыр пуыслөн лычыс сöмын öдвa и тыдыштö. Кор-р ни чвет. Быдладорсянь везъялöны, гашкö, сё миллион номыр, мурксьöны сöмын, уялöны ёрта-ёрт вывтіныс. Тыпу! А наысь еджыд бобувьяс чужöны. Еджыд кымör моз лэбзьöны татчань.

ПИПУ. А мый нö йöзыс? Оз мöй аддзыны? Мыйла оз мездыны, бурдöдны висьöмсьыс? Öд сійö жö льöм пуыс да пелысьыс мыйта пöрöсысь мездö мортсö?

РАКА. Кар-кар вылад ме ог тöд, а сиктъясaд татшöм пуястö кер-р-алöны, кыскалöны бокö да сотöны.

КЫДЗ ПУ. Ойя жö, ойя, мый нö тайö му вылас лой?!

РАКА. Ог тöд, мый и кар-р-сьыссьö, лэбла да видзöдла, вошöм морт йывсьыс юör-р-та.

СУС ПУ. Олöм тай лой! Куимсё вонaд мыйсö сöмын эг адзыв да кывлы. (*Кылö тöвру шы.*)

ТОМ КЫДЗ ПУ (*садьмö. Тöврулы*). Этія, кокни руаыс, бара менö садьмöдіс, оз тай сылы узьсьы, ме дінö и сибöдчö. Дугды! Ме ог радейт тэнö, ме пипуös радейта...

МОРТ (*воö ас сагяс*). Көнi ме?

КЫДЗ ПУ. Но, нöшта öти паляліс. (*Мортлы.*) Парма вöрын, бур мортöй.

МОРТ. Ме нö ловъя, али вöt тайö?

КОЗ. Ловъя.

МОРТ. Кодi нö тайö мекöд сёрнитö, оз-ö нин пуясыс?

СУС ПУ. Ми.

МОРТ. Со кутшöм тi джуджыдöсь, вынаös, а ме моз жö, вынтöм морт моз, синваныд киссьö. Мыйла?

СУС ПУ. Мыйла?! Кор тэнсьыд оланінтö чаштьясны да сотасны, тэн гажа лоö?!

КОЗ. Да... Парматö дойдöмыд кага дойдöм кодъ жö.

МОРТ. Мойд кутшöмкö... Водзтi ме эг гөгөрвоны тiянсьыныд сёрнинытö, а öнi...

СУС ПУ. А öнi кывзы! Пока сямман гөгөрвоны миянлысь кыв-ворнымös. Регыд тэ бөр веськалан гортад и лоан сэтшöмөн жö, кутшöм став морт рöдыс.

МОРТ. Ок, кутшöма юрöй бергалö и кокъясöй пу кодъöсь.

КОЗ. Куйлышт косінас. Воас кад, и сувтан кок йылад.

СУС ПУ. А öнi кывзы! Меным вöлі сё ветымын ар. Тані шувгыліс сус пожöма вөр, вöліны, дерт, и мукöд пуяс, но сус пуыс — уна-уна! Ок и мича да ён вöлі парманым. Озыр вöрса пемöсөн, лэбач-пöткаөн, тшакөн, вотöсөн. Öтсöглас овлім и важ войтырыскöд. Быдöнлөн вöлі ас вöраланін, чös туй, вөр керка. Ковтöг эз пöрöддыны ни öти пу, эз дойддыны том чаль, эз керыштлыны ув, эз вилыны ковтöг да кад тöдтöг пемös ни пöтка. А пармам вердліс и видзліс найös быд ускöттöысь.

ТОМ КЫДЗ ПУ. Öнi нö көнöсь тэнад мам-батыд, чой-вокыд?
А, Сус пöль?

СУС ПУ. Сотчисны.

МОРТ. Кывлi ме та йылысь важ йöзсянь.

ПИПУ. Кыдзи нö тадз? Кодлөн кийс лыбис?

СУС ПУ. Пöрысьмис, кувсис шань кöзьяинным, тырисны чöс туйясыс, гежöда кодi воывлис татчöдз. Öтчид тыдовтчисны тöдтöм войтыр: зумыш чужöмаöсь, лөг синмаöсь. Овмöдчисны вөр керкаö. Медмича сус пусö перво пөрöдiсны. А сэсся мый заводитчис!..

ТОМ КЫДЗ ПУ. Мый выlö пөрöдiсны?

СУС ПУ. Кольсö мед чукöртны да вузавны... А сэсся зыксыйны мöдiсны, ог тöд, мый и юкисны. Войнас öти на пиысь петiс керкасыс, топыда игналис öдзöссö да öзтiс. Кыкыс сотчисны пытшкас, а коймöдсö ме некор нин эг аддзыв... (*Кост бöрын.*) Биыс паськалис. Медводз чайтсис, быттö став пуыс öзйöны öт-кодя. Збыль вылас быдөн сотчисны аслысног. Кыдз пу эз кöсйи сетчыны азым биыслы. Лёк дойсыс потласис, чукрасис еджыд сямöдыс, сьöдöдiс ставнас, трачкис, чишкис, и сöмын сэк, кор нин биыс воис сьöлöмöдзыс, öзйис ставнас онялан жар биөн. Веж пипу быттö ворсöдчис биыскöд, кажитчис, ылöдлас сйöс, мездыяс. Медводз сылисны веж корьясыс, тратшкерисны-лэбисны бокö вöсни росьясыс, быттö пуыс ачыс скöрысь öвтыштiс найöс дiнсьыс, мыйла сэтшöм öдйö сетчисны биыслы. Со нин пемыд тшын ру гаровтiс сйöс ставнас, кумач кодь гөрд вөнён уйлалис сы вывтi биыс: вошлас здук кежлö и бара тыдовтчас мöдлаын. Тшын пырыс ворсöдчисны биа кывъяс, нюлисны этшсö, писькöдчисны пытшкас, и здук мысти пипу упмунiс увлань, лыдтöм би югөр койыштчис енэжлань. Медбөръяöдз сулалисны сус пуяс, найö вывлань лэптiсны öзйысь шапкаяснысö, мый вынсьыс нюжöдчылисны енэжланьыс, быттö кöсйисны ордчыны мусыс да кыпöдчыны вывлань. Но биыс сötис найöс шомöдз. А ме сулалi ёна бокын...

МОРТ. Но татшöм шог да дой вöчысьястö и мортнас шуны грек. Пышйысьяс, көнкö... Морт виысьяс, шышъяс...

СУС ПУ. Шышъяс, шуан?! Ме тöдлi сйö кадсö, кор ловъя на вöлi татчö вөр керкасö лэптысьыс, Опонь Вань Илля...

МОРТ. Тайö жö батылөн пöльыс! Со и ме локтi ылисянь, ме-дым корсьыны сылысь чöс туйяссö, быттö вирöй кыкис татчö, тöдтöминас. Шондiс кусi, и тöддытөг гудыртчис-воши петан туйöй. Сидзкö, тайö и эм сылөн вöраланiнъясыс?

СУС ПУ. Сылөн. Но кывзы водзö... Öтчид вайöдлiсны татчö гусясысь морттö. Кияссö кöрталiсны кузь майөгö и колисны. А вöрас номйыс... А пуясыс сэтшöм тшöкыда быдмöны — воськов он вöч. Ог тöд, мый вермис лоны водзö, да лёкгорш горзыны кутiс мортыд, прöшша корны. Мездiсны. Сэсянь ме шыштö эг аддзыв.

КОЗ. Этшсьыс петöм йöз слöймылöмаöсь, ёрта-ёртнысö кö нин виöны. Мый налы вөр-ваыд. Пемöсысь омöльджыкöсь!

КЫДЗ ПУ. Но сэкья кадас сэтшöмыс лыда морт на вöлi. А öнi? Сё ветымын во öд коли. Кöрт вöвъясөн нин пондiсны кеслынынырны мусö, а мыйта вөр ковтөг пөрöдöны да сiсьтöны! Тшын дук быдладорсянь вайö. А сынöдыс! Регыд вотöс ни пемöс оз

коль. Зэр бõрын и корйыд сотчõ. Оз и мõвпыштлыны: чегõны, кералõны, талялõны, а кутшõмджык сййõ вужъясьõмыс, ловзьõмыс, кыпõдчõмыс!

ТОМ КЫДЗ. Мамукõй, а кыдзи нõ эськõ ми татчõ воим, куштõминас? Ми õд ог вермõй йõз моз ветлыны.

КЫДЗ. Тõнад дузъялысь тõвруыд, гашкõ, и вайис менõ татчõ. Аддзывлн тулыснас, кутшõм мича исерга ме пасьтавла?

ТОМ КЫДЗ. Аддзывлн.

КЫДЗ. Сййõ исергаыс и эм миян кõйдысным. Ас кадõ, кор муыс нин шоныштас, а пуясыс оз на удитны лэдзны коръяссõ, кõйдыснымõс кокныыдик бобувъясõс моз тõлыс разõдõ-лэбõдõ му вылõ. Ылõдз лэбõдõ, а тэ шуан, места вылын сулалам; йõюк, быдладорын красуйтчõны еджыд кыдзьясыд. И мукõд пуяс. Коймõд юкõнсõ муыдлысь мичмõдõ вõр.

ТОМ КЫДЗ. Да? Сидзкõ, менам эм уна-уна чой?!

КЫДЗ. Ог тõд, уна-õ абу. Ок, этша кõйдыс волõ коланаинõдз. Õтиясõс нõбõдас юõ ли нюрõ, сэнн и пõдõны коньõръяс, мõдъяс воасны из вылõ, бара жõ кулõны, коймõдъяслы туй джын нин и кольлõ муõдзыс, а тõлыс койыштас найõс керка вевт вылõ, да сидзи и косьмасны, нельõдъяс лэччасны гõран му вылõ, чужласны нин, а найõс нетшыштасны. Но, шуам, вужъясысны, муртса на и удитасны мыччысьны том быдтасъяс лõсьыднн, а кутшõмкõ гаг ли пемõс йирас юмов вужсõ, сы мыйта и олыштласны.

КОЗ. Либõ жар шондйыс сотас вывсянныс.

ТОМ КЫДЗ. А ме шондйтõ радейта!

КЫДЗ. Радейтан эськõ, да лыска пу улын кõ мыччысян, саялас шондйыд, а сытõг тэа-меалы сьõкыд.

ТОМ КЫДЗ. Ойя, бара лёк.

СУС ПУ. А кор кõдзыдыс тõдлытõг швачкас, а му вылас лым чир на абу усьлõма, из выйõдз сэк йизыылõ муыс и орõдõ нэриник быдтаслысь сõнсõ. Некор нин сййõ оз нюжõдчы шондлань.

ПИПУ. Но, шуам, нюжалыштас нин, эсы судта лоõ... Талыштас сы вылõ морт ли пемõс, и ставыс... Весиг нин морт кузяõ нюжалас, а сййõс сэтшõм-татшõм локтысь-мунысь босьтас да и чегас.

ТОМ КЫДЗ. Ой, а ме тай нõ, мамõ, со кутшõм шань быдми! Медся том, медся мича, медся еджыд...

КЫДЗ. Эн ышнясь, муса нылукõй. Да тõд, мый тэ танн сы вылõ, медем югзьõдны-сõстõммõдны мусõ, видзны сылысь чõвлõньсõ, бурдõдны войтырõс.

ПЕЛЫСЬ. А мен неважõн тыри дас кõкъямыс ар. Ме õнн куимысь кута дзордзавны онас, еджыдõн, вижõн и гõрдõн. И коръясõй менам со кутшõм мичаникõсь, дзик прõшви кодьõсь! Аслам тусьясõн верда йõзõс и лэбач-пõткаõс. Кутшõма найõ менõ радейтõны!

КЫДЗ. Окма, кõнн менам дас кõкъямысõй? Мича жõ эськõ вõвлн да. Бурдõдлн йõзсõ и гарйõн, и корйõн, и корõсьõн веськõдлн лысьõмнысõ, а налы окота лои зарава юны. Но мед эськõ пõттõдзныс чõсмасясны, да õд некодлы на пиысь весиг õтчыд юрас эз воы керыштõминсõ кõtь нин сей лятиõн мавтыштны. Быдлатн доя, быдлатн висьõ.

ПИПУ. А менам кок улын вöлі зэв ыджыд кодзувкот кар. Ме быдми, вежöдлі, шог эг тöдды. И колö жö вöлі суйсьыны татчö эсйö тöлктöм зонмыслы? Чашйис-пазöдіс позсö. Этша на сылы лой, да сотіс-чишкаліс. Сэки шогыд и суис менö: уськöд-чисны номыръяс, йирöмөн йирöны, дзикöдз косьмыны куті. Аттьö Енмыслы, вайöдіс бөр татчö менсьым дона ёртъясöс... Овмöдчисны выльысь, регыд вынсяласны. Со тай налөн позныс, бура тыдалö тасянь.

КОЗ. А менö со юр висьмытöдзыс бурдöдö сизь. Öтсöгласнад да ёрта-ёртыдды отсасьöмөн жö олöмыд-а.

СУС ПУ. Сідз. Пармаыд вердö, сöстöммöдö сынöдсö, гажöдö-кыпöдö морт ловтö, видзö эндöмысь муяс, видзö косьмöмысь юяс, сетö мортыдды ставсö, мый колö олöмас: и керка, и пес, и дзоньвидзалун. Мыйсö сöмын оз сет! А сійö?.. Тэ, мортöй, шуан, пармаыс бöрдö. А тэнад сьölöмыд оз нö эськö синваён мыссьыны кут, кор тэ сöмын бур ставыслы вöчан, а воча тöдмалан морт виан дой? *(Кылöны гөлöсьяс: Öлексей!..)* Со, казялöмаöсь, кöнкö, тэнсьыд вошöмтö. Воис кад мунны бөр ас оланінад.

МОРТ *(сувтö)*. Кывзі ме тiянöс, вежа пуяс, ловъя ловъяс. Сьölöмöс вөрзöдісны кывъясныд. Ог, ог нин ме ло став кодьөн. Дерт, ме муна, но нуа аскöд тiянлысь дойтö. Öтитор сöмын майшöдлö: серам вылö лэптасны тшöтшъяяс, висьтала кö налы, мый аддзылі да кывлі тані. Збыль, мöд ногаöсь найö, абу нин пöль-пöч кодьныс. Но ме тöда, мый вöчны. Ме югыд мойдөн пырта челядь вежөрö тiянлысь кывъястö. Öд найö абу на аймамныс кодь чорыд сьölöмаöсь, найö гөгөрвоасны тiянсьыныд дойнытö. Мывкыд пармай! Юаласны сэки найö верстьöяслысь, кызди водзö овны, бырасны кö озыр яла ягъяс, чöдъя расъяс, мырпома нюръяс, сöстöм ёльяс? И мый вочавидзасны батьмамныс асланыс ныв-пиянлы? Ме эска, мый миян челядь лоасны тэныд бур ёртъясөн, муса пармай. Эска! *(Бара кылöны гөлöсьяс. Том морт вöчö некымын зумыг воськов сэтчань, кысянь юргöны гөлöсьясыс, но бара на сувтыштлö.)*


СУС ПУ. Со тэ и крепыда сувтін кок йылад. Мун аслад пöльясылдөн чöс туйöд.

МОРТ. Аддзысьлытöдз, Веж Парма... Вежа Парма!

П О М



Выль небӧг



К 94 Юхнин В.В. Биа нюр: повесыт.—
Сыктывкар: ООО «Анбур», 2007.— 80
л.б.

В.В.Юхнинлӧн «Биа нюр» повесыт-
ыс первойыс петалис 1952 воын. Тайӧ
кык школьник — Сеня Майбыров да
Митя Кушманов йылыс гижӧд, сы йы-
лыс, кыдзи найӧ тӧдмалісны Биа нюр-
лыс гусяторсӧ. Петкӧдлӧма коми пар-
малыс мичлунсӧ, сылыс озырлунсӧ.
Лыддысьыс тӧдмалас коми вӧралыс-
яслӧн сӧкыд удж, нэмъясӧн артмӧм
традицияс, обычайс йылыс.

Обложкасӧ серпасалис Аркадий Мошев.



ПЫДДИ ПУКТАНА АВТОРЪЯС!

Редакцияӧ гижӧдъяснытӧ ыстігӧн быть колӧ юртны:

1. Ассыныд ним, вич, ов; кор да кӧні чужлӧмныд (лун, тӧлыс, во).
2. Паспорт юӧръяс: номер, серия, кор да кӧні сетісны, гортса адрес (прописка серти).
3. Индивидуальной налогӧвӧй номер — ИНН (кодлӧн эм).
4. Страховӧй свидетельство номер.

Тайӧс юӧрттӧг редакция гонорар оз вешты.

*Журналын йӧзӧдтӧм гижӧдъяс
редакция оз рецензируют и авторыслы найӧс оз мӧдӧд.
Редакция оз век во ӧти кывйӧ авторгьяскӧд.*

Комп. набор и верстка **Н.Кузнецова**. Корректор **Н.Габова**.

Адрес редакции: 167982. ГСП-2, г. Сыктывкар, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс).
E-mail: kodzuv@mail.ru

Подписано к печати 14.04.2008. Формат 70х108^{1/16}. Печать офсетная. Усл. печ. л. 7; усл. кр.-
отг. 8,4; учетно-изд. л. 7,54. Тираж 967. Заказ № . Регистр. ПИ № ФС 3 - 0226.
Выпуск осуществлен при финансовой поддержке Агентства Республики Коми по печати и
массовым коммуникациям. Отпечатано в ОАО «Кировская областная типография»,
610000, г. Киров, проезд Динамо, 4.